


MWAHA WA XEENI

EHIKHALENLY'AHU

MUROMOLELO?

 Oreeriwa mwaha w'otthikela okhala-tho vapulpitu va, sivinry'aya soophiyaka, kinoona wira, ntoko miyeeri miraru kihikhanle. Waari okathi woorika wa mireyi, ni miyo nave. Oh, nnya, ti yoowitthyuuwiha, vano, ni munikhala oolikana wira mukele-tho mmutekoni. Ni kiwehereryaka vano opacerya esumana ela enrwa, Enamararu ila enrwa ohiyu, mwaha wa mu—muhakalaliho vaava otapernakulu. Nto Muluku atthuna vale, kookhalana ntoko. . . Apwiya aakilaiherya enamuna emosa ya muteko woovirikana ni musya. Nto vakhala wira Awo aatthuna wira siiso, kinwehererya opacerya ena—enamuna yeeyo esya ya muteko esumana ela enrwa, vaava otapernakulu, ntoko nipuro noopacerya.

² Vano nto, nkirina hata mithukumano sitthokihawe, woohikhala wAustralia ni oNova Zelantiya, wa Janeiro ula onrwa. Vano nto Munna Osborn onimwiihana wira okhale muthukumano vamosa yoowo mwa khula enamuna kaamulaihenry'aka va okathi ovinre, oTulsa, masi ohoolo waya vakhani, masi khanikupalanxe yoowo nlelo.

³ Vekeekhai yaari yooreera, Munna Jeffreys, woovahani mukhono ottuli nno, nave-tho omwiiwa mmiravo anyu wiipa esipo ele, ni nyuwo moopaka. Miyo mwa enamuna emosa ennikisivela yeeyo, tithi ni mwaana. Nyuwo khenosivelani yeeyo? “Mmwixuttihe mwanamwane ephiro entthuneya wira eetteleke.” Eyo ekeekhai, Mwenye Guenther, nyuwo—nyuwo moosuwela wira eyo ekeekhai, oowaili anyu. “Mmwixuttihe mwanamwane ephiro entthuneya wira eetteleke, nto anuuluvalaru khonihiya.” Vano eyo ekeekhai. Khino sinookhala imaara sikina owo onihiy'awe, masi eyo khenimuihiya. Munnona? Eyo—eyo enookhala ni yoowo okathi wothene. Wixuttihiwa iwe woopacerya ni etthu p'itthu onilakiw'awe wira iireke, eyo—eyo vekeekhai enookhala ni yoowo. Vano, ela ti. . .

⁴ Miyo kirookumana ni Munna Jeffreys vate vale, nto miyo khwira, “Munna Jeffreys. . .” Miyo koono wira, moosuwela, okathi wothene kinnitteeliwa murima omoona mmosa mmosa w'axinn'aka annithotola va, masi ohiyu xeeni wa munna onithotola orwa! Ola ohiyu paahi w'atthu anoorwa otapernakulu, opacerya paahi muhakalaliho ola. Ola p'uhiyu. . . Hiyo nintthuna nikuxe ohiy'ula, ni meelo voosisu, ni meelo

ohiyu, mwa etthu paahi hiyo ninaamini ahu va otapernakulu, wira—wira nuuluule yeeyo tho. Hiyo nookhalana ikupalelo kamosa-kamosa s'omeekhihu, sootikiniha sana, masi mwa enamuna emosa wala ekina hiyo ninniphwanya seiyo mBibiliani mu. Sinikhala ntoko siri memmo vekeekhai.

⁵ Nto vano, aakhanle-ene munna mulopwana wala muthiyana muletto mu, oniira mpantha wa muromolelo, wala—wala onivaanyiha, okilantthe mu ohiy'ula, nintthuna wira musuwele wira munnitthapeliwa orwa oratteene. Moone, mukhale oorwa oratteene ntoko sinwery'anyu. Masi vano kinroromela wira . . . Ni hiyo ninkhaliha ela etthu yoolipa. Siiso vakhala ntoko wira khamuniiraana ni yeeyo, vaareera, vano, mwiireke ntoko siniirak'aka kaaly'aka etoorota ya serexa. Nto kaaly'aka etoorota ya serexa, yeeyo eri yookisivelexa, okathi wothene, okathi miyo . . . Kaaly'aka etoorota, kaphwanyaru enuku, miyo nkinrihela etoorota ene. Miyo—miyo kinrihela enuku ene nto khutthikela kily'aka etoorota. Siiso, ntoko omukhuura mwalyakhu. Vano, nyuwo othene onnoosivelani mwalyakhu, moone. Nto mwaphwanya nikhuva, khamunimuhiya, munxerekela nikhuva khutthikela mmukhuuraka mwalyakhu. Ahe, ti siiso enrow'anyu wira ohiy'ula, etthu enihimy'aka va, nyuwo paahi . . .mwaphwanya etthu, muniira, "Vano, miyo—miyo vekeekhai nki . . .Miyo kikilantthe va paahi, ntoko Miixuttiho sikaani sa mukereja, mwa mithukumano iya miraru sinttharelana. Iyo siri ntoko wuuluula etthu awo—etthu awo anaamini aya, ni owehaweha sana."

⁶ Nto enamuna emosa paahi ya nyuwo ohala omwiiriha mutthu waamini Yeela, omanela sana mpakha awo okhala oosuwela wira Eyo t'itthu eri y'ekeekhai. Eyo t'inamuna emosa paahi mukhanly'anyu ookhalihaka yoolipa. Vekeekhai ntoko mpatthani aka mmosa, Mwenye Wood yoowo kinkhalanak'aka; nyuwo mwakhomelaru epereku nuusu paahi, nto ethaapwa khutaphuwa voomalela, ettheke enoopwanyulasa vooihlekela. Masi muhaana okhomela, khulipiha sana. Tivo vano miyo kakhaliha ela yoolipa sana mwa mapuro ala kamosa-kamosa, ni wa nyuwo aletto ohiy'ula mukilantthe, miyo nki—nkineererya wootapanyani. Kineererya omanela ekerej'ela etthu enaamini ahu. Othene aniiwa sana yeela, mwiire, "Amen." [Muthukumano oniira, "Amen."—Mol.] Vaareera. Vaare—vaareera. Nto vano kinookumiha ela mmatatani mwaka. Vano nto—nto e . . . Awo anookaravarisa eyo, ni siiso, wira ohoolo waya, awo yatthuna vale osuwela etthu hiyo nneemerery'ahu vekeekahi, ni milipiheryo xeeni hiyo ninttharihel'ahu, ikaravasawu iya sinoohimya. Vano nto hiyo ninniira eyo imaara kamosa-kamosa, 'okhala wira aakhala atthu asya anvolowa ni—ni hiyo nnookelela ohoolo. Nto vano khaninrowa owerya owehawehaxa Miixuttiho sothene sa mukereja, masi kamosa-kamosa wa seiyo ti sintthun'ahu o—olavula. Nto vano, Namararu ohiyu, siiso, enoopacerya . . .

⁷ Vano, Sekunta ni Namaili, kinookhuma, wira kavekele, kikhale oolikana mwaha wa muteko w'ovoniha. Nto nyuwo munoowerya waakuxa atelefooni, wala etthu p'itthu entthun'anyu, ni omuruuha khula mutthu muntthun'anyu omuruuha, wa muhakalaliho ola onoorwa. Ni mwaaleele wira ehirwe ni waakuva vano, kahi orwa, wira, "Ahe, vano kinrowa ovolowa okathi vakhani paahi kivekeleliwe, ohiy'ula. Nto meelo ohiyu, sothene ti. . ." Muhiireke yeeyo. Murweeke n'uwiriya okathi vakhani, 'okhala wira nintthuna nikuxe okathi ahu ni nooniherye Masu awo voororomeleyexa mpakha xetwani ohikhalane hata nlepa nimosa n'opuro wo weetta. Vano nto nyuwo mwahiyaru waamini wanyu weetta mpakha okhomoni waya, mpakha vampacery'anyu waamini, vano muhiye vathi va muupuwelo anyu opaceryaka ovara muteko, nto waamini wa Muluku onoolipiherya sana. Vano munookelela ohoolo. Munnona?

Okhala wira, waamini wanyu khunrowa ovara vanci-enexa. Vathi va muupuwelo anyu ohaana weetta orwaka epantte waamini wanyu onrow'aya, vano nto waamini wa Muluku onimweetta ottuli n'ulipiherya voomalela. Munnona? Masi, vakhala wira waamini wanyu, "Oh, ayo, miyo kookhalana naanaano va!" Nto hata vathi va muupuwelo anyu, ovilikeyaka ottuli nno, wiiraka, "Kiireke eyo enoovara muteko mwa miyo?" Owo khunrowa ovara, oratteene nto. Munnona? Tivo hiyo nintthuna wira ola okhale muteko woovoniha vekeekhai. Ni kihinatthi omukuxa mutthu kimurowanaka mpaani, ni siiso, wira ovonihiwe, wala miteko iya misya, kintthuna awo esuwele sana etthu anrowel'aya mme. Tivo muupuwele paahi, ni murwe munithotole, ni hiyo nnooteeliwa murima owaakhelani.

⁸ Vano muupuwele, vano, voosiisu, ninrowa otthikela Mwixuttiho wa ekereja. Nto meelo ohiyu enamuna emosaru. Vano muri oorwa sana, ni khula mutthu orweeke. Hiyo okathi wothene ninnitteeliwa murima omoona mutthu ti mutthu. Masi vano ola, ohiy'ula, aniruheliwa paahi ale oowaani atthu akhanle a otapernakulu va, ali-alipiheriwe muhina mwa Mwixuttiho yoola. Maana, ota wu vapuwani, vapuwani wa olaleerya, hiyo ninkuxa Miixuttiho sootthuneya, sa ehapari sa Soolempwa. Masi otapernakulu va, hiyo nihaana miyuupuwelo sawihu ni ikupalelo sawihu, ntoko e—ntoko e—ntoko ekereja, ni eyo t'ile nry'ahu wira niwehawehe, ohiy'ula.

⁹ Nto nihinatthi okhunla Masu Awe ooreerihiwa, khanikhanle oowuurama miru sahu okathi vakhani w'olompa?

¹⁰ Muluku oowerya sothene ni a ikuru, Yoole, olumwenku ohinatthi hata opacerya ovilikeya vasulu va ekalakathela yoopacerya, Nyuwo mwaari Muluku. Nyuwo khamurukununwe hata vakhani. Ni yaahikhale-tho hata ekalakathela wira ovarelele, ni waahikhale-tho olumwenku wira ovareleliwe, Nyuwo nlelo munrowa okhala Muluku. Nyuwo mwa a mahiku

othene, ni opacerya mahiku othene. Nyuwo mwa Muluku. Nyuwo khamunakhalaneke epacerelo ya mahiku, nnakhala emalelo y'ekumi. Nyuwo munookhala okathi wothene. Nto, Tithi, Nyuwo mury'ene oohimala, ni hiyo oomala, vano hiyo ninvekela omoriwa Wanyu ikharari w'oMuluku, Muluku, nisuwelaka wira erooho ahu ila eri wira etakanxane ni Ehimalelo, okhuma mwa itthu iya s'okathi, ekelaka mwa Ohimala. Tivo, Pwiya, hiyo nri va wira nitholathole woopoliwa wahu, wira noone moota nry'ahu oolipa vamaithoni va Masu Anyu, ni wira noone moota nikhalihiw'ahu mwa misuwelelo sahu. Hiyo ninnikhala nittharaka ele enoosivelihani Nyuwo? Erooho ahu ennikhalela onamoona Erooho Anyu? Ni mwixuttiho ahu onnimukhalela onamoona Bibilia ola? Nto, Tithi, nithokose soopiili, oratteenexa, mwa miteko iya miraru sinoorwa. Munivahe, Pwiya.

¹¹ Mmureerihe pastore va, matiyaakono, maatiministratore, ni akristu pure othene, atthu anoorwa ekerej'ela. Opacerya mahiku onikhal'aka va, Pwiya, aakhala anci-ene, anci-ene hata kihinsuwel'aka masin'aya, wala otthu anikhum'aya, masi kookupali wira Nyuwo munnisuwela sothene sa yaawo. Ni hiyo nri va mwaha wa niwoko nenlo, ohiy'ula, Pwiya, wira nithukumanele Masu oolempwa. Ni munivahe Eroho Yowarya mmakhaleloni mw'ahu, wira nikilaathi ni murettele, ni oowiisuuramiha, ni nimoovaka Muluku, n'uwehaweha makhalelo ahu ni Masu Awe. Munivahe, Pwiya.

¹² Nto mpaani mu, ohiy'ula, Pwiya, aakhala axinn'aka a ihuhu soohiyana-hiyana sa e—ekereja. Nto, Pwiya, miyo kinnixukhuru sana awo okhalasa va wira nipatthane. Khino siiso nihiiraanaka mwa ipacerelo kamosa-kamosa sa Miixuttiho. Masi mwa mpacerelo ole muulupale wootthuneya, hiyo nnikhala ntoko axinna oowiiwanana mwa mweettelo mmosa. Wira, O Muluku, eyo evahe ikuru opa—opatthaana wahu, ni yawihu. . .ni nlutte na mahala ni ophenta wa Muluku sikhale mwa hiyo vanci-ene. Vano, nisuwelaka, Pwiya, wira ola muteko munci-ene wira mutthu ovare, okhala wira hiyo nookhalana va vathi va otthokelela, ohiy'ula, emalelo ya minepa sinrowa w'Ehimaleloni. Tivo hiyo ninvekela wira Eroho Yowarya ekele elukamaka Masu, ni yooniherye ni enitaphulele mwa enamuna Aya Eneene, wa hiyo, itthu Eyo entthun'aya wira nisuwele. Munivahe, Pwiya. Nto okathi iwoora. . .tthaarua sa muteko simmal'aya, nirowe ntoko ekereja yoolipihiwa, ntoko yoowiiwanana, wira nitakanxe mirima sahu ni sootthuna sahu vamosa, n'axinn'ihu anammuttettheni a Momweneni wa Muluku, ni opwaha ntoko sihinatoko ahu khalayi.

¹³ Kintthuna kooxukhuruni Nyuwo, Pwiya, va ohoolo wa ekereja ni—ni w'atthu ari va, wira Nyuwo mookivaha vano isumana sinci-ene s'omumula. Kinnoona oreera sana ohiy'ula mwaha wa Mukhalelo Anyu ni eparakha Anyu. O Muluku,

hiyo ninninkelela munna va, munn'ihu onrowa ilapo s'okhopela, onrowa ilapo iye, sooriipela ni sooriipiha murima, weiwo hata ekumi awe enikhal'aya ntoko exeko. O Pwiya, mmureerihe Munn'ihu Jeffreys okathi onrow'awe, ni mwan'awe, ni amwaar'awe, ni munvahe wuncereriwa wuulupale. Wira owo opake iphaka mw'epiphini mpakha Muthuko wa Ehapari yooreera waarye ottaiwene ni woorakama-wo. Muniuwe, Tithi, maana hiyo nniira nivekelo nla mwa Nsina na Pwiya Yesu, Mwan'Inyu. Amen.

¹⁴ Vano, ohiy'ula, kisomaka mBibiliani mwaka mukhaani Scofield. Kinoomalaru oviriha miyaakha saka miloko miili ni mithanu, naanaano. Nto nlelo kinniwerya omusoma, masi enikhala yothene yootepanyeya. Nto koothuma ilumeta s'osoma-no okathi kinsom'aka, ni kinrowa woona moota sinvar'aya muteko ohiy'ula, emara yoopacerya.

Vano kookhalana myaha, ntoko ola, wira, "Ekereja ehaana . . ." Oh, itthu sinci-ene, nawerya vale ophierya. Emosa wa seiyo, "Mwaha wa xeeni nnihaniw'ahu Ekereja? Mwaha wa xeeni ehikhalenly'ahu muromolelo? Mwaha wa xeeni—mwaha wa xeeni enaaminel'ahu nrromelo Ohinimala wa munepa wa mulipa-oowaamini? Mwaha wa xeeni ninaapwapwel'ahu athiyana alaleyi? Mwaha wa xeeni nripatis'ahu nipwinihaka? Ni Ekereja enoorowa ovira Moohaawani?" Ni myaha sinci-ene iye va, kinoona wira kihaana muloko ni mithanu wala muloko ni mithanu na miraru sa seiyo, wa ohiyu kamosa kamosa ontharelana.

¹⁵ Vano miyo kinimuupuwela, ohiy'ula, opacerya wene, wira kipacerye, enikhala ntoko Apwiya anihela vamurimani vaka mwaha yoola, e . . . *Mwaha Wa Xeeni Ehikhalenly'ahu Muromolelo?* Niwoko naya . . . Vano, hiyo khanrina hat'etthu ya nthowa n'atthu akina akhanle muromolelo. Hiyo khanrina hat'etthu ya nthowa ni yaawo, masi kintthuna kileeliherye mwaha wa xeeni hiyo ohitonko ahu wiitakanxa hata muromolelo. Miyo kikkalihiwe mulaleyi ekereja emosa Patista yaamukhaani, ntoko sinsuwel'anyu. Nto Patista kuhiyo muromolelo, khiwaari, mpakha naanaanoxa va, nto vano eyo enikhala muromolelo ntoko sikina. Masi, etthu ehinkhalakhal'ahu nikhalaka muromolelo . . .

¹⁶ Vano, hiyo na mutthenkeso. Hiyo na mutthenkeso, nirepheliwe va omu—omunisiipiyu, ntoko mutthenkeso, nikhuru n'atthu noowiitthokiha vamosa wira nimukokhorele Kristu, masi hiyo khanikhanle mmuromoleloni. Khaavo onrowa oruma vasulu vahu, moone. Kuhiyo muromolelo. Ola mu—ola mutthenkeso, opatthana eriyari y'alipa-oowaamini aKristu. Atthu anoorwa va okereja. N'ila enikhala ekereja aneett'aya-wo yathuna vale orwa, okathi wothene ankhala'aya akumi.

¹⁷ Nto awo anoowerya orwa va n'uvaanya sothene sinlaleery'ahu. Eyo vekeekhai ti yoolikana. Nyuwo nlelo,

mwaakhalakaru muKristu, mookhalana epatthanelo, ni munookaweliwa vamosaru ntoko akina aya. Munnona? Kaahimmyeru wira kinnaamini opatiiso w'opwiniha ni maasi, vano nyuwo khunaamini omiserya, n'ukhala sana ni yeeyo, nlelo naamukhala mmosaru ntoko saarow'ahu okhala vaakhanle wira oowaili naamwiiraana. Khino pooti ohiwerya wiiraana voomalela, voolikana. Masi mwaakhalakaru muKristu munna mulopwana wala muthiyana, munnaakheliwa sana vekeekahi, moone, atthu othene.

¹⁸ Tivo hiyo khanrina hata muromolelo, okhala wira miyo kinoona wira muromolelo onnivalaanya oxinna. Aмоса-amosa a yaawo animwiira, "Ahe, hiyo khanrina hat'etthu yo wira muhakalalih'ole. Ole muhakalaliho w'eMetotista." "Ahe, ole ti w'ePatista. Hiyo khanrina...Hiyo na aMetotista. Hiyo khanrina hata naata ni yoole." Munna, Kristu akhala mwa yeeyo, hiyo nookhala—hiyo nookhala nnaata ni yeeyo. Nihaana ohelela yawihu...Ti—ti Erutthu ya Kristu eni—enihaawa. Ni kinnoona yeeyo vanci-ene mulaponi olelo, moota hiyo nrin'ahu...Vano, Kristu khonaireke, hata okathi mmosa, khonatthokiheke hata ekereja ya muromolelo. Vano, muhiye eyo ekhale yookupaliwa sana.

¹⁹ Vano, vano, kinrowa wookohani meelo ohiyu, vakhala wira khula emosa wa itthu iya sintthun'anyu osuwela, ntoko ehantisi emosa kinihim'yaka, wala etthu ekina. Nkirina okathi w'ohim'yaxexa yeeyo, nkiniphiyerya mwaha mukina, 'okhala wira vaamuweryaneya oviriha isumana mwa mwaha yoowo mmosaru. Masi mwaatthunaka osuwela nipuro nene, etthu p'itthu, mukikohe paahi, ni mpwehe vasulu va va—vameesa, nto miyo kinoowaakhulelani.

²⁰ Vano, muromolelo wa khalayixa, ni ekereja yoopacerya ya muromolelo nitonko ahu okhalana, ti ekereja Katolika. Ni eyo etthokihawe iyaakha imiya tthaaru n'itthu nuumala okhwa murummwa ookiserya. Nto eyo ekeekhaii. Nyuwo muniphwanya eyo mwa Axitithi ooNicea oopacerya, ni muniphwanya mwa soolepa sa Josephus, nto, oh, anci-ene wa—wa anammulepa wahala aalupale. Munnona? Ni mpakha mu—mu...khula okathi wa ekereja, sitthikelaka ottuli mpakha okhwa wa murummwa ookiserya, ni iyaakha imiya tthaaru nuumala arummwa, khisaakhanle hata ikereja sa muromolelo. Vano Katolika yaari ekereja yoopacerya ya muromolelo.

²¹ Vano ikereja Prustante ti miromolelo sikhumme mmuromoleloni. Erehereryo yoopacerya jaarwiiye, aari Lutero; nuumala Lutero khurwa Zwingli, nuumala Zwingli khurwa Kalvino, khutthikela erowaka siiso paahi. Ni mpakha Muhakalaliho wa Wesley, ni khurwa siiso mpakha Alexander Campbell, John Smith, n'akina tho, moone, orowaka siiso. Nto miyeettiho sookiserya sirin'ahu vano ti ihuhu soohiyana-hiyana sa okathi wa Pentekosite.

²² Ni miyo kinnaamini wira Muluku onnivara muteko ni khula okathi. Masi mwaahinto oweha wira, khula okathi ekereja etonko aya ovonya, ni wira awo emalakarw wiiromola awo anipacerya omora vaavo vene? Nto khula okathi awo anivony'aya, Muluku khonvenyiha-tho ekereja eyo. Eyo enoorowa naanaanoru mw'enukuni. Vano nyuwo paahi... Mwaatthunaka omusuwela wahala ene a yeeyo, hiyo—hiyo nnoowerya omukumiherya, wira—wira khiivo hata ekereja, nnakhala mwa wahala a ikereja, otonko aya wiiraneya muromolelo omora otonko ovenya-tho. Patista, Metotista, Prespiteriyaano, Luterano, enakhaleru etthu p'itthu, okathi simonry'aya, soomalamala. Vano, eyo ekeekhaii. Vano, ela, miyo—miyo kihooelani vano, mwiitthokihe, 'okhala wira ninrowa okeliha yeela sana. Munnona? Khonakhaleke, hata okathi mmosa. Okathi mulopwana mmosa akhumm'awe ntoko mutthu mmosa khutthokiha ekereja, eyo yaahipacerya.

²³ Muluku onivara muteko ni mutthu, kahi ni muromolelo. Muluku khonatoko hata okathi mmosa ovara muteko ni muromolelo. Owo okathi wothene aavara ni mutthu mmosa. Mwa Waataana Wa Khalayi, Owo aavara ni mutthu. Mwa Waatana Wa Naanaano, Owo ovanre ni mutthu. Mwa khula okathi, Owo okathi wothene aavara ni mutthu, kahi miromolelo. Vano, tivo, vakhala wira Muluku khori mmuromoleloni, enrowa okiphwanyihani miyo okhala nnaata waakhanle-ene muromolelo? Vano, miyo nkinaahimya atthu muhina mwa muromolelo ole, miyo kinihimya muromolelo mmansaya, 'okhala wira atthu a Muluku ari muhina mwa miromolelo iye sothene.

²⁴ Vano, Muluku khonkhalakhala ohiyaka etthu wiiraneya woohikhala wira Owo onoolopola mwaha wa yeeyo. Miyo nkinkupali wira yookhala etthu e . . .

²⁵ Vano, ntoko sirin'ahu myaha sinikhumelela, muhina wa ikereja, ntoko mmosa waarin'ahu naanaano mwaha wa ephome ni makhura, ni siiso. Ni nyuwo moosuwela epaphelo ele "Oophentiwa Munna Branham", ni siiso. Masi mwaha waakikhalinhe oovirikanyana ni yeeyo, okhala wira eyo khekhanle muhina mwa Masu. Nto mwaha wa yeeyo miyo kikhanly'aka oovirikanyana ni muromolelo, okhala wira owo khokhanle muhina mwa Masu. Ni ehaana okhala etthu wira hiyo nilipiherye-vo waamini wahu. Nto naahiweryeke olipiherya vasulu va muromolelo, nihaana olipiherya vasulu va Masu a Muluku. Maana Awo ti mulipiheryo mmose-ene, ti Masu a Muluku.

²⁶ Vano nto vakhala wira Masu a Muluku khanlavula muromolelo, masi anlavula epwapwelaka muromolelo, vano hiyo nihaana olavula ni Masu. Voohicala etthu piixipu, etthu mutthu mukina onihim'y'awe, etthu mutthu ti mutthu onuupuwel'awe, etthu mutthu ooreera murima onihim'y'awe, etthu etthu p'itthu enihim'y'aya, yaahikhale yowiiwanana ni Masu a Muluku,

weso ti yoovonyeya. Munnona? Ehaana okhala, Masu ahaana okhala etthu yookiserya. Masu a Muluku ahaana okhala amen ookiserya.

²⁷ Vano muupuwele, miyo nkinimurula oKristu hata mutthu (nyuwo munnisuwela sana yeeyo) mmuromoleloni. Sookhala minepa sooreerexa ikonto miloko sene muhina mwa miromolelo iye sothene, akhanle aana a Muluku. Masi waathanlasa ni waavalaanya, kinnivirikanya. Ni Masu a Muluku annivirikanya.

²⁸ Ni kinnaamini wira khekhanle hata ismu eri mulaponi olelo, khekhane hata ismu etonko okhala mulaponi, yahaahimmwe wira yaamoowa, ni Masu a Muluku. Miyo kinnaamini wira Masu a Muluku annivaha sothene sinthun'ahu, muumu mu muhina mwa Masu. Okhuma o... epacerelo ahu mpakha emalelo, eyo eniphwanyaneya muumu muhina mwa Masu a Muluku. Vano nto miyo—miyo kinnaamini wira yakhala mwa Masu a Muluku, vano naahaana... Awo annihimya khalayi ene. Ni Masu a Muluku olopolaa.

²⁹ Vano, khamunisoma Masu a Muluku ntoko sinsom'anyu exornaale. Munisoma Masu a Muluku ni Eroho Yowarya, moone, okhala wira ti Eroho Yowarya Eneene enlavula mwa Kristu. Kristu aahimuxukhuru Muluku mwaha wa Owo wiipitherya itthu iya maitho a ale oosuwela ni a miruku, khwaasuweliliha axikhaani wira yiixutte. Tivo, moone, khekhanle hata enamuna y'otoko okhala oolakiwa, khiyaavo hata enamuna y'otoko wiithokiha. Eri enamuna emosa paahi yo wiiwa sana, eyo ti, weetthiwa ni Eroho ya Muluku. Nto musuwelelo owo mwaarin'anyu ohaana olikana ni Masu ala. Munnona? Nto mookhalana. Munnona?

³⁰ Ntoko okathi nikhurunw'ahu va minuutu vakhani vano, hiyo ninvara muteko n'atthu akhanle—akhanle... Aмоса амоса а аwo aKalvinista oomalela, akina w'awo ti mArminiyaano oomalela, ni—ni inamuna soohiyana-hiyana. Vano, okathi wothene yookhala, voohicala opeepheya xeeni munithikil'anyu, enikhalana ipantte piili ya yeeyo. Eyo ekeekhai tu. Ni oowaili aya aakhalana inamuna saya so othoonyerya. Masi, etthu aya t'ila, eniphwanyaneya vayi Ekeekhai ya yeeyo? Ti vaavo vaniphivery'ahu, vaavo vanuupuwel'ahu, ni mahala a Muluku, wira nooovooniheryani Ekeekhai ya yeeyo. Vano nrowe nikuxe paahi... ni vekeekhai ti vaava vakuminh'aka miixuttiho kamosa-kamosa iya sa ekereja.

³¹ Nrowe naakhunle aBibilia anyu, minuutu vakhani paahi, nyuwo othene vano. Nto nrowe mwa Wiisuupulula, kapiitulu 1; kiireke Wiisuupulula, kapiitulu 17, wi nipacerye. Vano nrowe nto nipacerye osoma n'usuwela vano vatthu ikereja iya sipaceny'aya-vo, ni exeeni—exeeni epaceny. Vano, Bibilia onnilopola itthu sothene khalayi ene. Owo onnilopola mwaha wa mahiku hiyo nni—hiyo nnikhal'ahu. Nto vano, Wiisuupulula, kapiitulu 17, mwaathuna vale. Miyo kirale 13, nkaathuna

ohimya yeeyo, eyo eri va . . . Hiyo nnoophiyerya yeeyo okathi vakhani, nave, eyo ohimmwa wa Estadu Unidu. Masi nwiriyane oratteene vano.

Vano nlaikha nimosa naahirwa w'ale yaarina mihasa mithanu na miili, khulavula ni miyo, niiraka . . . Murwe; koothoonyeryeni . . . ohukhummwa wa muthiyana namararuwa muulupale okilanthé eriyari ya maasi manci-ene:

³² Vano muupuwele, ela eniiweya ntoko mwiiriirya. Vano muthiyan'ola oohifayi, vano, naarowaka wiixuttiha yeela, muhaana osuwela toko ethhu enihimya ikanyeryo iya. Vano, *muthiyana*, mBibiliani, onthoonyerya “ekereja.” Akavi ansuwela yeeyo, wira hiyo na Mwaakameliwa? Ekereja ti Mwaakameliwa.

³³ “Murwe miyo koothoonyeryeni ohukhummwa.” Vano, onoorowa okhala ohukhummwa olavuleliwe muthiyana namararuwa muulupale, muthiyana ootakhala onikilaathi eriyari ya maasi manci-ene. Vano, *muthiyana* othoonyeryaka “ekereja,” ni *maasi* anthoonyerya “athu.” Vano, nyuwo mwaweha vale, nave, nwehe, eversiikulu 15 mury'ene vaavo, eversiikulu 15, ekapiitulu emosaru.

Vano naahikimeerya wira, Maasi ale moonaly'anyu, vale vakilanthé muthiyan'owo namararuwa, anthoonyerya maloko, . . . ni mahimo, . . . n'ilapo, ni malavulelo. (Munnona?)

³⁴ Vano, ekerej'ela yuulupale, muthiyana muulupale, vano muupuwele owo muthiyana oohifayi. Vano vakhala wira muthiyana onthoonyerya ekereja, (ni Ekereja ya Kristu ti Mwaakameliwa, Mwaakameliwa ooreera murima), nto va ori muthiyana ootakhala. Nto aahaana okhala mwaakameliwa, ootakhala, ootakiha. Munnona? Vano, ni exeeni oniir'awe? “Owo onkilaathi vasulu,” wala okhala *vasulu*, enihimya, “okhalana oruma vasulu va maasi manci-ene.” Mwa moolumo makina, owo okhalana owerya vasulu va ilapo sothene ni malavulelo n'athu. Owo mutthu muulupale, muthiyan'ola.

Vano, mamwene a mulaponi aararuwa ni yoowo, . . .

³⁵ “Maana mamwene a mulaponi aararuwa,” athu oothaaciri, athu aalupale aararuwa. Mwaarowa oraruwa sayi, mwene aarowa oraruwa sayi, ni ekereja? Oraruwa wa muroohoni. Wa muroohoni! Oraruwa exeeni? Ti, ahe, eri ntoko muthiyana onkhala voohiromeleya n'aiy'awe. Owo onkhala ni mulopwana mukina orine-ene iy'awe. Nto ekerej'ela, vano, eni—entakihá okhala Mwaakameliwa a Kristu, eraruwaka ni mamwene a mulaponi, ni makhalelo aya ootakhala, olapa wootakhala. Oh, Eyo ti yoowiixa ni Ti yoowaatta. Miyo okisivela Masu. Vano nwehe.

. . . mamwene a mulaponi aararuwa ni yoowo, ni athu mulaponi aahapaliwa eviinyu y'oraruwa wawe.

³⁶ “Eviinyu” awe ti yeeyo owo aakaw’awe, otumererya wawe, “Hiyo na Ekereja! Hiyo n’ale nrina.” Munnona? Vano, mukwerethe eyo paahi mmuupuweloni mwanyu vano. Vaareera. “Tivo owo aahiku- . . .”

³⁷ Vano, nlaikha naahimuhimeerya Yohani, “Kinimoothoonyeryani ohukhummwa nno onrweela ekerej’ela yuulupale.” Vano nwehe.

Vano nlo naahikikuxa mmunepani nikirowanaka mothakoni: nto kaahimoona muthiyana aakilanthe vasulu va nxeni nooxeerya, . . .

³⁸ *Oxeerya*, mBibiliani, onthoonyerya “omwene.” Muthinto *oxeerya* enihimya “ophilivila.” Nto *nxeni* ninthoonyerya “owerya.”

Nyuwo mooweha wira, nxeni naakhumme mphareya, wira naari mwa Wiisuupulula, 13. Nto nyuwo moonaka nxeni nikhumaka mphareya, enihimya wira owerya nno waakhumelela eriyari y’atthu.

Masi mwa Wiisuupulula 13, okathi mwaapwittipwitthi ula okhumelenly’awe, owo aakhumme mulaponi, kahi atthu, Estadu Unidu. Masi nto, nuumala, aahikhalana manyaka maili, owerya w’atthu ni w’enamukotho. Vano nto owo aahaakhela owerya, ni aalavua ntoko ehanasi yaalavul’aya owo ohinatthi. Tivo nyuwo muhaana paahi olepa eyo, hiyo ninkela molupatthiwani wa etiini n’itthu imosaru awo yiirans’aya muRooma eepakawu iyaakha sinci-ene sivinre, maana ti SIISO ANIHIMYA T’APWIYA.

Vano wehani ila. “Aakilanthe vasulu va nxeni, owerya.”

³⁹ Nyuwo monweha Repeka? Okathi Eliyeser omuphwanny’awe, waari okathi wa makaaripi, vano owo aahiwuriha ekhamelo. Okhala wira, Eliyeser iirale, “Vakhala wira mwaaruusi onrwa onoovaha maasi ekhamelo ela, yoowo t’onrowa okhala mwa . . . ni okivaha miyo maasi oowurya, okhale yoowo Nyuwo omuthanlaly’anyu, Pwiya, wira okhale mwaakameliwa a murumeyi Anyu, Isakhi.” Nto owo nlelo alompaka, Repeka aahirwa khurika maasi khunvaha owo khiwurya, khiwuriha ekhamelo. Nwehe, ekhamelo yaari nxeni. Nto nxeni nene nenlo owo aawurih’awe maasi, naari nenlo naamukunxe mpakha wa mutheli awe, Isakhi.

⁴⁰ Nto, olelo, owerya wa Eroho Yowarya, yeeyo Ekereja envah’aya maasi oowurya ni okokhorela, ti Etthu ene enrowa okuxa Yeeyo ekumihaka vathi va, wira yakumane ni Mwaakameliwa. Vekeekhai, Isakhi aari omatta wu, makaaripi. Hiyo khaninkumana n’Apwiya osulu wu Movuwani. aEfeso, kapiitulu 5, anihimya wira hiyo ninrowa okumana ni Yaawo osulu. Oh, eyo enniwiiriha aMetotista wiilikanyiha wira ekhuwele. Muupuwele yeeyo! Munnona? Apwiya . . .

Isakhi aahirwa akhumaka empa y’atithi awe, ni aari ota mmatta okathi omoonaly’awe Repeka arwaaka vakhameloni.

Vano owo aahimphenta, opacerya wene omoona, vano khutupha vakhameloni khutthimaka wira akumane ni yoowo. Eyo ekeekhaii. Ti weiwo hiyo onikuman'ahu n'Apwiya. Nto ekhamelo ene yeeyo owo aavanh'awe maasi oowurya, yaahimukuxa mpakha w'aiy'awe.

Ni Owerya wene yoowo Ekereja onkokhorel'aya, olumwenku oniihan'aya othipelela, Ekereja onkokhorel'aya, onrowa okhala Owerya yoowo onrowa oroiha Ekereja osulu, "Wira yakumane n'Apwiya osulu." Eroho Yowarya! Munnona? Yookhala. . .

Nto, nwehe, Repeka aari harus.

⁴¹ Nto muthiyan'ola namuttompee, hiyo nnimuhimy'ahu va. Vano, munnisuwela sana exeeni ekhanle owerya vano? O—owerya, enihimya wira, wira, nxeni. Owo aari vasulu va nooxeerya. Vano, enamuna xeeni ya nxeni naarowa okhala? *Oxeerya*, nenlo naarowa okhala owerya "woothaaciri." Muthinto xeeni ula wa ekereja enrow'aya okhala vano? Eyo ekereja y'othaaciri, ni ekereja yuulupale, ni ekereja yowaatta owerya, ni eyo ovara waya murima ennikuxa mittitthi s'atthu. Ni mamwene a mulaponi anniraruwa ni yeeyo muroohoni, eyo p'yo atthu aalupale a mulaponi. Vano ninrowa osuwela t'ani uwo, minuutu mmosa paahi, ni osuwela mwaha wa miromolelo iya.

Muthiyan'owo aawanre ekuwo yottettheya (v'omwene), . . . aawanre ekuwo yottettheya ni yooxeerya makhwili, . . . aakhunenle n'ureerihwa wa eweero ni maluku oowaarya . . . maluku oorika, mmatatani mw'awe aahikuxa muhasa wa eweero osareiyeeene itthu soonanara ni soowuliha muru sa mooraruwani mw'awe:

⁴² Owo aarowa okhalana exeeni mmatatani mw'awe? Mwiixuttiho awe, yoowo onaavah'awe atthu, "Hiyo na Ekereja. Hiyo na *ela*." Ni owo onniwiiriha mamwene a mulaponi ohapaliwa ni yoowo, siiso. "Hiyo na *ela*. Hiyo na owerya wuulupale! Hiyo ninnikwesa khula elapo. Hiyo na ekereja yuulupalexa ekhanle. Nrowe, wuryakani yawihu. . . Va, hiyo nooyeehi vakhani ya yeeyo. Wuryakani *nyuwo*. Wuryakani *nyuwo*." Eyo eri vo, moone. Ni owo aahikhalana mmatatani mw'awe muhasa. Nkawehani.

Muthiyan'owo aawanre ekuwo yottettheya makhwili, . . . aakhunenle n'ureerihwa wa eweero ni maluku oowaarya ni maluku oorika, mmatatani mw'awe aahikuxa muhasa wa eweero osareiyeeene itthu soonanara ni soowuliha muru sa mooraruwani mw'awe:

⁴³ Vano, apatthani, khaninsoma exornaale ya khula nihiku. Ninsoma Masu a Muluku ooreerihwa ni Oohimala. Erimu yothene n'ilapo ya vathi sinoomala, masi Masu awo anookhala. Eyo ekeekhaii.

Nto vayuuci *vawe* *vaahilempwa nsina, kiireke, naahilempwa nsina, MWIIRIIRYA, PAPILOONIYA MUULUPALE, MAI A ANAMARARUWA, A SOONANARA S'ELAPO.*

⁴⁴ Vano, va okathi mmosa ovinre, nkinoona wira waari okereja vaava, masi kaahilaleerya mwaha mmosa, *Yoolempwa Ya Vaxirini*, onnihimya ehaali ya wahala a Papilooniya. Vano, khula ismu etonko okhala, khula etiini ni khula ismu ekhanle mulaponi olelo, epacenrye mwa Maphattuwelo. Vano, mwakuxaru *aPapilooniya Aili* a Hislop, mwatthuna vale ottharathara yeela mwa wahala, wala mwa iliivuru kamosa-kamosa iye sooreera, munoowerya hata ophwanya khula ismu muntthun'anyu ophwanya. Kinimoottikiheriyani vaavo muhina mwa minuutu vakhani, wa axithiyana alaleyi, moone, ni kiwooniheni paahi vatthu vapacenry'aya toko, moone, ottuli mwa Maphattuwelo. Ni mwa itthu iya soohiyana-hiyana, vekeekhahi moota sinikhumelel'aya mwa Maphattuwelo. *Maphattuwelo* enihimya "epacerelo." Akavi ansuwela wira eyo ekeekhahi? Maphattuwelo ti epacerelo. Tivo, itthu sothene sikhanelle, saahaana okhalana epacerelo.

⁴⁵ Kaawehaka mwiri. . . Miyo kinnikhalaka mutakhwani mwa miyeeri miili, miraru, miyeeri soophiyaka miili. Kinimoona mwiri, moota oreraly'aya. Kinimoona, owo onoomora; mukina onomelela vasulu vaya, ekumi ehinimala. Nto kinuupuwela yeeyo. Masi nookhala nipuro nimoso mwiri ule waarin'aya epacerelo. Waahaana okhalana epacerelo. Ni enamuna emosa paahi waaweryaney'aya oromoleliwa okhala mwiri, wala okhala karvalyo, wala faiya, wala aalamu, wala mukole, wala yaakhanleru etthu p'itthu, waahaana okhala Osuwela w'Oratta ottuli waya. Wala waatonko okhala omosa paahi, waari mwiri karvalyo, itthu sothene mulaponi saarowa okhala mwiri karvalyo. Masi Etthu emosa, yuulupale, Osuwela w'oratta, waahaana orehererya.

Nttopeliwe Nsina Nawe Noowaarya! Owo ti Yoole onikhaliha mweeri ni ittheneeri mw'ekhaleloni ya nsuwa. Owo onikhaliha itthu sothene vooreheriwa waya. Ni Owo onookhaliha Ekereja Awe voolikana. Eyo enimweetta siiso ntoko Owo sinthun'awe wira Eyo yeete; onikhuma nsuwa, onkela nsuwa, onkela epheyo, okuusini, wala etthu p'itthu Owo okhanly'awe. Hiyo naweryaru okumiha ankhili ala a muromolelo mmuruni mwahu ni wiirihela mmansihu voomalela oKalvario. Owo onookhaliha sana, hiyo nakhalaru paahi oowiiwelela sana ntoko miri ni soopattuxiwa Sawe sikina. Nyuwo khamunkhalakhala moonaka mweeri wiiraka, "Nkinrowa waarya ohiy'ula. Nyuwo ittheneeri kamosa-kamosa mwaarye nipuro naka." Masi hiyo, oh, hiyo noovirikana, moone.

⁴⁶ Vano, Papilooniya, nkawehani moota Papilooniya onikhumelel'awe. Onikhumelela wopaceryani wa Bibilia. Owo

onikhumelela eriyari ya Bibilia. Ni onikhumelela wokiseryani wa Bibilia. Vano, yookhala etthu. Vano, owo waapacenrye ni Nimurodi. Nimurodi t'amutenke Papilooniya Okhatoni w'oSineyari, vakhiviru sana eriyari ya Muratthi Tikri ni Eufrate. Nto Eufrate t'alapuwa. Ni—ni moota khula ephiro, y'elapo ele yothene, yeettihery'aya mpakha oPapilooniya. Ni khula mmosa wa mikhora iye saarina inawu imeeturu miloko mithanu na mosa epantte emosa mpakha ekina, mikhora iye soopakiwa ni epronse. Nto mwakhala muhina wa muttetthe w'oPapilooniya, khula ephiro yeettiherya elukamaka veehiceni.

⁴⁷ Vano, nyuwo munowerya orowa oRooma, olelo, ni khula ephiro eneettiherya mpakha oRooma. Ni ookhala harusi mmosa mwaamukhaani Maria eemenle va khula ekompa, vakompa v'ephiro, ni Kristu mwaana mmatatani mw'awe, othoonyaka ephiro ele enlukama oRooma. Munnona? Owo onikhumelela wopaceryani, wa Bibilia; onikhumelela eriyari ya Bibilia; ni va owo ori wokiseryani wa Bibilia.

Vano kintthuna paahi kitthikele osoma, minuutu vakhani paahi, wira mukhalane mulipiheryo wa yeela. Munnona? Vaareera. "Nto kaahimoona muthiyana," vano nwehe, "ekereja." Mwaamonaka *muthiyana*, muupuwele paahi "ekereja." Munnona?

...*Kaahoon*a wira *muthiyan'owo* aahihapaliwa
ephome y'atthu ooreera murima, . . .

⁴⁸ Vano, nuulumo *santu* nnikhuma yayi? Nuulumo *santu* nnikhuma wa "ooreerihiwa," wala "oovahereriwa," ooreerihiwa. Vaareera.

...*Kaahimoona* ahapaliwe-ene *ephome y'atthu*
ooreera murima, . . .

⁴⁹ Vano, vakhala wira muthiyan'ola ekerejaa, owo onaalupattha masantu. Ni owo t'ikereja yuulupalexa. Ookhalana owerya mulaponi mothene. Owo ori vasulu va maasi manci-ene. Ni owo. . . Mamwene a mulaponi anniraruwa ni yoowo. Ahe, t'ani yoowo? Mw'enamuna emosa owo mwiiriirya. Vano Eroho enrowa o. . . Moosuwela, vanthuneya wira sikhale soovaha thanu na xexe sa erooho mukereja; emosa y'ankhili, ni ekina ya osuwela, ni emosa y'ovoniha, ni emosa ya *erowaka siiso*.

...*n'iphome y'ale yaiviwe mwaha w'omutthara*
Yesu: . . .

⁵⁰ Enikhala ntoko awo khiyaacaliwa ni etthu Yesu aahimy'awe. Yaari n'ile ekereja yaahimy'aya. Ti yeeyo. Nto eyo ti yoolikana, nave.

...*vamoonaly'aka, kaahitikinihiwa vanci-ene*.

⁵¹ "Kaahitikinihiwa n'uxanka. Miyo. . . Eyo yaari e—e—etthu yootikinihi mwaha wa yoowo, moota otikinihiw'aka moota owo. . ." Vano mukihye paahi kikhale nipuro na Yohani ni

keererye wooniherya yeeyo vakhani, moone. Yohani iirale, “Owo onikilaathi vale. Owo oniipaka okhala ekereja y’eKristu. Owo onniphiiyerya voomalela misurukhu sothene sa mulaponi. Owo orina mamwene othene a mulaponi vathi va inawu sawe. Owo etthu y’othaacirii ni ya makhwili, ni onwerya sayi omuhapala atthu yaiviwe mwaha w’omutthara Yesu? Onwerya sayi waalupattha masantu? Onwerya sayi owiiva ale yaamutthara Kristu? Nave nlelo oniihimya okhala muKristu, mmansawe, ekereja y’eKristu.” Vano nwehe.

Vano nlaikha naahikiirela wira, Xeeni muhalaka otikinihiwa siiso? Miyo kinimootaphulelani otikinihiwa wa muthiyan’ole, ni wa nxeeni nimukunxe, ni nenlo naarina. . . miru mithanu na miili ni manyaka muloko.

⁵² Vano, nno osoma wene va vano. Nvare ela. Ela enrowa okhala yookhweya sana.

Enam’eyo yoonaly’anyu yaari ekumi, nto vano khinikhala-tho; enrowa okhuruwela. . . okhuma mweepiphini, ni enrowa opwetexiwa: siiso atthu ankhala mulaponi anootikinihiwa vanci-ene, yaawo masin’aya ahilempwe muliivuruni mw’ekumi okhuma opattuxiwakaru olumwenku, vanrow’aya wona. . . vanrow’aya—vanrow’aya wona enam’eyo yaari ekumi, yeeyo ehikhanle, nto entthikela-tho okhala.

⁵³ Vano, vano ela ehaana otiina, tivo ela va. Owo ohimnye wira, vano nwehe, wira, “Okathi othene,” kahi vakhani paahi, masi, “othene ankhala mulaponi anrowa otikinihiwa.” Othene aya anrowa otikinihiwa. Olumwenku wothene onrowa otikinihiwa mwaha wa muthiyan’ola. Nri nikhuru nimosa paahi nihinrowa otikinihiwa mwaha wa yeeyo, nto awo t’ale yaarina masin’aya muLiivuruni mw’Ekumi ya Mwaapwittipwitthi.

⁵⁴ Vano, vanreerela miyo kiwame sana yeela va, ’okhala wira nnoorowa okela mwa yeela mwa minuutu vakhani. Munnona? Masin’aya aheliwe liini muLiivuruni mw’Ekumi ya Mwaapwittipwitthi? Okhuma (Liini?) muhakalaliho wookiserya awo yaary’aya? ohiyu yaaronw’aya waltari? ohiyu yitakanzaly’aya mukereja? Kahi kineererya woosikulihani. Masi, kinimoolelani, Bibilia ohimnye wira, “Masin’aya aheliwe muLiivuruni mw’Ekumi ya Mwaapwittipwitthi okhuma opattuxiwakaru olumwenku.” Vekeekhai! Okathi Muluku, wopaceryani, voonaly’awe wira Owo aamurowa omuruma Mwan’Awe, ni wira Owo aamurowa okhala nipuro na natampi, okathi Ephome ya Mwaana a Muluku emwaraxiw’aya. Bibilia ohimnye wira Ephome Awe emwaraxiwe ohinatthi opattuxiwa olumwenku. Akavi answela wira Bibilia onihimya yeeyo, wira, “Ephome ya Kristu emwaraxiwe ohinatthi opattuxiwa olumwenku”? Okathi Ephom’ele emwaraxiw’aya, khula mutthu a Erutthu, yaale masin’aya yaalempwe ni Ephome eyo, muLiivuruni mw’Ekumi ya Mwaapwittipwitthi, w’opattuxiwani

w'olumwenku. Mwaha wa xeenixa okhalaka ootuthuwa? Oh, munna! Eyo ennilakiherya etthu ene, khenlakiherya?

⁵⁵ Ahe, vano nrowe nisome paahi ela va, noone sinto eyo enihimy'aya ekeekhaii. Munnona? "Vano nlaikha naahikiirela, 'Xeeni okhalaka...'" Kookupali wira ti eversiikulu 8, "Nto enam'eyo yoonaly'anyu...". Vaareera. Ti yeeyo.

Enam'eyo yoonaly'anyu yaari ekumi, nto vano khinikhala-tho; enrowa okhuma mweepiphini,...

Vano, hiyo nintthikela yeele, masi kintthuna kikuxe ela ekina, 'okhala wira nnoophiyerya eyo.

...ni enrowa opwetexiwa: siiso atthu ankhala mulaponi anootikinihiwa vanci-ene, yaawo masin'aya ahilempwe muliivuruni mw'ekumi okhuma opattuxiwakaru olumwenku,...

⁵⁶ "Nnoorowa okhala nikhuru mulaponi," mwa moolumo makina, "anrowa wootothiwa," okhala wira owo aahiwoototha. Ni naahikhala nikhuru nimoso paahi nahootothiwe, nto nlo ti nle naarina masin'aya muLiivuruni mw'Ekumi ya Mwaapwittipwitthi okhuma opattuxiwakarau olumwenku. Hiyo nnoophiyerya yeeyo ohoolo vakhani.

⁵⁷ Vano mmuwehe muthiyan'ola, ekereja, owo aari "*Mwiiriirya, Papilooniya.*" Hiyo ninnimoona owo okhumelelaka ni Nimurodi. Exeeni yaari etthunelo ya Nimurodi? Nimurodi aapattunxe muttethe ni khwiiriha mittethe sothene sikina oliva mpoosito muttethe yoola. Naamuwerya woona etthu ene yeeyo olelo? Nookhala nipuro nenlo olelo? Yookhala ekereja enxintta khula elapo molumwenkuni? Vekeekhai. Nookhala nipuro olelo ninliviha mpoosito khula elapo? Nookhala nipuro nene?

Nrowe nikelele ohoolo nisome ele ehanle ya yeela, vakhani paahi, wira mphwanye elatarato yothene ya yeela. Vaareera.

...yaawo voonaly'aya enam'eyo yaari ekumi,...
ehikhanle, nave ekhanle.

Vaava ti vari ankhili ole orina osuwela.

⁵⁸ Vano, akavi ansuwela wira ankhili ti emosa wa soovaha sa Eroho? Vano, nikhuru xeeni Owo onlavulan'awe, nto? Owo ohaana okhala alavulaka nnikhuru n'atthu arina so—soovaha sa Eroho sinvara muteko Ekeraja yeela.

...vaava ti vari ankhili ole orina osuwela.

⁵⁹ Vano, mweemele, moone m'ovirani wa okathi wothene ola wa ekereja va. Ekhumaka, Eroho Yowarya elavulaka, moota soovaha iya saarow'aya ovara muteko mahiku ookiserya. Vano, nookhalana soovaha sa ovoniha sivaraka muteko. Oh, eyo—eyo enrowa sana. Ahe, munna, sookhala soovaha sikina. Eyo emosa paahi wa seiyo. Eyo etthu yaamukhaani ene. Vano, va yookhala yoovaha yuulupalexwa vaava. Yaarowa okhala yooreerexa, yoovaha ya Eroho Yowarya ya ankhili,

wira eheleke Masu a Muluku vamosa ni wooniherya Ekereja vatthu v amphwanyaney'ahu, ovikana okhalana paahi mutthu ovonihiwe? Hiyo othene ninnitthuna okhala sana. Masi kaamuthanla okhalana munep'aka mukumi, ovikana erutthu aka ekumi, mwa khula okathi. Oh, wulu!

Mwiiwe Eroho Yowarya elavulaka mwa Yohani, oPatimu, yiirale, "Vaava ti vari ankhili. Awiriyane Ela." Vano nnikhalana elatarato enipakeya va. "Va eri . . ."

Vaavo ti vari ankhili ole orina osuwela. Miru mithanu na miili sinthoonyerya miyaako mithanu na miili, sikilaatheliwe ni muthiyana.

⁶⁰ Ori muttette mmosa paahi, kinsuwel'aka, mulaponi . . . Siri mittette miili, miyo sinsuwel'aka, sirina miyaako mithanu na miili wala soovikana mwa seiyo. Cincinnati ti mmosa wa seiyo, yeeyo enaakanyeriwa okhala ehantisi yoowupuweleliwa y'oCincinnati. Ti ya mai mwiici, moosuwela, wira . . . erowaka siiso. Masi yookhalana yoovikana yeeyo muhina mwaya. Masi khiivo hata ekereja enxintta Cincinnati.

Nri nipuro nimosa paahi molumwenkuni mothene, nrina ekereja ekilanthe vasulu va miyaako mithanu na miili, enruma olumwenku wothe. Vano, kinoomalaru orwa kikhumaka weiwo. Itthu iyo sothene.

Nto kihoona weiwo vatthu yaahimy'aya wira, "Va aakhala ankhili." Wiisuupulula 13. "Ole orina ankhili uupuwele nummaru na nxeni, maana nummaru nlo ti na mutthu." Kahi nikhuru n'atthu, nloko n'atthu, masi "mutthu." "Vano nummaru nawe ti miloko miloko mithanu na mosa ni miloko mithanu na mosa ni thanu na mosa."

⁶¹ Miyo kweekwe kinniiwaka, wira, veehiceni va paapa a oRooma, ti voolepwa, "VICARIVS FILII DEI." Miyo kweekwe kaanitthokelela sinto yaari ekeekhaii. Mukwerethe eliinya, nto mwaalikele yeeyo, ni manummaru a oRooma, nto moone yaari yeeyo. Eyo ekeekhaii volikana. Miyo kaahikhala siiso vakhiviru va nleha na ipantte tthaaru ya paapa, muvutirinani, "Owerya w'olamula w'omooroni, wirimu, ni epurkatooriyu." Munnona? Vano, itthu iyo, kinoomalaru orwa kikhumaka weiwo, kinoomalaru orwa oRooma ni koosuwela wira ekeekhaii. Vano hiyo noosuwela wira yothe eyo yoosuwanyeihiwa.

Vano va mamwene athanu n'aili: athanu aamora (yaawo yaakhanle okathi ule), nto mmosa ookhala (ola t'ule aarowa orwa vano, yoowo aari Kesari), nto mukina nlelo khonarwe (yoowo aari Heroti, yoowo aari ootakhala); . . .

⁶² Vano nwehe. Nwehe noota ery'aya yoolikana.

. . . vanrwawe, owo khanrowa olekela.

63 Ookhala onsuwela okathi xeeni Heroti orumm'awe? Miyeeri mithanu na mosa. Khwaapurula ame awe mphironi, athukweleliwe-ene vakhavaloni. Khupaha muttethe; khuwootherya aKristu. Vano khumooapa viyela mwaamukhaani epante wa mwaako okathi awo yaaris'aya...opattihaka muttethe. Mithanu na mosa—miyeeri mithanu na mosa. Nto moone, "Nto nxeni. . ." Vano nwehe, nkawehani moota aary'awe mulavilavi. Munnona? Vano nwehe.

Enama yeele yaari ekumi, ni ehikhanle, yeeyo. . . ti aneethanu neeraru, ni ti a aneethanu neili (mukhalelo wa aneethanu neili), ni onrowa opwetexiwa.

64 Mutthu ti mutthu onnisuwela etthu enihimya *opwetexiwa*, ti "omooroni." Nto nkawehani vatthu eyo yaakhumm'aya—vo, "omooroni." Exeeni iyo? Moowiixani. Khiwaavo hata mulipiheryo wa mwiixuttiho w'eKatolika. Khaavo Bibilia a mwiixuttiho w'eKatolika. Khekhanle etthu iyo ntoko Bibilia a khula mwiixuttiho w'eKatolika, hata vakhani. Awo khanihimya okhala. Phaatiri aari osulu iwe, phaatiri ula mwaamukhaani va ekereja Murima Wooreera aaroorwa va. Owo khwira, "Oh, owo. . ." Miyo kaamuhimeerya mwaha w'omupatisa Mary Elisabeth Frazier. Owo khwira, "Oh, nyuwo mmupatisale ntoko ekereja Katolika yoopacerya yaapatisak'aya."

Miyo khwira, "Yaari liini yeeyo?"

Owo khwira, "mBibiliani, Bibilia anyu."

65 Miyo khwira, "Ekereja Katolika yaapatisaka siiso? Owo ti mwiixuttiho wa ekereja Katolika?"

"Ayo."

66 Miyo khwira, "Mwa ehivonyeryo ya ekereja Katolika, erukunuwenleni vanci-ene?" Munnona?

67 Owo khwira, "Ahe, moone, nyuwo othene munnimwaamini Bibilia. Hiyo ninaamini ekereja." Munnona? "Hiyo khennicala etthu Bibilia enihimya'awe. T'ile ekereja enihimya'aya." Eyo ekeekhaii voomalela. Nyuwo mwakhalakhalaru mphiyeryaka mooniheryo, wa yeela, mweehererye emaara emosa, moone. Awo khancaliwa n'ile Bibilia enihimya'awe; eyo khena naata n'iyoy. Awo ancaliwa n'ile ekereja enihimya'aya. Munnona?

68 Masi hiyo khennicala ele ekereja enihimya'aya. Hiyo ninaamini ele Muluku enihimya'awe. Amen. Maana Bibilia, yoolempwa, "Nuulumo na mutthu nikhale noowootha, nto Nawaka nikhale Ekeekhai." Tivo hiyo nihikhanly'ahu muromolelo.

69 Vano nwehe. Nwiriyanee ela, minuutu mmosa paahi. "Mamwene mathanu yaawo yaari, yaamonre, mamwene mathanu." Mwaatthunaka yeeyo mwa wahala, kinoowoonihani. "Nto mmosa ookhala, nto mmosa onimoorwa."

Vano nwehe, “nxeni.” Vano, nxeni khaari mwene. Owo aari “ole okhanle, ohikhanle-tho; nave okhanle, ni ohikhanle; okhanle, ni ohikhanle.” Exeeni iyo? Oranttelana wa mapaapa, owerya, nxeni nirumaka. Owo p’ukathi Rooma eepakawu aarukunxiw’awe wira okhale Rooma a opaapa. Rooma a epakawu aaroorukunuwa, vano nto khukhala omwene wa opaapa, yoowo, awo yaarin’aya paapa omuhiya mwene, nto paapa ti mwene a erooho. Mwaha wa yeeyo owo oniwarhiw’awe nleha, mwene a erooho, oniihimya okhala mukelampa a Yesu Kristu. Eyo eri vo. Vano nwehe.

⁷⁰ Nto ninrowa oruuha vanlakani mwiiixuttiho ole w’eKatolika niwooniheryeni moota ory’aya woothelana sana ni ikereja Prustante, moone, moota eyo eneett’aya ekelaka mukereja Prustante, vanci-ene. Vekeekhai, voovirikana, ni Bibilia, voovirikana voomalela. Vano, “Enama yaari ekumi, ehikhanle-tho.” Vano muupuwele, “Othene aya animootothiwa, mulaponi, yaawo masin’aya yaahaalempwe okhuma opattuxiwakaru olumwenku.” Nrowe noone.

Enama yeele yaari ekumi, ni ehikhanle, (versiikulu 11)
nave ti yeeyo *ya neethanu neeraru, ni . . . ya neethanu*
neili, *nto enrowa opwetexiwa.* (Owo onootthikela
okelelaka ohoolo mpakha omorela mw’epiphini
woomalelani w’ephiro.)

Vano manyaka muloko yoonaly’anyu anthoonyerya
mamwene muloko, . . .

Vano nkawehani va. Mwaatthunaka woona etthu yootutuxa, nkawehani ila.

. . . anthonyeerya mamwene muloko, nlelo ahaakhenle
omwene; masi anrowa ovahiwa owerya wira yeettihe
omwene n’inama ewoora emosa paahi.

⁷¹ Awo kahiyo mamwene oowarihiwa nleha; awo anamaruma. Moone, awo khanakhaleke mamwene oowarihiwa nleha, masi anaakhela owerya ntoko mamwene, ewoora emosa, momweneni mwa nxeni. Owo p’ukathi ene yoola w’ooriipela naanaano va vaavo anamaruma ankhumelel’aya. Munnona? “Yaakhenle owerya ntoko mamwene, ewoora emosa ni nxeni.” Vano, vaareera.

Othene ala aakhalana muupuwelo mmosaru,
anoovaha owerya waya n’ikuru wa nxeni.

Awo anrowa owana ni Mwaapwittipwitthi, nto
Mwaapwittipwitthi onrowa waawerya: (Ovuwa!)
okhala wira owo ti Pwiya a mapwiya, ni Mwene a
mamwene: vano atthu yiihaneliwe woopowa, yaawo
athanliwe, akhanle oororomeleya.

⁷² Kaanithuna kilalenrye-ene mutthaka mmosa naanaano va mwaha wa yeeyo, “Oothanliwa, ohinatthi opattuxiwa olumwenku, ni anikhala oororomeleya mwaha w’owiihaniwa

waya.” Aleluya! Ti yeeyo. “Awo t’owiihaniwa, oothanliwa, ni oororomeleya.” Ni etakaniheryo, moone, “Oothanliwa, ni oororomeleya.” Awo anoomuxintta. Hata wira awo aninnuwa sayi.

⁷³ Nto komunismu ula muulupale, mweettelo wa komunismu orin’ahu olelo, muhixanke mwaha wa yeeyo. Owo vekeekhai onvara muteko mmatatani mwa Muluku. Kinniwerya wooniherya ni Bibilia ola. Owo onrowa omuhaawiha mwaha wa khula mulipa-ooowiwiwa omwiivaly’awe. Ayo, mulopwana. Nkaaweheni mamwene ala othene wiiwanana, ni anrowa omunyokha. Ni nloko nothene, olumwenku wothene, opuruliwaka ni komunismu. Vano, ohaana okhala mweettiho wa Muluku, wira omuhukhumu. Nyuwo muniira, “Nwehererye minuutu mmosa, Munna Branham. Komunismu, mweettiho wa Muluku?” Mara, vekeekhai, mweettiho wa Muluku. Bibilia ohimye siiso. Masi onimweetta wira ohimye ohukhumwa onaarweela athtu oohiphwanela voowuuliha-vo muru. Exeeni ehanle molumwenkuni mu? Exeeni nrin’ahu? Va nihiku nlo . . .

⁷⁴ Kinoomaala mwah’aka minuutu mmosa paahi, yaweryaneya vale. Miyo kaamusoma nipattuuxa n’epaphelo ya Yoolempwa vaavo mwaana ooraruwiwa ohinkel’awe mmuthukumanoni mw’Apwiya mpakha maloko muloko ni maxexe. Akavi anuwela yeeyo? Eyo ekeekhai, Otumererya 23; mwaana ooraruwiwa. Muthiyana aphwanyiwaru vapuwani, eyo p’iyo, w’ohikhapeleliwa ni mulopwana, ni mulopwana onimuxintta muthiyan’ole, mulopwan’owo ohaana omuthela. Ni hata wira owo onikhala namuttompe, ohaana okhala ni yoowo mpakha owo okhwa. Nto muthiyan’ola atheliwa n’uwo, oothaka wira harusii, nave ohikhanle, vano vanooweryaneya wiwiwa mwaha wa yeeyo. Ni mulopwana ni muthiyana athenle, yamuyara mwaana ooraruwiwa, owo, mmuthukumanoni mw’Apwiya khonvolowa, mpakha maloko muloko ni maxexe. Nto miyaakha miloko mixexe nnikhala nloko nimoso. Sinookhala miyaakha imiya xexe etampi ile ehinatthi okhuma vanlokoni va Isarayeli.

⁷⁵ Muluku omunanara etampi! Moota xeeni munweherery’anyu ovira vasulu v’Ephome Yoowaarya ya Pwiya Yesu, mwaha paahi wo wira mpannta wa muromolelo khata, munawehererya okela? Munrowa orwa ni milipiheryo sa Muluku ahiiso khamunrwa nnakhala. Ekhweeli. Tiyaakono, mulaleyi, etthu p’itthu nnikhal’ahu, khena naata n’iyo. Nyuwo munoorwa muttharihaka sooruma sa Muluku.

⁷⁶ Maloko muloko ni maxexe. Mutthu okilantho vaava naanaano yoowo aavaanyihana yeeyo ni miyo. Khwira, “Ninsuwela sayi ole onrowa woopowa nto?”

⁷⁷ Miyo khwira, “Ti vaavo vaatthuneya nyuwo okhala Kalvinista oophwanela.” Nsina nanyu niheliwe muLiivuruni ohinatthi opattuxiwa olumwenku. Muluku onikuxa evuvelo ele y’ephome. Iwo p’ulakela Wawe. Munnona?

“Masi ele erina . . .”

⁷⁸ Nwiriyaane. Nyuwo atthu amwaavano, olelo, nkisuwenle sinto munoorwa ekereja yeela, wala otthu onrow’anyu, nyuwo amiravo n’axiruusi. Nyuwo mooweha, wira itthu siniir’anyu, nakhalaru nloko nikina, an’inyu anoolamuliwa mwaha wa itthu siniir’anyu? Nyuwo khamurina nttittimiho voophwanela? Nyuwo axiruusi munikhumela nno mwaawanreene akaputtula ala axikhaani ookhuvaya n’itthu mukerekhere, nyuwo moosuwela, eyo enoonihereya mwa mwan’inyu. Mwaahisuwela wira apiip’inyu yaari mu—muthowa-naasi, ni ame anyu mwaaruusi a mukoraaleni, nto mwaha wa yeeyo nyuwo mukhanly’anyu namarula ikuwo olelo? Vekeekhai. An’inyu anrowa okhala exeeni? Ayo, mulopwana. Muluku ohimmye wira Owo aamurowa othotola sootakhala s’axitiithi mwa an’aya ni an’aya, mpakha maloko mararu ni maxexe.

⁷⁹ Ni nyuwo munnoona, munn’aka, wira khula okathi muniir’anyu eri yoorera, eyo enoothotoliwa mwa an’inyu?

⁸⁰ Nkawehani va, nrowe naakuxe aHeperi, kapiitulu 7. Bibilia ohimmye wira, okathi—okathi Melikisetekhi okumann’awe n’Abrahamu atthikaka waamwiiv’awe mwene, khimureeraha, nto Eyo ehimmye wira, vano, “Levi . . .” Owo onlavula mwaha w’oliva sanamuloko. Ohimmye wira, “Levi aahaana oruma waakhumme w’Apwiya wira aakheleke sanamuloko s’axinn’awe. Nto Levi yoowo aakhela sanamuloko, aahiliva sanamuloko, maana owo nlelo aari mmuthanani mw’Abrahamu okathi okumanann’awe Melikisetekhi.” Ni Abrahamu aari muhapwaapu awe. Abrahamu aamuyanre Isakhi, Isakhi aamuyanre Yakope, Yakope aamuyanre Levi; Levi, tithi, pwaapu, muhapwaapu. “Nto Levi ary’ene mmuthanani mwa Abrahamu,” Bibilia ohimmye wira, “owo aahimuhiliva sanamuloko Melikisetekhi.” Aleluya!

⁸¹ Muhimuhiye hata mutthu wooleelani wira khula enamuna ya mweettiho mulaponi onniwerya okela mmutekoni muulupale wa Muluku. Owo onimweetta orowaka ohoolo! Owo otthokihwiwe ottuli wu wopaceryani. Khaavo hata axetwani wala axetwani oophiyerya anwerya wiikelihia mmuththokiheryoni mw’Awe.

⁸² Vano, Bibilia khohimmye wira “vooweryaneya” owo aahiliva. Bibilia ohimmye wira, “Owo aahiliva sa namuloko,” okathi waary’awe mmuthanani wa muhapwaapu awe. Ovuwa! Owo ti Pwiya’aka. Oh, Owo aahisuwela, hata, olumwenku ohinatthi nnakhala opakiwa. Owo aahisuwela itthu sothene. Ni mw’Abrahamu, owo aahiliva sanamuloko.

⁸³ Nto munna muthiyana, mulopwana, munwerya sayi otthimaka ota nno, ni atthu ekhalaka yeettaka n’awara a axilopwana akina, ni axaara ehononaka itthoko, ni mukhalaka enamuna munikhali’anyu, munwehererya wira nloko nikina nnookhala exeeni? Ela t’itthu ekhanle. Khekhanle hat’etthu vano

woohikhala nikhuru n'atthu ooraruwa, nikhuru nooyariwa, vootapanyeya mwa soonanara. Ni eri etthu emosa ehanle wa yeeyo, nto nlo ti nihiku n'atomu hiyo onikhal'ahu. Vekeekhai ti yeeyo. Hiyo nri okathi wookiserya.

⁸⁴ Okilante-ene voosiis'ula, ottaiwene mmiyaakoni m'oKentucky, mwammiravo mmosa mwaamukhaani, waanirika ophiya imeeturu tthaaru ni nuusu wa yoowo, opakaka oravo wa meelee. Alakela waanimurikela osuwela ti nvi naari ntata noolopwana wala noothiyana. Okathi wiiwaly'awe... Miyo kaaroorava nipuro nookhapeleliwa. Nkaasuwela vatthu kaary'aka. Nto miyo kaari mapuro kamosa-kamosa mmurivathini. Nto kaawela iwe wira kaxaye mireyi. Nto vakilante aka osulu iwe, miyo khupacerya olavula ni yoowo. Nto mmirav'ola khwira wira aarowa wira mpantta w'anatoropa. Nto khusuwela wira, naaropacerya olavula mwaha w'Apwiya, nto owo khwira, "Mulaleyi, khamunikupali wira hiyo nri okathi wookiserya?" Ottaiwene iwe mmiyaakoni.

⁸⁵ Miyo khwira, "Vekeekhai, ti nry'ahu. Vekeekhai, mwan'aka, hiyo nri okathi wookiserya."

⁸⁶ Hiyo nri va. Ola p'ukathi nnikhal'ahu, munna. Hiyo nri vooপুরoni. Khamunwerya woona moota aximayi ale, n'axitiithi, moota yaakhalas'aya, n'apwaapu n'apiipi? Khamunwerya woona moota apaapa n'amaama anikhal'aya? Khivanxankiha hiyo okhalaka mwa sohononeya olelo. Khivanxankiha, nyuwo waalaleeryaka voohihyererya; awo animwaawara akaputtula vomasaru paahi, ni osenyela wiitho wanyu. Awo animwaalya asikaro ni owiiselelani, ni wira, "Muxikhe ele eri yawinyu." Mwaha wa xeeni? Okhala wira nlo ti nihimo awo akhumm'ayamo. Kinoorowa ophiyerya yeeyo, volukama, *Epyo Yenowa*. Ninoophwanya vatthu eyo envolow'aya, noone mwaha wa xeeni awo anir'aya siiso. Awo aana a xetwani okhuma opattuxiwakaru olumwenku. Eyo ekeekhai. Ni khennihaleela hat'etthu, wa yeeyo, olamuliwa paahi t'itthu ene paahi ehanle. Khivanweryaneyya okhalana etthu ekina woohikhala olamuliwa. Muluku onoorowa omalamaliha paahi etthu yothene. Nto atthu t'aniira eyo mmansaya. Muluku khaatthuna wira ekhale siiso, masi Owo aahisuwela wira yaarowa okhala siiso. Tivo Owo aahimmy'awe wira aamwiira, "Owoototha othene ale ankhala mulaponi, waahiya ale masin'aya yaaheliwe muLiivuruni mw'Ekumi ya Mwaapwittipwitthi ohinatthi opattuxiwa olumwenku."

⁸⁷ Nrowe niwehe. Nisome ohoolo waya vakhani vano. Vano, vano kookupali wira nri mu 12.

Manyaka muloko yoonalyanyu anthoonyerya mamwene muloko, nlelo ahaakhenle omwene; masi anaakhela owerya wira yeettihe omwene vamosa n'inama ewoora emosa paahi.

Othene ala aakhalana muupuwelo mmosaru, ni anoovahererya owerya waya n'ikuru wa nxeni.

Vano awo anrowa owana ni Mwaapwittipwitthi, nto Mwaapwittipwitthi onrowa waawerya: okhala wira owo ti Pwiya a mapwiya, ni Mwene a mamwene: vano ari ni yoowo ale yiiha—yihaniwe, athanliwe, akhanle ooromeleya.

Nto nlo naahikileela, Maasi yoonaly'anyu, vale vakilanthe muthiyana'owo namararuwa, anthoonyerya maloko, . . . mittitthi, . . . maloko, ni malavulelo.

. . . manyaka muloko yoonaly'anyu va nxeni, ala anrowa omunyokha namararuw'owo, . . .

⁸⁸ Nwehe yeeyo vano, “manyaka muloko,” mamwene ala muloko. Moone, yothene ela enoolikana, etthu akhanle anamaruma ala. Nkawehani epantte anamaruma ala anuuramel'aya. Anuuramela vayi? Paahi—mukileele paahi namaruma ohinimuuramela komunismu. Munnona? Nto awo anoo (exeeni?) anoomunyokha “namararuw'owo,” muthiyana, ekereja. Masi xeeni? Nkawehani etthu enrowa wira yeeyo.

. . . ala anrowa omunyokha namararuw'owo, anrowa omwaakha sothene sirin'awe emuhiye ahiwanr'etthu, vano anrowa okhuura erutthu awe, n'umpaha ni mooro.

⁸⁹ Awo anookumihasa etthu iyo mmaaphani, vekeekhai ntoko seemenly'aka va. Hiyo naarina okathi paahi w'osoma sana mwah'ole iwe wa ekerej'ele, ni ottharatthara mwa Yolempwa, vaavo Eyo ehimmy'aya wira, ensommwa, “Mamwene othene a mulaponi mu, ni anohota othene, ni othene, anoorowa wunla, okhala wira Papilooniya muulupale ohaakhiwa ithu sothene muhina mwa ewoora emosa.” Ewoora emosa, okathi awe waahiphya! Nto, oh, moota Eyo ehimmy'aya, “Mutteeliweke murima, nyuwo atthu oowaarya, ni nyuwo maprofeta othene oowaarya, okhala wira Muluku ohinla ikuhu mwaha w'ephome y'atthu oowaarya ni axinn'inyu wa yoowo.” Moone, ti yeeyo. Vekeekhai, komunismu ovaraka muteko sana mmatatani mwa Muluku. Vekeekhai ntoko Mwene Napukutonosoori aavanr'awe muteko sana mmatatani, orwa waakuxa aYuta ale, okathi yeett'aya erowaka! . . . ? . . .

⁹⁰ Nto etampi enoowerya otthikela ehononaka, epyo ya xariya enooweya okhala vale ni epyo enoowerya otthikela ohononeya, ehononeyaka ehononeyaka mpakha vanivir'aya okathi enoomala. Enophiya vatthu, okhala wira aximai aya ni axitiithi aya n'akina yaakhala siiso hiyo nihinatthi, ni enamuna yeeyo, mpakha ohikhala hat'etthu ennihaleela. Ni nyuwo moosuwela etthu Yesu ohimmy'awe? Vahaakhanle wira Owo oovukula muteko ene, khaavo hata mutthu aarowa woopowa.

⁹¹ Munniwerya woota? Munniwerya woota mwaha wa xeeni nrin'ahu iya (Miyoo kahi kinoopwapwela.) Arthur Godfrey,

n'atthu othene, moosuwela, moone, ni Elvis Presley, ni—ni ikhootwa vathi, ni makakawu, ni maihi emorelaka muxikoni mw'aya, ni inamuna sothene iya, amiravo siniiseettih'aya? Exeeni eniriha yeeyo? Exeeni iyo? [Munna Branham ommana vapulpitu imaara muloko ni mmosa—Mol.] Okhala wira eyo enikhuma munikhuruni n'atthu ooraruiwa, ootakanxana voohiphwanela. Khiivo ehanle! Oh, awo anoovenya ni wiipa, “Vakhiviruxa, Muluku aka, wa Nyuwo,” ntoko Ernie namattotta epwiri ni othene ale akina siiso, aniipa muthinto mmosa w'esipo, ni sikina ntoko siiso. Munna, moosuwela? Eyo, vekeekhai enamirima miili. Ayo, mulopwana.

⁹² Mutthu khorina ehakhi y'epulpitu ila onikhuma iwo n'urowa omwiina rock-and-roll ni boogie-woogie ni inamuna sothene sa itthu. Owo khorina ehakhi hata vakhani y'ottuli nno. Ela ti y'enamukottho, ale oowiihaniwa a Muluku. Arumeyi oowiihaniwa ni Muluku t'akhanle oottuli nno. Ni kahi anikhala ottuli nno wa etthu ntoko yeeyo. Owo t'ori mulattu ya olelo, atthu akhalinhe ekereja ntoko elooxa. Elooxa khiva mulattu, mwaatthuna wira yeeyo, eyo ti yawinyu. Masi mukihye kooleleni, yookhala evirikanelo yuulupale ya weererya. . . ya elooxa ni ekereja. Ayo, mulopwana. Nyuwo mwaatthuna wira itthu iyo mulooxa, ni okhalana inamuna sothene iyo sa maira ni sikina, eyo ti yawinyu. Masi, munna, ekereja ehaana oveliwa okhuma vapulpitu mpakha vathi. Ti yeeyo. Nkinihimya oveliwa ni icanela isya ni sikina. Miyo kinihimya ni muhakalaliho, wa enamuna ya khalayi wooveleelihiwa ni Muluku onrowa omwarya etthu ene okhuma epanthe emosa mpakha ekina. Ayo, mulopwana. Ntoko omupattiha luuxu, luuxu a nrexiiya omupattiherya maparatha yuupenrye nipattuuxa na masa. Ayo, mulopwana, awo anoomwareya okathi luuxu onikhal'awe vasulu.

⁹³ Vano nwehe, “Awo aakhalana mmupuwelo mmosaru, ovahererya owerya waya.” Miyo kiri vathi va yeeyo vano. “Manyaka muloko.” Ayo, vano.

Vekeekhayi Muluku oohela mmurimani mwaya otthuna wo wira sintthun'awe, (eyo eri vo), ni wiuwanana yaworu, ovaha nxeni nlo owerya waya, mpakha moolumo a Muluku omaliheriwa.

Vano, muthiyana omoonaly'anyu ti muttethe muulupale, oniweettiha mamwene othene a mulaponi.

⁹⁴ Vano, khivantthuneya okhala oohaaxeya, hiyo noosuwela eyo etthokiheryo w'oruma w'eKatolika. Khivantthuneya hata mutthu. . . Miyo—miyo kinnaamini voolipa ntoko kinaamin'aka wira kihaakhela Eroho Yowarya. Miyo kinnaamini iyo vekeekhai ntoko kinaamin'aka wira ka muKristu eemenle va olelo, wira etthokiheryo w'oruma w'eKatolika eyo ti mu—mu. . . Muttethe w'oVatikano ti mu—muttethe okilante vasulu va miyaako mithanu na miili. Etthokiheryo w'oruma w'ekereja ti

enama yaari ekumi, ehikhanle. Owo ti Papilooniya. Yothene eri yowooniheriwa voolikaneene, voolikaneene mwa Soolempwa. Eyo ekereja Katolika.

⁹⁵ Vano, vano va ti nri nipuro nintutuxa. Nyuwo muniira, “Ahe, nyuwo khamunakiphwanye, Munna Branham.” Masi mukihye kookoheni etthu emosa paahi. Nrowe nitthikele vano eversiikulu 5.

*Vano vayuuci vawe vaari...vaahilempwa-vo,
MWIIRIIRYA, PAPILOONIYA MUULUPALE, MAI
A SOONANARA...MAI A ANAMARARUWA NI
SOONANARA S'ELAPO.*

⁹⁶ Owo aari exeeni? N-a-m-u-t-t-o-m-p-e. Ni owo aari m-a-i. Exeeni? M-a-i. Owo aahiyara etthu. Mai a aana axilopwana? A anamararuwa! Namararuwa exeeni? Mmosaru ntoko na—ntoko namuttompe, muthiyana oohifayi. Exeeni emukhalinhe oohifayi? Mwiixuttiho awe. Owo aapaka okhala ekereja y'eKristu, masi aamwarya makano oopakiwa ni mutthu. Nto va eyo enihimya wira yaahikhalana...Vakhala wira eyo ti yaari mutthenkeso woopacerya, nto enikhala ntoko sookhala mitthenkeso kamosa-kamosa sikhumme mwa yeeyo. Owo aari mai a anamararuwa. Eyo ekeekhahi? Mai a anamararuwa. Khaakhanle ookhalaka mai, vano, a aana alopwana. Khaakhanle ookhalaka mai a...Aahaana okhala mai a athiyana. Nto, vakhala wi awo yaari athiyana, saari ikereja. Vano nrowe nisuwele. Exeeni enikhuma mwa...

⁹⁷ T'uvi waari mutthenkeso woopacerya? Ekereja Katolika. T'uvi waari mutthenkeso wa neili? Lutero. T'uvi waari mutthenkeso wa neeraru? Zwingli. Owo waaphiyenrye exeeni? Kalvino. Nto owo khuvira mpakha ophiya Anklikano, nto Anklikano mpakha Metotista. Metotista, Metotista okumihenrye exeeni? Mwa vaavo khikhuma Alexander Campbell. Mwa Alexander Campbell khikhuma John Smith. Mwa... Alexander Campbell ti ekereja y'eKristu; vano, awo khukhalana xexe wala thanu, ekereja ya Kristu ni ismu iyo sothene sikina sikhaani sikhumelela. Vano va khurwa ekereja Patista, eyo khukhalana ipantte sinci-ene sikhaani sikhumme. Nto mwa ekereja Metotista khikhuma...mwa ekereja Metotista, khikhuma, woopacerya khikhuma Metotista a Wesley, vano nto awo khukawanyeya vaara vaxexe wala vathanu. Vano awo khuphiyerya enamuna ekina ya Metotista, vano nto awo khukawanyeya-tho, vano awo khuphiyerya Metotista Yootaphuwa. Nto—nto vano mwa yeeyo awo khuphiyerya Nasareno. Nto okhuma Nasareno mpakha Anawetta a Osantu, nto Anawetta a Osantu anoothikela ekhumaka. Ismu sikhaani paahi sikhumelelaka siiso, sinoothikela sikhumelelaka, khula mmosa wa seiyo sikhaani—anamapacerya akhaani ottuli wu anoothikela ekhumelelaka. Nto khula emosa wa seiyo exeeni yiiraly'aya? Nto vookiserya simalenle mwa Pentekosite.

98 Vano exeeni Pentekosite iiraly'awe? Ethhu emosaru mai aya iiraly'awe, awo aroothhika khwiitthokiha. Vano khukhala exeeni? Mu—muromolelo. Nvolowe emosa, etthu yoopacerya, “Mwiixuttiho anyu t'uvi?” Mmiravo, awo animooxamulani ni epenti yaamukhaani, moone, wira esuwele ele mukhanly'anyu, ele munaamin'anyu. Nto nyuwo mwaahikhale oowirana n'awo, munna, nyuwo munimoomoliwa naanaano vaavo. Nto ti yeeyo.

99 Ni muhuupuwele wira okhala wira munihimya wira mwa muPentekosite wira moolipa. Munna, anoorowa okhala aPentekosite anci-ene ahin'ye ephiro ntoko siry'aya ale ari mphironi, kookupali. Munnona?

100 Vano, mitthenkeso iyo sothene, vaakhanle wira saahihya paahi eparakha ya Pentekosite weetta, kahi wiitthokiha, yaakhanle paahi mwa oxinna ni ohiya Eroho Yowarya ovalaanya. Eroho Yowarya ennivalaanya. Ananiya ni Safira yaahirwa emara emosa, khwira *elexe ni elexe*; nto Eroho Yowarya khwira, “Moothenleni?”

101 Masi hiyo nniira, “Vano, ole ti Munna Jones, muhimuhimyane hat'etthu yoonanara yoowo vano, owo ti mulipa ooliva sana orin'ahu mukereja. Miyo koosuwela wira ookhalana Eroho Yowarya; miyo koomwiiwa olavula ilavulelo, ni kinnimoonaka okhuwela mwa Eroho.” Eyo kahi hat'etthu ovikana oyeeherya epwiri vasapalani yoowuuma v'enyompe. Munnona? Hat'etthu erina naata ni yeeyo. Muluku t'onivaha yoohimya. Owo t'orina yoohimya sinto ole ti yoowo wala nnari. Vekeekhai. Masi hiyo nookuxa—tho niroihaaka mmuromoleloni mwahu. “Ahe, hiyo nnoomoomola mwa—mwa Asempeleya, maUnisista anoomukuxa. maUnisista anoomukuxa okathi vakhani, vano nto awo anoomoomola. Okhala wira, awo anoomuteexa iwo, vano Yesu Paahi enoomukuxa. Yesu Paahi enoomukuxa mmakhatani okathi vakhani, vano nto etthu enttharelana enimukuxa ti ekereja ya Muluku, enoomukuxa. Ekereja ya Muluku ya Oprofeta enoomukuxa, vano mweettiho wa Tomlinson onoomukuxa.” Oh, wulu! Munna, vakhala wira kanihanle woomoliwa! Eyo ti muPentekositeni, muhakalaliho wookiserya. Nto vano awo arina Mooro Wooripelela, ni arina anamakokhorela a makhura, ni e—ni ephome wiitho. Nto, oh, ikharari, nkisuwenle vatthu vaphiyans'aya vano.

102 Ethhu emosa paahi, etthu yothehe ti yoohononeya. Mwaahisuwela wira Bibilia ohimnye wira yaamukhala yoohononeya? Mwaahisuwela wira bi—Bibilia onnihimya wira nihiku nla, ninrowa okhala vaava, okathi hata meesa a Apwiya anrow'aya osareya marapheyo? Ni ohimnye wira, “T'ani onthun'aka omwiixuttiha? T'ani onrow'aka omusuweliha Miyo? Nikano vasulu va nikano, vasulu va nikano, yooruma vasulu va yooruma.” T'ani Owo onwery'awe omwiixuttiha? Ale ahihiwe nipele, n'amaama. Munnona?

¹⁰³ Vano, khaavo—khaavo muthiyana hata mmosa, muthiyana mmosa paahi oohilakeya epooma ela aarowa oweriya omuyara mwaana harusi. Owo onikhala oyariwakaru, vano, owo onoowerya weetta sana. Masi mwaahiwehe, wira ame awe t'amukhalelo yoole, mwaaruusi ule, imaara thanu na xexe muhina mwa muloko, vekeekhai onimwiira ntoko ame awe aniiir'aya. Vano, nyuwo moosuwela wira eyo ekeekhaii. Muthiyana oneettiha etthoko emosa yoohifayi, aamuwerya omuyara mwaana mwaamuthiyana. Owo aamukhalana iyaakha muloko ni mithanu na mosa, ooreerela ni oolakeya ntoko ekhokowa, masi, owo akhalaru siiso. Masi, etthu ene ti wira, owo onoothika ni wira ntoko ame awe.

¹⁰⁴ Vano, ekereja Katolika t'ari namuttompe mutokweene oopacerya aakhumelenle ni miixuttiho owo aapank'awe mmansawe, miikho, seiyo, Bibilia ohimmy'awe wira, "Owo onrowa okhuma moowiixani ni onrowa opwetexiwa." Bibilia oohimya yeeyo. Vano, yiixuttiharu iyo, ti yoovonyeya. Ti yoovonyeya, nittharihaka Masu a Muluku. Vano nto va enoorwa ekereja Metotista, eyariwe ni yeeyo, mwali mmosa ooreera, masi owo iirale exeeni? Oroorukunuwa khuyaira itthu imosaru ame awe aniiir'aya. Onaahiya atthu a muthukumano awe waawara akaputtula. Waahiya waalya asikaro. Waahiya ekelelaka ohoolo ni wira ntoko sintthun'aya. Khiivo hat'etthu enihimmwa mwaha wa yeeyo. Pastore a khalayi mwaamukhaani oohikhomaala ottuli iwe, ottuli w'epulpitu iwe, owo onimoova nihiku nlo waakhiwa mulivelo awe, wala muhasa wa mikatthe.

¹⁰⁵ Mukihiye kooleleni, munna, kaamwamputi olaleerya Ehapari yooreera, ni okhuura ipulaxa sa maasi ni maakha n'uwurya maasi a mmuratthini, ni ohimya Ekeekhai ya yeeyo. Vakhala wira atthu othene a mmuthukumanoni mwaka yaamuvenya ekhume, miyo kaamwaaleela Ekeekhai ya yeeyo. Ayo, vekeekhai.

¹⁰⁶ Mulattu ene xeeni? Oh, epaphelo ya yolya. "Ahe, moosuwela, miyo ka pastore a ekereja yuulupalexa mmuttettheni." Nyuwo aPatista ni aMetotista munimwiiwa profeta oowootha. Vano, ela ti yoolipa, masi etthu p'itthu eniixuttiha voovirikana ni Bibilia ola ti profeta oowootha. Khenikicala moota ery'aya yooreerihiwa, ti oprofeta woowootha. Ti yeeyo.

¹⁰⁷ "Oh, sothene siri sana vakhalaru wira mookhalana nsina nanyu muliivuruni." Nyuwo pooti okhalana nsina nanyu muliivuruni etuusiya ntero. Naahikhaleru muLiivuruni mw'Ekumi, moopweteya! Nyuwo pooti okhala ooreera murima sana, pooti okhala oororomeleya ni ooreerela ni oolakeya sinwery'anyu okhala, eyo kherina naata n'iyoy.

¹⁰⁸ Esawu aari vaara vaili onvikana Yakope, naattharihaka okhala mutthu, aakhaliheryaka atithi awe oowuuluvala yahoona n'itthu sothene sikina. Ni Yakope aari namalavulasa mwaamukhaani aakhala apharelelaka esaaya y'ame awe,

mwammiravo mmosa nikenyeya. Masi Muluku khwira, “Kinnimpenta Yakope ni kinnimukhootta Esawu,” amiravo oowaili aya ehinatthi oyariwa. aRooma 8 anihimya siiso. Eyo ekeekhai.

¹⁰⁹ Muluku onnisuwela etthu eri mwa mutthu. Ni Owo onnisuwela etthu eri mukereja, nave. Hiyo ninkhala akumi ni Yolya y'Ekumi, Yolya ya Masu a Muluku. Vano, tivo hiyo nihikhanly'ahu muromolelo.

¹¹⁰ Vano kintthuna koovaheni ekina yaamukhaani... Kintthuna koovaheni musuweliho mukina mukhaani kaalemp'aka va. “Yuulupale...” Vano mwa Wisuupulula, 19:2. Kookhalana etthu yookwerethiwa va. Kintthuna kiwehe koone exeeni iyo vano.

Tthiri olamula wanyu ti w'ekeekhayi ni w'exariya: maana owo oomuhukhumu muthiyan'owo namararuwa muulupale, yoowo aahonona elapo mwaha wa sooraruwa save, ni oomunlela ikuhu mwaha w'ephome yarumeyi awe mmatatani mw'awe. (Eyo t'imalelo ya ekereja Katolika.)

¹¹¹ Vano, hiyo ninthuna nave wira nwehe, va nave, wira muromolelo—wira muromolelo oniphwanyaneya-tho va mwa Soolempwa, wira e...Ni Bibilia khonalavuleke mwaha wa muromolelo. Muromolelo onikhuma mukereja Katolika. Eyo ti mai opacerya a muromolelo, ni khula muromolelo onikhuma memmo. Vano, ela enoorowa otiina vakhani. Vakhani-vakhani enrowa otiina okathi wothene, moone. Masi miyo—miyo kintthuna wira moone wira miromolelo khasiyariwe wala khasitthokihawe ni Muluku. Sitthokihawe ni xetwani.

¹¹² Ekereja ya Muluku ti e...Hiyo khanikawanyeyiye, othene n'erutthu emosa; nrromelo mmosa ni mwiixuttiho, mmosaru mwa ephentelo. Eyo ti Ekereja ya Muluku mukumi. Voohicala etthu awo, itthu iyo, hiyo nri mmosaru vamosa! Eyo ekeekhai. Onakhaleru Mmetotista wala muPatista, munna, vakhalaru wira ooyariwa vasya ni oosareya Eroho Yowarya, owo ti munn'aka. Hiyo nneetta nikhata nnikhata. Ekeekhai. Ayo, mulopwana. Khivanvirakina hata vakhani.

¹¹³ Moise. Imaara sikina kinniweweha ni wira, “Moosuwela nikhuru nle n'aPentekosite oothipelela, Munna Branham, mwaarowa okhumelani ni nikhuru ntoko nle?” Moosuwela? Moise aanaaweha aana a Isarayeli. Owo aawehaka vacanelani emosaru Farawo aawehak'awe-vo. Farawo aawehaka ntoko nikhuru n'anamawolowa oloko, masi Moise aawehaka ntoko athu oothanliwa a Muluku. Owo aanisuwela wira awo yaahikhalana natiri. Mwaha wa xeeni? Owo aasuwela ni Masu. Ni mwaha wo waamini... Ni nnawu nawe veehiceni, wira okhale Farawo, ni olumwenku wothene vathi va inawu sawe, aakilaathi vale n'uyeeherya eviinyu mwaano mw'awe, n'athiyana ooreera

wira envekhuleleke, ntoko mwene, wala namaruma, wala mwene a mulaponi, mmiravo Moise, ni iyaakha miloko mixexe, aahikhalana mmatatani mw'awe. Owo aaniweha nikhuru nle n'anamawolowa oloko, masi aanisuwela wira owo aari mmosa a yaawo. Aleluya! Ti yeeyo. Owo aanisuwela wira aari mmosa a yaawo. Ni mwaha wo waamini, paahi, owo khuthanla!

¹¹⁴ Atthu othene ahaana othanla. Nyuwo muhaana othanla. Nyuwo munrowa othanla vano. Nyuwo munrowa othanla voosiisu. Munoorowa othanla meelo ohiyu, mwakhalaru mukumi. Muhaana othanla nihiku nlo. Munna, okathi ovinre khalayi miyo koothanla. Bibilia ola aari tisionaariyu aka. Bibilia ola aari Eliivru aka y'Ekumi. Bibilia ola aari Masu a Muluku. Bibilia ola t'itthu kinikhal'aka-no. Bibilia ola t'itthu kinikhal'aka oororomeleya.

¹¹⁵ Tivo, Moise aanaaweha aana a Isarayeli. Ni kahi wira owo iira paahi, "Oh, awo atthu ooreerexa. Miyo nkirina hata nthowa n'awo. Oh, nnari, nkaakhanle oolavulaka hata nuulumo nimosa na nthowa w'awo." Ti siiso atthu anci-ene aniiir'aya olelo. "Oh, aPentekosite ale n'atthu ale arina Eroho Yowarya, n'atthu ale anaamini ovoniha wa Muluku, oh, miyo—miyo—miyo nkirina hat'etthu ya nthowa n'awo." Masi owo khaari Moise. Owo aahimuhiya Ejitu khukhala mmosa a yaawo. Owo aarookhuma khuruwa eriyari y'axinn'awe. Owo aari mmosa a yaawo.

¹¹⁶ Munna, ti vaavo miyo onkux'aka-vo ephiro aka. Kinookuxa ephiro n'ale vakhani oothanyiwa a Apwiya, hata wira ansarya nikuphi, enakhalelu etthu p'itthu. Awo aakhalana natiri, ni kinnoona masin'aya muLiivuruni mw'eKumi ya Mwaapwittipwitthi. Awo axinn'aka. Eyo ekeekhai. Mwiire othanla wanyu ni mukhale ni yaawo. Ekeekhai wala ovonyeya, mukhale vaavo khula enamuna. Awo yavonya, mwaakhaliherye muwoonihaka ekeekhai. Ekeekhai. Khamunkhalakhala mwaakhalihaka ooloka mwaha w'owoomola. Moone, mweererye waakumiha.

¹¹⁷ Charlie, ntoko awo silavunly'aya mwaha wa Munna Allen, mwaha wa mooro awo. . .ephome mmatatani. Miyo khwira, "Nnakhala, nkinakhaleke oohimuttittimiha A. A. Allen." Miyo khwira, "Vaakhanle wira kaaniwerya olaleerya ntoko A. A. Allen, nkaarowa okhalana hata muteko w'ovoniha." Vano, yaphiyererya ohiiraana wira ephome ti eyooniheryo ya Eroho Yowarya, mmatatani mwanyu, miyo kinoovaanya eyo. Masi yaphiyererya oxinna, owo ti munn'aka. Miyo kinookhala nikhata nnikhata ni yoowo okhottoni. Ti yeeyo. Owo avonya vale, kinimweererya omukhaliherya. Owo aahivonye, miyo kavonya vale, kinootthuna wira owo akikhaliherye. Nto ti siiso hiyo ninrow'ahu—ninrow'ahu ohoolo. Vano nwehe va.

. . .owo aari *MWIIRIIRYA, PAPILOONIYA*. . .*MAI A ANAMARARUWA*. . .

118 Vano munnoona moota ekereja olelo, apatthani, munniwerya woona moota ikereja iya olelo sinikhal'aya paahi khula enamuna sintthun'aya okhala? "Sothene siri sana voolikana ene, mukeleleke ohoolo," ekuluwe enikhuura ekuluwe, muhixikhe. "Vano, khiva mulattu wira yeeyo. Vano, muneererya okhala a enamuna ya khalayi paahi." Vano nkawehani mwiixuttiho aya. Vano kintthuna... Vano nkawehani. Owo ti muhapo aya. Munnoona, wira iyaakha vakhani sivinre, wira ekereja Katolika yaari emosa paahi yaatthuniheriwa orowa osineemani? Ekereja Metotista khiyaarowa wuupuwela etthu ene eyo. Miromolelo iyo sothene, "Nnari! Iyo miteko sa xetwani." Kaatthuna kisuwele exeeni yiireiye. Ayo, mulopwana.

119 Ni nyuwo moosuwela, nyuwo mwaanaakuxaka axiruusi ale aKatolika, awo yaakhuma ni xikhaani iya... (Vano, akina a nyuwo munnunwe ntoko miyo)... mwaanikhuma n'uweha etthu ila yaamukhaani weiwo awo yoonih'aya makuth'aya. Mmirav'ole, miyo kinoona wira, ori omooroni, ohiy'ula. Nkisuwenle. Nkihiyo mphuki awe. Masi okathi opank'awe esipo ele yoopacerya yaamukhaani yoonanara yaakhumme muraatiyuni, ehikhoottihiwe, ele, "Mwaarukunxe, axiruusi, mwaarukunxe; mwaarukunxe moonihe makutha anyu ooreera." Akavi anuupuwela yeeyo okathi ekhummy'aya emaara yoopacerya, iyaakha sivinre? Ele waari othereneya woopacerya vaavale vale. Eyo ekeekhai. Nto okathi ovariw'awe mulopwan'ola oTexas, khuroihiwa athiyana ale iwe khuwara ikuwo iye sa muhina wira elikaneke n'itthu awo yahaary'aya, ni itthu siiso, ni waahiya ehiwiirinhe etthu. Nto vano awo aniirani? Erookela epuruleyaka. Ero eroohoo.

120 Ookhala mulopwana mmosa aalavula, nihiku nlo. Owo khwira, "Nkisuwenle enrow'aka wira. Kookhalana mmiravo mmosa ooreera murima, a xariya, nto mmirav'owo onikhala mwa enamuna emosa onikux'awe khula etthu onvar'awe."

Miyo khwira, "Mwaha wa xeeni?"

"Owo oneetta ni nawiiye."

121 Mweette ni mutthu okhanle nawiiye, yeenyu munookhala nawiiye. Ame aka atokweene a oKentucky yaanihimyaka wira, "Mwammaathiru ni mwalapwa orina ithomwa, munrowa ovenya ni ithomwa, nave." Mmukuxe—mmukuxe muthiyana ohikhanle ooloka, mmuhiye... mwaaruusi, mmukhalihe ni mmi—mmiravo mmosa ooreera murima oophwanela, nto naanaanoru owo onikhala oohifayi ntoko mwalapwa mwaamukhaani. Murukunxe yeeyo nno ni nno. Nyuwo munsuweliwa mwaha w'apatthan'inyu. Mwiivalaanye! "Mukhume eriyari aya," ohimnye Bibilia, "mwiivalaanye!" Ti yeeyo.

122 Miromolelo saya sathikelaru ohononeya weiwe ntoko waahiya atthu aya... Ahe, va nihiku nlo, ekereja emosa

yuulupale yooreera Patista, aahaana ohiihiwa muteko. Aahaana olaleerya minuutu miloko miili paahi, mulopwan'owo aaniwerya, 'okhala wira pastore aahaana omulya soona. Muthukumano wothene waakhumela vate. Othene aya yaakhala vale mwa makwicili oomulya soona, n'uhokolowa, pastore ni othene aya. Miyo kaaroorowa ekereja emosa ya Ethukumanelo, vale aari mulopwana mmosa eemenle, aawanre nlaya nuulupale, eemenle vale, khwira, khuphiteerya vapulpitu siisa *sa*, olavulaka mwaha wa muthinto mmosa wa nluwa owo aaphwanny'awe vasulu vamwaako. Ti yeeyo aarin'awe tu, vano owo khuhokolowa. Nto ikatha sawe saari sa ncano mwaha wa mwixi wa sikaro. Ayo. Nto alavulaka mwaha w'athiyana, wira alopwana yaarowa omuttikha. . . Musewe xeeni ule a wAlemaanya awo animuttikh'aya ni yeeyo, vanci-ene nyuwo—nyuwo munikaw'anyu iturufu, munnimusuwela? Aarina. . . Oh, miyo koonna wira kaamuupuwela yeeyo. Pinokle, awo yaarowa okhalana musewe a pinokle. Kinoona wira ti siiso. Ayo, ti vaavo munikhittaan'anyu. Owo musewe a atthu ene. Musewe a pinokle, mmuttuphani! Wulu, Muluku aka! Ti vaavo ori mulipiheryo aya. Khivanxankiha! Exeeni awo aniir'aya yeeyo? Vano nto n'unyakula mwaha w'ekereja Katolika iwe ni mapuro ala Ooweetakasiwa n'uttikha elotariiya. Vano, nyuwo maPrustante mw'atthu oohifayi ntoko awo siry'aya, vano muniwerya ohimya exeeni mwaha wa yeeyo? Mwaapu khokhanle wiirela epirikha "onanara." Vekeekhai nnari. Nyuwo muniira yeeyo, nto ni wira, "Ahe, miyo ka Prespiteriyaano. Miyo ka Mmetotista." Nyuwo khamuhiyo hat'etthu mpakha muyariwe vasya. Ti yeeyo. Ni mwaaairaka siiso, nyuwo moosuwela, yookhala etthu mwa nyuwo enooleelani wira itthu iyo khasilonke, ni nyuwo munookhuma mwa yeeyo vekeekhai ntoko nyuwo siry'anyu oorekama ovikana nratha. Nyuwo moosuwela wira eyo Ekeekhaii. Vekeekhai. Ayo, mulopwana. Mukhalelo owo onthara yeeyo. Mwaha wa xeeni?

. . . MAI A ANAMARARUWA . . .

¹²³ Nimosa wa mahiku awo, mai mutokweene onrowa wira, "Moosuwela? Tthiri, oophentiwa, oowaili nnoolikana." Vano nyuwo moosuwela exeeni iyo nto? Mwaataano wa Ikereja onrowa otakaniha sothene vamosa ntoko siry'aya vano. Nto nyuwo moosuwela etthu enrowa wiiraneya wa nikhuru naamukhaani ntoko nla? Munoorowa oliva mwaha wa yeeyo, amiravo. Eyo ekeekhaii voolikana.

¹²⁴ Masi muhixanke Mwaapwittipwitthi, onoomuxintta owo. Maana Owo ti Pwiya a mapwiya, ni Mwene a mamawene, ni Muluku onoorowa eettihaka Ekereja Awe, ohiya muromolelo. Owo onoomwaraxela Ekerej'eyo Makhura ale a eweero a Eroho Yowarya. Munna, Mooro onoomora okhuma Wirimu, ni ithoonyeryo ni mitikiniho sinimwiiraneya, ntoko sihitonko anyu woona khalayi. Ayo, mulopwana. "Muhoove, nikoto

naamukhaani, Atith'inyu ohaasivela woovahani Omwene." Ayo, mulopwana. "Ole onvilela mpakha woomalelani!" Eyo eri vo. Mukhale mphironi memmo. Muru anyu okhale owehaka oKalvario. Bibilia ola ookhalana exariya. Muhixanke.

125 Vano nwehe. Sookhala mihapo kamosa-kamosa awo arin'aya. Ikano kamosa-kamosa awo arin'aya. Naamuwerya otthikela paahi. Naanaanoru, eyo evuuvlen mukereja Prustante. Vano athiyana aKatolika khupacerya o... Vano, khiwaari mulattu waawara akaputtula axikhaani, vakhalaru wira yaanirowa okereja ni owara nleeso naamukhani mmuruni. Enamuna emosa y'elimalelo, "Muhikhuure hata enama Namathanu." Nto, oh, ti vaavi mutonko anyu ophwanya wira muhaana owara nleeso wira nvolowe mukereja? Kintthuna mukoonihe Yoolempwa. Owo oprofeta woowootha. Eri vaavi mukereja wira muhaana owara exapheyo mukereja? Mwaawaraka exapheyo mmuruni, khamunimuttittimiha Kristu, ekeekhai; alopwana, kinaahimy'aka. Athiyana, nyuwo mookhalana ekhuneelo, masi kimmutharimula mutthu ti mutthu akoonihe vatthu vari exapheyo wala nleeso. Ti ikharari sanyu! Nto nyuwo munoometthaka sothene. Vano ankhi yeeyo? Oh, awo anira, "Eyo etthu ya khalayi." Yaari ene, ti Bibilia! Ni Masu a Muluku t'ari ekeekhai.

126 Kilavulaka va, woohikhala khalayi, ya muthiyana aarapinhe inawu sa Yesu, khikuxa ikharari sawe, moosuwela, khi—khikukuttha ni seiyo. Miyo khwira, "Enamuna emosa paahi muthiyana aarow'awe wira yeeyo, wiiriha muru awe okhalana ikharari soophiyerya wira orapihe inawu Sawe, ni okukuttha ni seiyo." Ti yeeyo. Oh, iwo, iwo otakhaliwa wona moota e... Va, okathi wooriirya, yeetaka ewanre-ene ekhasako yaamukhaani yoosalelana siiso, ni erutthu aya yoohiwar'etthu yooneyaka.

127 Vano eniiriwa, "Mwaha wa xeeni owuulumelaka athiyana?" Vantthuneya wira muulumeliweke.

128 Ni nyuwo alopwana munaahiya axaar'inyu wira siiso, munna, miyo—miyo nkinsuwela etthu yoowuupuwelelani. Vano, eyo ekeekhai.

129 Ni nyuwo mapastore, nkinuupuwela wira muri vaava. Masi mwamoonaru mmiravo ene, mmuleele arwe, ahimye, akiphavele. Munnona? Vakhala wira owo khammuttittimiha-tho Kristu ohiyaka muthukumano awe orowa ni yeeyo woohikhala... Vano owo... Awo khino animwiira iwo ottuli wawe, masi vakhala wira owo khonaahimeerya yeeyo, owo kahi murumeyi oophwanela a Yesu Kristu. Eyo ekeekhai voolikana ene. Owo khomphwanela okhala murumeyi a Kristu. Murumeyi a Kristu ohaana okhala oominyala yakhala etthu eniphiyerya Bibilia. Vekeekhai. Masi awo ari vo, awo anookhuma ni wira mwa khula enamuna.

¹³⁰ Vano nto, naanaanoru, maPrustante yaahaana ottotta eyo. Nyuwo aMetotista ooreera murima, ni nyuwo aPatista, ni nyuwo maPrespiteriyaano, wala aNasareno, Anawetta a Osantu, ni othene anyu, etthu emosaru, munookhuma, thanu na mosa ya emosa, ni etuusiya nuusu ya ekina. Eyo eri vo, “Mai a anamararuwa.” Muromolelo anyu, “Vakhalaru wira awo apacenrye nipuro nuulupale, exeeni evirikanne?” Munnona? Ennivirikana vanci-ene. Iyo khasinapacereyeke, Nipuro *nle* nuulupale. Siiso khino sipacenrye ene nipuro nanyu nuulupale ohitto nno, masi kahi Nle osulu Iwe. Entthariha vatthu onikhum’anyu. Eyo ekeekhaii.

¹³¹ Vano, nkinoona wira nookhalana okathi wira nikuxe ela ekina, khino vanreerela kiihiye ekhale ya voosiisu. Vaareera, nrowe nikuxe ela yookhuveyaxa va. Hiyo nookhalana, va, “opatiiso mmaasini.” Hiyo nookhalana-tho “otthommwa,” ni, oh, itthu sinci-ene. Vano nrowe nikuxe ela paahi, ela yaamukhaani, yookhuveya ya “athiyana alaleyi,” ni nikuxe yeela.

¹³² Vano, vano, muthiyana mulaleyi, nkintthuna woosikulihani, masi kintthuna kooleleni etthu emosa. Khamurina hata nlepa na Yoolepwa, hata nimosa mBibiliani. Ayo, miyo koosuwela otthu onrow’anyu, ni miyo kinnikhalanaka yothene yawinyu, ayo, “Ni an’inyu alopwana n’athiyana anoolavula s’eprofeta.” Vano, vakhala wira apastore anyu khansuwela etthu nuulumo “olavula s’eprofeta” nnihimy’aya, awo—awo khansuwela hat’etthu. Kahi mwaha aya okhala wiithela w’epulpitu, yeereryaka woohimeeryani wira mukhale muthiyana mulaleyi. Munnona? Okhala wira eyo, vekeekhai, ennuulumeliwa okhuma Maphattuwelo mpakha Wiisuupulula. Vano mukihye kiwooniheni ila, moone.

¹³³ Vano kintthuna mutthikele ni miyo mwa Timooteyo Oopacerya 2:11. Mutthikele vaava paahi nto ninoosuwela yeela vano, ni ninoophwanya yeeyo va, nave, Miteko sanyu 2. Ayo. Nto paahi—nwiriyan paahi va etthu Yoolepwa erin’aya ohimya ya mwah’ola.

¹³⁴ Vano, ookhala aatthikela iiraka, “Ahe, Munna Branham, nyuwo mwa mulipa-oowaanyokha athiyana oowuuluvala.” Miyo nkihiyo mulipa-oowaanyokha athiyana. Miyo ka... Miyo vahinkisivela owoona athiyana paahi yeereryaka okhala nipuro nihikhanle nawaya.

Munnuupuwela Ostaleero Howard wenko nno, estaleero emosa yoomalela weetta sana ekhanle Omuro Ohio? Awo amuhelanse muthiyana iwe. Nkawehani etthu yiiraneieye.

Muthiyana ovahiwe ehakhi yoothanla. Nkawehani etthu yiiraneieye.

¹³⁵ Mukihye kooleleni naanaano va. Kahi waakumiha esapala athiyana paahi. Kintthuna wira alopwana esuwele sana wira

ari mwa yeela nave. Masi mukhiye kooleleni etthu emosa, munna. Elapo ela elapo ya muthiyana. Miyo kinimooniherya eyo mwa nyuwo, mwa Yoolempwa, mwa etthu p'itthu entthun'anyu wooniherya-no. Ela e . . . Exeeni enoorwa vamusurukhuni vahu? Muthiyana. Owo oniphwanyaneya yayi? Mwa Wiisuupulula, mu, munoomoona. Owo nummaru muloko ni tthaaru, nave, itthu sothene owo opaceny'awe; ittheneeri muloko ni tthaaru, malepa muloko ni mararu, ikolooniya muloko ni tthaaru. Muloko ni tthaaru, itthu sothene saari muloko ni tthaaru, opacerya wene. Owo onikhumelela mwa Wiisuupulula kapiitulu 13. Muthiyana, muloko ni tthaaru!

¹³⁶ Nto 1933, okathi Apwiya . . . Okathi waarin'ahu mithukumano nno weiwo ekereja ya Kristu ery'aya vano, empa Masoni ya khalayi, yoowoona y'Apwiya yaahikirweela osulu nno khuhimya wira "Alemaanya aamuvenya ohele Mukaano Maginot ule iwe." Anci-ene a nyuwo munnuupuwela yeeyo. Ni moota awo othene yaarow'aya okhala oolipa mme, ni atthu a wAmerika yaarow'aya okuphuliwa omukaanoni weiwe wene. Ni khuhimya-tho etthu yaarowa wiiraneya, ni mwaha wa Roosevelt n'itthu iye, moota aarow'awe oxiraana ni ophwanya oruma wa neexexe. Voolikane-ene, vekeekhai moota yiiraneieye aya. Ni khuhimya-tho wira ikaaro saamutthikela sikhalexaka ntoko nooce, mpakha mahiku ookiserya saarowa okhalana mukhalelo wa nooce. Nto miyo khwira, "Enimwiiraneya wira ikaaro iye khasinrowa weetihiwaka ni evulanti. Enrowa okhala etthu ekina enrowa weettihaka." Ti ikaaro iya awo anikumihery'aya naanaano va, sineettihiwa ni eremoote, wira elipeke. Vekeekhai. Khamunrowa owerya okela muttethe mmosa . . . Vano, nipuro nimosa na imiilya miloko miili [32 Km], munrowa weetaka imiilya muloko miili paahi. Khamunrowa omanana n'ikaaro ekina, 'okhala wira sineettihiwa ni eremoote. Moore, eniireya siiso, ni naanaano va. Nto miyo khwira, "Muupuwele, nihiku nlo, ohinatthi ophiya okathi wookiserya, ohinatthi ophiya okathi wookiserya, wira muthiyana . . . Vano, nyuwo othene mukhalane ela elempwe-ene. Onookhala muthiyana mmosa, muulupale oowerya onrowa okhumelela, wala onrowa okhala Mukhulupale, wala namaruma, wala muthiyana mmosa muulupale oowerya Estadu Unidu ula. Nto mutteth'ola onoomora, mwaha wa mwiirelo w'athiyana. Vano, muupuwele, eyo ti SIISO ANIHIMYA T'APWIYA." Munnona?

¹³⁷ N'uwu oovonya. Nto eyo evaheriwe exeenii? Mukhiye kooleleni. Mukhale a erooho. Muhiye . . . Etaphuwe. Nkawehani. Mwaha wa xeeni eyo wiiraka yeeyo? Wira evahe ekereja Katolika opuro w'okela. Munnona? Nyuwo munaakokhorela aratti ala a isineema ni itthu iya sikina soohiyana-hiyana ota nno. Munnuupuwela mutthaka kaalalenry'aka? Margie, muunuupuwela, iyakha sivinre, mwaha wa—wa otupheliwa wa Estadu Unidu, wira oxintiwe kuveerunu a wAmerika. Ni moota kaahimmy'aka wira owo

aahikhumelela oParis naamanly'ahu owoopola iwe w'athiyana ale, eviinyu ni orukuneya. Vano owo khikhuruwa olukamaka oHollywood. Vano, ohiya hiyo waaruma orowa oParis wira erowele ittharihelo, awo anaaruma orweela ittharihelo nno. Eyo eruunhe exeeni? Ephiyenrye. . .Hiyo khanaahiya an'inyu orowa osineemani, masi owo khukela mutelevisawuni, khutthikela yeetaka khuhonona etthu yothene, khimuhonona. Nto hiyo nri va olelo, axiiruusi othene n'aximiravo, othene anlikana n'aratti awo amutelevisawuni. Exeeni iyo? Eyo entthukula ephiro. Mmiravo, muthiyana mmosa tu oohifayi onniwerya waaroiha atthu anci-enexa omooroni ovikana mapantta othene onihapaleiwa-mo mmuttettheni. Eyo ekeekhai. Mmuweheke aarowaka mphironi orunle-ene ikuwo sothene, voochicala wira mulopwani xeeni, owo akhalaru mulopwana orina ekumi yooloka, okathi onimuweh'awe muthiyaw'owo enoomuphwanya etthu enrowa omuvira. Vano mukhale naxariya paahi. Khenikicala. . .

¹³⁸ Miyo kinnikhalana Eroho Yowarya miyaakha sene. Khivanweryaneya omuweha muthiyana n'uwo owanre-ene nuusu. . .Miyo—miyo kinikuxa mwiikimanyo mwaamukhaani mukaaroni mwaka, anci-ene a nyuwo muhoona. Ookhala aakiirenle wira, “Nyuwo mwa muKatolika?” Vatthu xeeni aKatolika yaatonko aya othanla mwiikimanyo? Mwiikimanyo onihimya “muKristu.”

¹³⁹ aSesiiliya Oowaarya awo axikhani a khalayi ni itthu ti siri ekanyeryo y'eKatolika. Hiyo khinnaamini itthu s'elolo ntoko iyo. Hiyo nnimwaamini Kristu. Awo aakhalana mithinto sothene s'atthu akhwiiye awo anaakokhorel'aya. Owo ti mukhalelo wootepa w'olapela minepa. Eyo ti yothene ekhanle, waakokhorela alipa-ookhwa. Khekanle etthu ene eyo, nnari.

¹⁴⁰ Miyo khimukoha phaatiiri ule. Miyo khwira, “Mwaha wa xeeni, nto, vakhala wira. . .Petru aari paapa oopacerya?”

Owo khwira, “Ti yeeyo.”

¹⁴¹ Miyo khwira, “Vano mwaha wa xeeni Petru iiraly'awe, 'Khaavo hata mulipa-oolapelela mukina eriyari ya Muluku n'atthu woohikhala Mutthu ene yoowo Kristu Yesu'? Vano nyuwo murina athiyana ikonto thanu akhwiiye, n'itthu sothene sikina, nyuwo munaakhalih'anyu alipa-oolapelelela. Vano exeeni ekhumelenle?” Eyo eri vo. Awo kharina hata enamuna yo waakhula yeeyo. Ekeekhai.

¹⁴² Vano miixuttiho saya kamosa-kamosa, mwiixuttiho aya woowootha, nikhuru na maprofeta maPrustante oowootha anoorwa ni wiixuttiha yeeyo, ni nyuwo maPrustante munimirya yeeyo. Eyo ekeekhai tu. Miromolelo ni inamuna s'opatiiso, ni malamulo oohiyana-hiyana n'itthu sinrowel'anyu, seiyo vekeekhai sihikhanle Yoolempwa. Iyo sinnivirikanya, mwa

Yoolempwa, enamwi nyuwo muthipelelaka yeeyo. Eyo ti ekeekhai.

143 Vano nwiriyane ela mwaha w'athiyana alaleyi. Vaareera. Timoteyo oopacerya, kimmuthuna Timoteyo Oopacerya 2:11. Vano nwiriyane etthu Eyo enihimy'aya va.

Athiyana yiixutteke eryeene oomaala ni wiiwelela waya wothene.

Nkinaahiya athiyana wiixuttiha, wala omuruma ij'aya, masi ekhaleke oomaala.

144 Miyo nkihiyo kinthokorerya ohela eyo mmo. Miyo kinthokorerya wooleelani wira eyo eri memmo. Munnona? Munnona?

Athiyana yiixutteke eryeene oomaala ni wiiwelela waya wothene. (Mwaatonko ene ovolowa mukereja Ortotokisa khwaaweha, moone. Munnona?)

Masi nkinaahiya athiyana wiixuttiha, wala omuruma (okhala pastore, tiyaakono, wala etthu p'itthu ntoko yeeyo) ij'aya, moone, omuruma ij'aya, masi ekhaleke oomaala.

Maana Adamu t'upacenrye opattuxiwa, nuumala khupattuxiwa Hawa.

145 Mwaahisuwela? Vano nwiriyane, athiyana. Nyuwo athiyana, ooreera murima aKristu ni axariya mwa etthu yooreerexa Muluku aakhanly'awe oomuvahaka mulopwana, ahiiso Owo aarowa omuvaha etthu ekina yoovirikana. Ayo, mulopwana. Munnona? Muthiyana hata khaakhanle mopattuxiwani woopacerya. Muthiyana kahiyo muhokorokho woopattuxiwa ni Muluku. Owo epantte ya muhokorokho wa mulopwana. Muluku aamupattunxe mulopwana, oowaili mulopwana ni muthiyana. Vano Owo khwaavalaanya. Nto mulopwana otonko ene okhala mulaponi khuvaha masina inama, ni khukhala mu okathi muncie-ene, Owo khikuxa niparari mw'Adamu, ntoko epantte ya muhokorokho, khumpaka muthiyana ni yeeyo. "Adamu t'ari oopacerya opattuxiwa, vano khunarwa Hawa." Vano nwehe.

Ni Adamu khootothiwe, masi muthiyana tootothiwe nto vootothiw'awe khumorela moothekani.

146 Muluku khimukuxa mulopwana. Xetwani khimukuxa muthiyana. Nwehe yeeyo, ohoolo wene, etthu eniiriha yeeyo olelo. Nkawehani Ekereja y'ekeekhai ya Muluku, enimwiira, "Yesu!" Nwanani a Kristu onrowa wira, "Maria!" Nkawehani irooho iyo. Munnona? Iyo siri vo. "Mutteeliwe Maria, mai a Muluku, ooreeriwa ti nyuwo mwa athiyana othene, ni munivekelele hiyo anatampi vano, nihiku ninkhw'ahu. Amen. Maria, ovekelela!" Oh, wulu, Muluku aka! Moone, eyo eri vo, "muthiyana," etthu ya xetwani. Kristu, etthu yookokhorela, ni mmose-ene Yoowo! Eyo eri vo. Eyo eri vo.

¹⁴⁷ “Adamu t’upacenyere opattuxiwa, nuumala khupattuxiwa Hawa.” Adamu khootoziwe. Nto vanweryaneya sayi okhalana pastore muthiyana, tiyaakono muthiyana? Adamu khootoziwe, masi muthiyana tootoziwe. Owo vekeekhai aari. . . Owo khuupuwenle wira aahivonya, masi aahivonya. “Muthiyana tootoziwe khumorela mootthekani.” Okhala wira, owo, khula okathi o—ovitha onivir’aya mphironi, ti muthiyana okhumelelinhe. Khula okathi mwaana onlaly’awe, muthiyana t’okhumelelinhe. Khula okathi okhwiy’awe mutthu, muthiyana t’okhumelelinhe. Khula maihi oottweelela, muthiyana t’okhumelelinhe. Itthu sothene, ni okhwa, muthiyana t’okhumelelinhe. Itthu sothene siri sohiloka, muthiyana t’okhumelelinhe. Vano nlelo onikhalihiwa mukhulupale a ekereja, pastore, oh, piixipu imaara sikina. Ti yoowuliha muru.

¹⁴⁸ Vano mukihye kookhunleleni ila, ekina, minuutu mmosa paahi. Munnona? Vano nrowe nikhunle mwa aKorinto Oopacerya 14:32 vo, noone etthu Paulo enihimy’awe va, vano nto nnoorowa mwa sikina kamosa-kamosa, minuutu mmosa paahi. Vano nto khanintthuna woopisihani vanci-ene, wira mukhulumuwe mpakha vahinrow’anyu ohokolowa voosiisu. Vaareera. Kintthuna kisome. Akavi anaamini wira Paulo aari muxuttiha oowupululeliwa? Vano, muupuwele, Paulo aahimulepela yeela Timoteyo nave. Munnona? Eyo ti, vano, aKorinto Oopacerya 14:32. Vano nrowe nipacerye vaava va, nipacerye osoma va, 14:34, kookupali.

Athiyana ekhaleke oomaala mukereja: . . .

¹⁴⁹ Muhiiwa etthu ohimmy’awe?

Athiyana ekhaleke oomaala mukereja: okhala wira awo khandthunihiwa olavula; nto ekhaleke oowiiwelela, . . .

¹⁵⁰ Moosoma elempwe mukerekhere mwaha wa yeeyo? Mwaasomme-ene, murowele enikhum’aya moone sinto khenikuxa Maphattuwelo 3:16. Okathi Muluku omuhimenry’awe Hawa, okhala wira owo aaiwelenle enowa waahiya aiy’awe, wira awo jaarowa omurumaka mahiku othene a ekumi awe. Vanweryaneya sayi muthiyana orwa n’umuruma mulopwana, okhala pastore wala tiyaakono muthiyana, Bibilia ohimye-ene wira owo okhaleke “oowiiwelela,” vekeekhai ntoko saary’aya wopaceryani? Okathi Owo. . . Muluku—Muluku khokhanle oorukunuwa. Nyuwo khamukhanle oowiriha Masu ohimya etthu emosa va ni etthu ekina va. Awo khaniira eyo. Enikhala etthu emosaru okathi wothenene.

¹⁵¹ Tivo, wopaceryani, ti vaavo, ela ehinatthi omala, kakhalanaru okathi, kintthuna koolakiheryeni sana mwah’ole wa *Othelana Ni Omwalana*. Miyo nkinaire eyo mukereja mu nlelo. Masi nkawehani waataana nno vaili. Mmosa onihimya wira muthiyana pooti otheliwa; mukina onihimya wira

ohitheliwe; ni ola onihimya *ela, ele*, wala *ekina*. Nwehererye minuutu mmosa paahi moone etthu Bibilia enihimya'awe, naphiyeryaru yeeyo. Munnona? Vaareera. Vano nwehe va.

Athiyana ekhaleke oomaala mukereja: . . . awo khandthunihiwa olavula; nto ekhaleke oowiiwelela, nave-tho ntoko sinrum'aya ikano.

¹⁵² Vano, mwa Waataana Wa Khalayi, awo khiyaatthunihiwa olavula, 'okhala wira Paulo oohimya va wira khiyaatthunihiwa. Eyo ekeekhai? "Athiyana ekhaleke oomaala. Iwo wiiwelela." Vano mwaatthuna otthikela osoma elepelo ya mukerekhere vale, eyo enimookholoxeryani mwa Maphattuwelo 3:16. Munnona? Vaareera. "Vathi, ntoko vathi va ikano."

Nto awo yaapha . . . wiixutta etthu ekina, ehiyeke yawaya . . . yaakoheke—yaakoheke axiiyaya . . . owaani: okhala wira ti yoowuliha muru wa muthiyana olavula mukereja.

Khino? . . .

¹⁵³ Vano nwehe nlepa nlo n'okoha mwa khula mmosa a aBibilia anyu, mwa yeeyo, "Khino?" Exeeni yaamwiirinhe Paulo ohimya yeeyo ni wira siiso? Vano, vaakhanle wira mwaahinto owerya ophwanya ipaphelo aKorinto yaamulepenly'aya Paulo. Vano, vanniweryaneya ophwanya seiyo mpiipiyoteka mooreera, moone, seiyo aKorinto yaamulepenly'aya Paulo. Awo yaaroolepa khimuleela, vaamanly'aya athiyana ala orukunxa murima . . . Awo jaarina mu—muluku muthiyana iwe, iihaniwa "Tiyana." Nto owo aari a oEfesu, nave. Ni aKorinto yaamukokhorela yoowo, 'okhala wira waari okokhorela w'epakawu. Vano awo khuphwanya mwala mmatta nihiku nlo, waalattana ni mukhalelo wa muthiyana. Awo khwira, "Muluku muthiyana, vano owo oroomoroxela elatarato awe wa hiyo." Nto emp'aya y'okokhorela—mo yaari yuulupalexa ovikana empa ya Salomoni, ahimye, t'alipa—oomulepa wahala. Oh, yothene yaari ya myala, yooheliwa malepa a eweero; vaavo, empa ya Salomoni yaapakaniwe ni seeturu, yooheliwa malepa a eweero. Munnona? Nto yaari yuulupalexa ovikana yeeyo. Vano eyo, nto, vaakhanle wira Muluku aari mu—muthiyana, vano, vekeekhai, owo aamukhalana anamukottho athiyana. Vekeekhai, vakhala wira Muluku muthiyana, weso muthiyana mulaleyi vaalikana. Masi, Muluku Mulopwana. Bibilia ohimye wira Owo aari Mulopwana, ni Owo Mulopwana. Munnona? Nto vakhala wira Muluku aari Mulopwana, nto ohaana okhala mulopwana.

Vano nwehe va, "Khino?"

¹⁵⁴ Vano, amosa—amosa w'axithiyana ale anamukuttho, okathi arukununx'aya murima okhuma epakawu khukela eKristu, awo yoona wira vaamuweryaneya otthikela muteko aya ntoko mulaleyi, orwa va paahi. Vakhala wira yaanilaleya iwe mwaha wa Tiyana, awo anoorwa nno n'ulaleya mwaha wa Kristu.

155 Owo ohimnye wira, “Khino? Masu a Muluku akhumme . . .” Nwiriyaane Ela paahi. Munna, anwerya sayi arumeyi wira yeeyo? Eversiikulu 36.

Khino? masu a Muluku akhumme wa nyuwo? wala awo arwiiye wa nyuwo meekhiinyu?

Akhala mutthu onuupuwela okhala profeta, wala a erooho (khivantthuneya hata okhala profeta; mutthu a erooho ni onuupuwela paahi), asuwele wira itthu sinoolepel’akani ti sooruma s’Apwiya. (Munnaamini yeeyo?)

Nave owo, akhala mutthu ohinsuwela, owo ahisuweleke.

156 Vano, ela eri yowiiwanyeya ntoko sinsuwel’aka okhaliha. Munnona? Owo ohimnye wira, “Akhala mutthu a erooho, wala profeta, owo onoosuwela wira enlep’aka va ti Sooruma s’Apwiya.” Masi khwira, “Owo a—owo aarowaka okhala oohisuwela, ahisuweleke paahi.” Munnona? Ti etthu emosa mukhanly’anyu wiiraka. Awo yaatthunaka okelela ohoolo ni yeeyo, mwaahyeke paahi eroweke, ’okhala wira owo aahoona eyo epaceryaka iwe.

157 Nto athiyana kamosa-kamosa yaahikiirela, khwira, “Oh, Paulo aari mulipa-oowaanyokha athiyana paahi a khalayi.”

158 Owo khaari mulipa-oowaanyokha athiyana. Moosuwela, Paulo aari murummwa, ni a Ekereja y’Amalapo. Nkawehani va. Mwaahisuwela wira Paulo . . . Akavi anaamini wira ti yeeyo Paulo aalaley’awe? Ti yeeyo owo—owo ohimmy’awe va? Nto Paulo ohimnye wira . . .

159 Nyuwo muniira, “Ahe, nwehererye minuutu mmosa vano, Munna Branham. Minuutu mmosa paahi! Vano, pixipu ahu onihimya wira ti yoolikana. Mulipa-oowehexa a atthu othene, Asempeleya, onihimya wira ti yoolikana. Pixipu a Unisista onihimya wira ti yoolikana.”

160 Miyo nkincala etthu awo anihimya’aya. Ti yoowoothiwa! Miyo kaahooleelani wira naamurowa okhanyereriha ela voolipavo. Ni maprofeta oowootha yaamurowa ohimya siiso. Maana Bibilia ohimnye wira, “Akhala mutthu onuupuwela okhala a erooho, wala profeta, asuwele wira etthu enihimya’aka ti Sooruma s’Apwiya.” Nto erooho awe yaahikhaleleke onamoona Masu awo, owo profeta oowootha, opacerya wene. Kaamuthanla okhala mulipa-oowaanyokha athiyana ohikhanle mulipa-oowaphenta athiyana, ohikhanle weettiherya ololo ntoko owo, ovilela elolo ntoko eyo Mukereja mwa Muluku, yoovirikana ni sooruma sa Muluku. Ni Paulo ohimnye wira . . . Mwaakuxe aKalasiya 1:8. Paulo ohimnye wira, “Nakhala Nlaikha nnikhuma Wirimu nnoolaleeryani ehapari yooreera envirikana n’ile yoolaleny’akani, atakhaliwe.” Vano munrowa wira exeeni mwaha wa Yeeyo?

161 Vano nyuwo muniira, “Ankhi vatthu Awo ahimmy’aya wira, ‘An’inyu alopwana n’athiyana anoolavula s’eprofeta,’ mwa Yoweli, ni—ni vatthu Petru ohimmy’awe Nihiku na Pentekosite?” Eyo ekeekhahi voolikana ene.

162 Mwaanisuwela wira, mwa Waataana Wa Khalayi, wira enamuna emosa paahi, ni enamuna emosa paahi vano, mutthu onwery’awe okela mowaataanani, mwa, ni . . . Abrahamu aari ole aavahiwe natiri, nto e—ekanyeryo ya natiri yaari mwaha w’olyihiwa masoma. Akavi ansuwela yeeyo? Owo aari Muluku alipiheryaka.

163 Ntoko munna mmosa muPatista, owo iirale, “Munna Branham, vano, hiyo aPatista nihaakhela Eroho Yowarya.”

Miyo khwira, “Mwaakhenle liini Yeeyo?”

Khwira, “Okathi naaminni ahu.”

164 Miyo khwira, “Paulo ohimmye wira, ‘Muhaakhela Eroho Yowarya okhuma okathi mwaaminni anyu?’” Munnona? Miyo khwira, “Vano, nyuwo aPatista murwe mwaakhele vakhani ya Yeeyo, ni nnoolavula vakhani mwaha wa nrromelo Ohinimala ni nyuwo.” Miyo khwira, “Masi, ahe, ti vayi muniw’anyu Yeeyo siiso?” Munnona?

165 Owo iirale, “Muhaakhela Yeeyo *okhuma* okathi waaminni anyu?” Awo yaari alipa-oowaamini, ni yaamanle okhuwela n’utthapa n’itthu sothene sikina. Awo yiira ehaakhenle Eroho Yowarya nlelo. Paulo ohimmye wira khiyaakhenle. Munnona? “Muhaakhela Eroho Yowarya okhuma okathi mwaaminni anyu?”

Awo khwira, “Hiyo khanisuwenle sinto yookhala Eroho Yowarya.”

Khwira, “Vano mpatisiwe sayi?”

166 Awo khwira, “Hiyo noopatisiwa.” Masi, voowootha, moone. Tivo owo aahaana opatisiwa, emaara akina. Vaareera.

167 Vano nwehe ela vano, wira athiyana yaala alaleyi, okathi akelans’aya, yuupuwela wira yaamukhalana okhulupale aya. Masi khivanthunihiwa nnakhala ni Muluku wira siiso. Nto muhiye . . . nryeene va mwaha yoola va paahi, athiyana ala, moone. Nto eyo, vano, owo ohimmye wira, “Akhala mutthu eriyari anyu, ori a erooho, wala profeta, asuwele wira enlep’aka ti Sooruma s’Apwiya. Masi aahisuwele, ahisuweleke paahi.” Nto mwaha wa yeeyo e . . . etapernakulu ila kheneemererya ni khenaakhaliha athiyana alaleyi, athiyana matiyaakono, wala etthu p’itthu ya muthiyana wira ovareke ntoko muteko wa ekerej’ela, okhala wira Yoolempwa ela enniisooniherya va ni ti yoosuwanyeya.

168 Vano, Bibilia oohimya, “An’inyu alopwana n’athiyana anoolavula s’eprofeta.” Vano, nuulumo olavula *s’eprofeta* nihimya exeeni? Nwehe. Ti “ohimya etthu, ni muupuxeryo,”

wala “ohimya etthu khalayi ene.” Nlo nuulumo nootakaniheriwa.

¹⁶⁹ Ntoko *oreerihwa* nnihimya okhala “ookukutthiwa, ni opwehiwa epantte wira evareliwe muteko.” Munnona? Wala, nlo nuulumo nootakaniheriwa, nnihimya etthu yovikana emosa, ntoko sirin’ahu yinci-ene yeeyo mw’Enkelesi va.

¹⁷⁰ Ntoko, naalavulaka nuulumo “board.” Ahe, *board* enihimya exeeni? Nyuwo muniira, “Ahe, owo onihimya wira ooliva *emakelo* awe.” “Nnari, nnakhala. Owo ohimmye wira *oothipa* nllitti.” “Nnari, nnakhala. Owo ohimmye wira *oroomunanariha*.” Wala, moone, nuulumo nimosa paahi, muhaana osuwela etthu enihimy’anyu. Munnona?

¹⁷¹ Nto ti siiso ery’aya ni nuulumo nootakaniheriwa, vahimmy’aya, “An’inyu alopwana n’athiyana anoolavula s’eprofeta.” Vano, enamuna emosa paahi Muluku . . .

¹⁷² muPatista ola khwira, “Ahe, hiyo nihaakhela Eroho Yowarya.” Miyo khwira . . . “Nto okathi naaminni ahu yeeyo.” Miyo khwira . . . Vano, moone, owo khwira, “Muluku aamuvanhe Abrahamu e . . .” Khwira, “Abrahamu aahimwaamini Muluku.” Eyo t’inamuna owo ohenly’awe eyo. Owo khwira, “Abrahamu aahimwaamini Muluku nave siiso khukhalihwa naxariya.” Akavi ansuwela wira eyo ekeekhai? Vano nkawehani moota—moota Satana onwery’awe omuthepya munna vookhweya-vo. Moone, vookhweya-vo paahi. Vano, eyo ti Yolempwa.

¹⁷³ Munna, kinimooleelani, ela osulu nno, nyuwo mwaahaana oreerihwa muhinatthi okela mwa yeela. Mwaahaana okela nipuro na siiri n’ulompa. Atthu aniira, “Muhinkhumelani ota n’uwoona atthu?” Munna, vakhala wira munrowa owoona atthu wala owiixuttiha, vanreerela mukhale meekhiinyu, ni Muluku, okathi vakhani, ’muhinatthi okela vapulpitu vale. Vekeekhai, moone, ’okhala wira Satana mulavilavii, mulavilavi sana.

¹⁷⁴ Owo khwira vano, nwehe, owo khwira, “Abrahamu aahimwaamini Muluku, nave siiso khukhalihwa naxariya.” Eyo ekeekhai. Owo khwira, “Vano, exeeni tho Abrahamu okhanly’awe wira woohikhala waamini?”

Miyo khwira, “Eyo ti yothene aawery’awe wira.”

¹⁷⁵ Owo khwira, “Exeeni tho mukhanly’anyu wira wala mutthu ti mutthu mukina woohikhala waamini?”

¹⁷⁶ Miyo khwira, “Eyo ti yothene okhanly’ahu wiiraka. Masi nkawehani, munna, vano Muluku khwaataana, ahiiso khikupali waamini w’Abrahamu. Owo khunvaha ekanyeryo, ethoonyeryo ya olyihiwa masoma, ntoko ekanyeryo yo waataana. Munnona? Owo aahinvaha. Owo khwira, ‘Vano, Abrahamu, Miyo kinookupali waamini wanyu, tivo kinrowa woovahani ethoonyeryo vano wira koowaakhelani.’”

¹⁷⁷ Vano Owo aahimulyiha masoma Abrahamu, nto eyo yaari ekanyeryo yo waataana. Nto vano mahiku ala... Vano, muthiyana khaakhala mowaataanani mme; muthiyana ootheliwa paahi. Mphwanye, khivaaweryaneya muthiyana olyihiwa masoma; vano, awo yaahaana okela, tivo owo n'aiyawe ari mmosaru. Awo kahiyo-tho aili; awo anri mmosaru. Akavi ansuwela yeeyo? Yoolempwa enihimya siiso. Tivo, owo akhalaka ootheliwa, nto owo—owo onikhala mmosaru. Nto mukhuruwele vathi va nwehe wa mwa Timoteyo, ohimmye etthu emosaru, ohimmye wira, "Vano onimooopowa mwaha w'okhala maama, aakhalelaku nithiti wiisumaaliha mwa waamini ophenta n'ureera murima."

¹⁷⁸ Vano, masi, nto, olyihiwa masoma wa Waataana Wa Khalayi waari veerutthuni, masi Waataana Wa Naanaano, Yoweli ohimmye wira, "Kinimwaamwaraxela Eroho Aka atthu othene, ni an'inyu alopwana n'athiyana anoolavula s'eprofeta." Vano, nuulumo olavula s'eprofeta khannihimya wiixuttiha. Olavula s'eprofeta enihimya wala "ohimya musuwelelo, vathi va muupuxeryo," wala "ohimya khalayi ene etthu enihala okhumelela." Ni hiyo noosuwela wira yaahikhala maprofeta axithiyana Waataana wa Khalayi. Awo khanatoko olavula mpaani, olavula mukereja, mmuthukumanoni, ntoko muxuttiha. Masi owo, Ana, ni anci-ene aya mpaani m'okokhorela, yaahikhala maprofeta athiyana, ni awo yaari... Miriyamu aari profeta muthiyana, wala etthu ntoko yeeyo. Owo aahikhalana Eroho mwa yoowo, eyo ekeekhaii, masi aahikhalana mikhottiheryo sawe sa nipuro nlo. Athiyana anoowerya okhala maprofeta olelo, vekeekhai; masi kahi awiixuttihi, ni sikina, ottuli w'eplataforma va. Mwaairaka, munimwiiriha—munimwiiriha Bibilia ola wiivaanyiha Mmansawe. Khivanweryaneya Bibilia ohimya etthu emosa va, ni etthu ekina va. Ohaana ohimya etthu emosaru okathi wothene ahiiso Awo kahiyo Masu a Muluku. Munnona? Tivo, "An'inyu alopwana n'athiyana anoolavula s'eprofeta," enihimya wira awo "anoohimya khalayi ene" wala "ohimya onamoona." Vano, mphavele yeeyo, ni mmukuxe tisiyonariyu a Bibilia moone yahaakhanle ekeekhai. "An'inyu alopwana n'athiyana anoolavula s'eprofeta."

¹⁷⁹ Vano, Bibilia onnilavula-tho mwaha wa muthiyana aaipaka, siiso, wala aahimya wira owo...Ela yaamuvara etthu ni ekereja Katolika, nave-tho yaamuvara ni...ni mwah'ola ninrow'ahu olavula vano. Nrowe nikhunle muLiivuruni mwa—mwa Wiisuupulula, nikuxe e—ekapiitulu 2 ni eversiikulu 20, niry'ene vaava vakhiviru va yeeyo, wira nwehe va ni woona paahi moota vanweryaney'aya etthu iyo okhala y'exetwani, y'olavula mahiku ala ookiserya enrowa wiiraneya, moota iya...moota onrow'awe okhala muthiyan'ola. Muupuwele, ekereja Katolika muthiyana. Hiyo nnoomalaru osoma eyo, kahiyo? Nwiriyaneya ela vano, moota Eyo enihimya'aya. Wiisuupulula 2:20, "Vano

yookhala. . .” Owo onlavula n’ikerej’ela ya Tiyatira, moone, “Vano yookhala. . .” Yeeyo ekhanle ekereja y’okathi w’eriyari vo, evinre Okathi w’Epiphi.

Vano yookhala *etthu enookhupanyakani, okhala wira nyuwo munninvilela Yesapeli, muthiyana yoole oniipaka okhala profeta, wira owiixuttihe ni. . . waathweeleliha arumeyi aka ni wira eraruweke, n’ulya itthu sivahiwe amuluku a ethiru.* (Munnona?)

¹⁸⁰ Vano, vakhala wira mootoko oweha, nwehe okathi ula wa ikereja, nto ninoomaliha. Vano voosiisu ninrowa okuxa itthu iya sikina. Nwehe. Mo. . . Vathi va—va mithuko sa eweero sa empa y’eYuta, mpaani, waattamela mikatthe soohikhala miropo ni sikina, saahikhala mithuko mithanu na miili sa eweero. Othene anyu munnisuwela eyo. Munnona? Siri okathi mithanu na miili sa ekereja. Eyo enihimya okathi mithanu na miili, waarya. Vano mwaweha vale mwa Wiisuupulula 1, ninnimuphwanya Yesu eemenleene m’okathi mithanu na miili sa ekereja, mithuko mithanu na miili sa eweero, okathi owo orukunun’awe khimoona Ole ntoko Mwaana a mutthu, eemenle, aawanre ntoko saary’awe. Aari Mwaakameliwa eemenle muhina mwa mithuku mithanu na miili, aakumihiwe.

¹⁸¹ Vano, Waataana Wa Khalayi, awo yaakuxa e. . . muthuko ola mmosa, n’upattiha, okuxa muthuko mukina n’upattiha wa yoola, n’upattiha mukina, mukina va mukina, siiso, mpakha omaleliha mithuko mithanu na miili.

¹⁸² Mwaweha vale, wopaceryani, okathi Muluku opaceny’awe ovara muteko n’aYuta, nto awo khuvira ekhatiri ya eweero. Vano nto okathi wooriipelexa sa milaihano s’aYuta, Muluku aarin’awe n’aYuta, waari moomweneni mwa Akhabi. Nto nyuwo mwaweha vale sana, musomaka okathi uwo wa ekereja vo, wira Owo onthikhela yeeyo tho. Owo ohimnye wira, vano, “Itthu vakhani ottuli,” ni khwira. . . Vano, Okathi ene yoole w’Epiphi, iyaakha ekonto ni imiya thanu iwe, wala okathi w’Akhabi, toko, ni aYuta. Okathi wooriipelaxa awo yaarin’aya, okathi Akhabi omuthenly’awe Yesapeli khuruuha waakokhorela amuluku a ethiru wIsarayeli, khuwiiriha atthu othene omukokhorela Akhabi. . . muluku a Yesapeli. Nyuwo munnuupuwela, wira awo yaahikuxa, yaatenke itakhwa, khwaapwexakasa altaari a Muluku. Vano Eliseyo khikhuwelela, owo aari “mmosa tu,” ni Muluku aahikhalana imiya thanu na piili yahaatonko omukokhorela Payali nlelo. Munnuupuwela yeeyo? Eyo ti ethoonyeryo ya Ekereja yoothanliwa enikhumelela. Munnoona vo? Munnoona moota ery’aya?

¹⁸³ Vano, ekerej’ela, nyuwo mwaweha vale ekereja yoopacerya, ekereja yoopacerya, ekereja ya wEfeso, yaari ekereja yuulupale. Owo iirale, “Nyuwo mookhalana muthuko, nlelo.” Nto nyuwo mwaweha vale, khula ekereja, khupacerya ovukuwa waarya waya, ovukuwaka, ovukuwaka, mpakha ophiya oTiyatira. Vano,

iyaakha ekonto n'imiya thanu. Vano Owo khurwa epantte ekina, "Murina waarya vakhani paahi. Mulipiherye yeeyo murin'anyu, wira muthuko anyu ohikumihawe." Nto khutthikela erowaka mpakha okathi wa ekereja y'oFilatelfia, nuumala mpakha okathi wa ekereja ya Lawotiseya.

¹⁸⁴ Vano, va ti vari oreera waya. Oh, wulu! Miyo okisivela ela paahi, Munna Smith. Moone, nkawehani ila. Vano, mwa okathi *yoola* wa ekereja, ntoko sivinry'ahu. . . Vano nwehe ela. Okathi woopacerya wa ekereja waari Efeso, okathi wa ekereja y'oEfeso. Vano, khula mmosa wa okathi ule wa ekereja, mpakha ophiyerya iyaakha iya ekonto n'imiya thanu, mwaweha vale. . . Musome yeeyo vano mwarowa owaani ohiy'ula, mwakhalana okathi, wala oxaka-ene voosiisu, muhinatthi orwa okereja, ekapiitulu 1, 2, ni 3 sa Wiisuupulula. Munooophwanya wira, khula mmosa wa okathi ule wa ekereja, Owo ohimmye wira, "Mookhalana ikuru vakhani, ni khamukhontte Nsina Naka," mpakha Owo ophiyerya iyaakha iya ekonto n'imiya thanu sa Tiyatira, Okathi w'Epiphi. Vano Owo khurwa epantte ekina, khwira:

. . .mookhalana *nsina wira* mwa mukumi, masi *muhookhwa*.

¹⁸⁵ Nto iya, khiwaavo hata mmosa wa okathi iya mikina sa ekereja, ola wala okathi wa ekereja ya Filatelfia, khonathikeleke okuxa-tho Nsina nle. Khonakuxeke Nsina nle, 'okhala wira nlo naahikhuma-mo okathi ene yoowo. Vano, oh, moota naarow'ahu owerya ohela yeeyo mwa miixuttiho iyo soowootha vano, vaavale vale, owoonihani wira owo ti mai, ekereja Katolika, mai a yothene eyo, moota owo okhanly'awe "mai, mwiiriirya, Papilooniya." Ni ti yeeyo, nkawehani, okathi ula wa ekereja va vakhumelenly'aya, eyo yaahikhalana waarya vakhani, vano khunarowa ottiphaka, ottiphaka, vano nto khukela mmutthenkesoni ottuli nno, iyaakha iya ekonto n'imiya thanu. Nto eyo enikhumelela vano, kahi ntoko Ekereja y'Apwiya Yesu Kristu, masi ntoko ekereja Katolika. Lutero aakhumelenle sayi? Ntoko ekereja Luterana. Patista ekhumelenle sayi? Ntoko ekereja Patista. Kahi Nsina Nawe, kahi Nsina Nawe; nsina nikina, "mookhalana nsina." "Maana vathi v'Erimu khanivo nsina nikina nivaheriwe ninwerya owoopolani, ti Nsina na Yesu Kristu paahi." "Mookhalana nsina wira mwa mukumi, masi muhookhwa," eyo ti ni muromolelo owo.

¹⁸⁶ "Oh, miyo ka muPrespiteriyaano," nto muhookhwa! "Oh, miyo ka muPatista," nto ookhwa! Nyuwo munikhala mukumi paahi mwaphiyeryaru okhala mukumi mwa Kristu Yesu. Eyo ekeekhaii. Opatiiso anyu woowootha, opatiiso, wa maasi woowootha; omiserya, oyeeherya, ohiya opwiniha; muromolaka "Tithi, Mwaana, ni Eroho Yowarya," ohiya ni Nsina na Pwiya Yesu Kristu. Itthu iyo sothene soowootha sittharelaka, Bibilia olavulaka, ntoko omwaraxela mwa yeeyo volipaxa ntoko sinweryaney'aya. Nto va hiyo nnoovilela vamosa ni yaawo, "Ahe,

ekerej'aka enaamini Iyo enamuna *ela*." Masi Bibilia onihimya *Ela*. Munnona? Khasiivo itthu iyo. Khasikhanle itthu sene iyo.

¹⁸⁷ Ni khanivo hata nipuro nimosa mBibiliani awo atonko aya wookola nlumi naya ni waakhela Okaristiya woowaarya, nto phaatiri khiwurya eviinyu ni wiihana eyo Eroho Yowarya. Awo khanatoko mBibiliani ovahana mukhono ni ovahanana ntata noolopwana n'opatthani, ni wiihana eyo Eroho Yowarya. Khonakhaleke mutthu otonko ovenya ni wira, "Vano miyo ka mulipa-oowaamini," ni waakhela Eroho Yowarya. Vakhala wira yaahiiraneya, va ti vari enamuna Miteko 2 aarow'awe osommwa, "Nto vaphin'ye aya Nihiku na Pentekosite, mphironi aahirwa phaatiri muRooma, ni aarina mukala awe wookhuniwa. Owo khwaattamela, khwira, 'Othene anyu mookole malumi anyu vano mwaakhele Okaristiya woowaarya, ekomunyawu yoopacerya.'" Eyo khiyaarowa okhala enamuna y'osoma Miteko 2?

¹⁸⁸ Ahe, nyuwo maPrustante moovonya nave. Mutthikele vale mwiire, "Vano hiyo nnoowaattamelani nyuwo aMetotista; mwaahелеle ntata noolopwana, wala, mwaavahe ntata noolopwana n'opatthani, ni miyeeri mithanu na mosa sa musuwelelo." Munisoma vayi iyo mwa Miteko 2? Munnona? Munikuxa vayi yeeyo? Munnona?

¹⁸⁹ Ehimmye wira, "Okathi yiir'aya ethukumanne-ene othene nipuro nimosa, ni wiiwanana!" Khonarweeke pixipu khwira *ela*, ni khonarweeke hata phaatiri khwira *ela*. "Masi waahiiwanyeya oruma okhumaka Wirimu ntoko epheyo enoopa n'ikuru, yaasanrye mpa mothene mwaary'aya." Eyo p'inamuna awo yaakhelans'aya Yeeyo, ayo, mulopwana, ntoko epheyo enoopa n'ikuru ekhumaka Movuwani. Kahi ya mphironi wala muromolelo.

...mookhalana *nsina wira* mwa mukumi, masi *muhookhwa*.

¹⁹⁰ Moone, iyaaminelo sanyu ni miromolelo soomukumiha Muluku siiso, mpakha, "Hiyo ninaamini *ila*, ni ninaamini wira mahiku a miiriirya aamala." Ti profeta oowootha ole onihimya siiso. Ti profeta oowootha ole onooleelani, wira, "Munoowerya ovahana mukhono ni waakhela Eroho Yowarya." Ti profeta oowootha ole onooleelani wira, "Muhaakhela Eroho Yowarya okathi munaamini anyu." Ti profeta oowootha ole onooleelani wira, "Mwaahaana oyecheheriwa ni omiseriwa ohiya opatisiwa." Ti profeta oowootha ole onooleelani wira "mpatisiwe ni Nsina n'Atithi, Mwaana, ni Eroho Yowarya," ehikhanle hata Yoolempwa emosa enikhaliherya yeeyo mBibiliani. Ti yeeyo. Khiivo hata Yoolempwa mBibiliani enooleelani wira mpatisiweke, vatthu mutthu ti mutthu otonko awe opatisiwa, woohikhala ni Nsina na Yesu Kristu paahi. Awiixutti a Yohani, paahi; ni awo yaahaana orwa, opatisiwa-tho, ni Nsina na Pwiya Yesu Kristu, wira yaakhele Eroho Yowarya. Ti yeeyo. Vano, owo

kahi Mwiixuttiho wa Yesu Paahi. Miyo kinnisuwela Mwiixuttiho wa Yesu Paahi. Kahi yoowo. Owo Mwiixuttiho wa Bibilia. Ti yeeyo.

¹⁹¹ Masi eyo vo. Muniira exeeni ni yeeyo? Awo ari vo ame anyu. Vo ti vari mai a iyaminelo iyo.

¹⁹² Vano, mutthikele oweha mBibiliani mukileele vatthu mutthu ti vatthu otonko awe omiseriwa. Mmetotista, Prespiteriyaano, muKatolika, mukileele vatthu mutthu mmosa otonko awe omiseriwa, mBibiliani. Mukileele vatthu mutthu otonko awe oyeeheriwa, mBibiliani, wira oleveleliwe itampi. Muthoonye. Munniwerya ophwanya yeeyo? Mwaaweryaka, mukirweele, nto kinimweetta mphironi mu nnipawe ottuli waka, ni wira, “Profeta oowootha! Kaahivonya.” Wala, mphwanye nipuro nimoso mBibiliani mothene vaavo mutthu ti mutthu otonko awe opatisiwa ni nsina n’Atithi, Mwaana, ni Eroho Yowarya, enamuna atthu ipursento miloko mithanu na miraru a nyuwo munipatis’anyu. Mukiphwanyerye Yoolempwa emosa vaavo mutthu ti mutthu otonko awe opatisiwa siiso, nto kinoohela nipawe ottuli waka, “profeta oowootha,” ni kinimweetta kikhuruwelaka mphironi siisa sa. Ni mukoonihe vatthu mutthu ti mutthu otonko awe opatisiwa, Mukereja musya, ahaarina y’orwa khupatisiwa-tho, ni . . . kahi ni nsina na “Yesu” paahi, masi ni Nsina na Pwiya’ahu Yesu Kristu. Eyo ekeekhai. Moone yahaari ekeekhai.

¹⁹³ Nto, va, exeeni iyo? Owo aari mai a anamararuwa. Exeeni emukhalinhe namararuwa? Exeeni emukhalinhe namuttompe? Mwiixuttiho awe! Exeeni yaakhalihanse anamararuwa? Mwiixuttiho awe!

¹⁹⁴ Nto mwaha wa yeeyo hiyo nihinvilel’ahu ni miromolelo saya ni makano aya. Hiyo nnikhala ooloka ni Bibilia ola. Nkinsuwela ereerelo xeeni munimutthar’anyu Yoowo, masi munniixuttihiwa Yoowo, khula enamuna. Ekeekhai. Eyo ti yawinyu. Miyo nkikhanle wootharihani Yoowo. Miyo kinwerya wooleelani paahi ele ekhanle Ekeekhai. Mwaha wa yeeyo ehikhalenly’ahu muromolelo. Nkaakhanle—nkaakhanle ootthunaka wiihonona mmansihu okela mw’elolo ntoko eyo, okhala oowiiwelela makano kamosa-kamosa. Kaamuthanla otthara ephiro n’ale vakhani otthanyiwa a Apwiya. Kaamuthanla okhala ooreera ni ooloka vamaithoni va Masu ni Muluku, n’ukhala vaavo ni wira, “Khiivo ephome ya hata mutthu vakuwoni vaka.” Tivo hiyo nnikhala’ahu oBranham Tabernacle. Tivo hiyo nihikhanly’ahu Asempeleya. Tivo hiyo nihikhanly’ahu maUnisista. Tivo hiyo nihikhanly’ahu Yesu Paahi. Tivo hiyo nihikhanly’ahu aMetotista. Tivo hiyo nihikhanly’ahu aPatista. Paahi e—etapernakulu yaamukhaani va. Hiyo khanrina hata muromolelo nnakhala. Hiyo n’atthu ootaphuwa, mwa Kristu. Tivo hiyo nnikhala’ahu ntoko siry’ahu. Ni Muluku onniniireeriha, Muluku onninkhaliherya.

¹⁹⁵ Vano, nnoowerya wooleelani mwaha wa xeeni ninaakhel'ahu ekomunya wu, nnimooleelani mwaha wa xeeni ninrapihel'ahu inawu, etthu nihinaahiyery'ahu atthu waakhela nисуwenlene wira ari mutampini. Tivo, isumana iya piili wala tthaaru sookiserya, kinrow'aka wa mutthu ti mutthu, weiwo munikhalan'anyu manyakunyaku anyu makhaani, nave. Kiviraviraka iwo, mmosa khaalavula ni mukhw'awe, mmosa aammuvira mukina mphironi n'urukunxa muru. Wuuliha muru, wa nyuwo nwunrye muhasa wooreerhiwa wa Muluku ni yeela, valtari va, ni owiihanani axinna alopwana n'athiyana, vano n'umukuxa telefooni ni olavulana pure mmosa ni mukhw'awe. Khamumphwanela wiihaniwa aKristu mwaary'ene siiso. Ekeekhai. Mwiirakamihele atelefooni awo; mwaahiweryeke omulavula sana mutthu, muhilavule nnakhala tu. Muupuwele, Muluku onimookhalihani oowaakhula. Erooho ele yaakhalakaru mwa nyuwo, munnisuwela wira khamukhanle sana ni Muluku. Mwaahooneke . . .

¹⁹⁶ Vakhala wira mutthu oroovonya, mmurowele mwaataane-tho. Mwaahiweryeke waataana-tho, mmukuxe mutthu ni nyuwo. Khivanxankiha Muluku oheettiheryaka Ekereja Awe, 'okhala wira khamuniira itthu sana. Ohiya omukuxa telefooni ni omulavulasa ola, etthu ekhumelenle, ni itiini sikhaani ni sikina, iwo siiso. Ohiya wira yeeyo, muhiniirelani ele ehimmye Bibilia? Aphwanyiwa munna mmosa iraka etthu yotakhala, mmurowele moone sinto khivanweryaneya waataana ni yoowo. "Ahe, vano, awo t'akitthekenle!" Nkincala etthu iiraly'awe, mmurowele mwa khula enamuna! Khehimmye wira owo orwe wa nyuwo. Nyuwo mmurowele owo avonya vale. Nyuwo muniira, "Ahe, awo t'atthenke. Awo yaahaana orwa wa miyo." Eyo kahi ele Bibilia ohimmy'awe. Bibilia ohimmye wira nyuwo murowe wa yoowo. Owo avonya vale, mmurowele.

¹⁹⁷ Vano nto owo aahiwiweleleni, nto mmukuxe mutthu ni nyuwo, ntoko namoona.

¹⁹⁸ Vano nto owo aahimwaakhele namoon'owo, nto mwiire, "Vano kinoomuruuha pastore anyu." Vano nto mmuleele, mwiire, "Kinoorowa ohimya mukereja, nto muhina mwa mahiku miloko miraru okhuma vano, nyuwo axinna mwaahilakiherye etthu iyo. . . Munn'ola va onnitthuna waataanihiwa. Nyuwo khamunthuna. Nto mwaahilakiherye etthu iyo muhina mwa mahiku miloko miraru, vano exeeni enrowa okhumelela? Khamuhiyo-tho mmosa a hiyo."

¹⁹⁹ Bibilia ohimmye wira, "Owo aahiwelele ekereja, nto akhale wa nyuwo ntoko pakawu ni mulipa-oottheke." Moone, munna mmosa aakhalakaru vathi va mukhapelel'ole wa ekereja, Ephome ya Kristu enoomukhapelela. Mwaha wa yeeyo ehinkhalih'ahu ekereja yeettaka ntoko entthuney'aya. Vano, ekeekhai, *Ola* Mwiixuttiho wa aPati- . . . wa ekereja Patista, wala

Tapernakulu Branham va, mwaphiyerya wira yeeyo. Moone, xeeni ohiweryaka. . .

²⁰⁰ Nyuwo munoorwa va, wira, ntoko nlikanyiho, alopwana aili, niireke Leo ni miyo. Nyuwo munootthuna miyo. . . Nto miyo ni wira, “Ahe, awo—awo arookitthekelela.” Eyo khenvirikana hata vakhani. Miyo kihaana orowa mpakha wa yoowo. Ahe, owo ta ekereja yeela. Owo—owo ookhala muKristu. Owo onnaakhela ekomunyawu va vamwaaco ni miyo. Ni hiyo noopatisiwa ni Nsina n'Apwiya Yesu. Nneetta vaxariya-vo, ntoko axinna, mmosa vamaithoni va mukhw'awe, vano etthu enookhumelela.

²⁰¹ Kahi mutthu uwo. Okathi ipursento miloko mithanu na xexe ti xetwani onikela eriyari y'atthu. Kahi atthu ene. Ti xetwani. Nto mwaamuhiyakaru xetwani wira siiso, nyuwo munoomusikuliha munn'inyu. Eyo ekeekhaii.

²⁰² Ahe, yookhala evonyeiye ni Leo ni miyo; nrowe nilakiherye. Nto moonna wira yookhala etthu, entthuneya murwe wa hiyo, mwiire, “Nyuwo amiravo oowaili anyu murwaase va mwiiwanane. Ninrowa olakiherya etthu ila.” Vano, nto, owo aphiya iwe, nto iwe khooniwa wira, nto, hiyo nri va. Miyo kiniira, “Ahe, etthu yoopacerya, hiyo—hiyo naahiweryeke wiiwanana, nto murwe okereja siiso.”

²⁰³ Vano nto mwa—mwaahiire hat'etthu mwaha wa yeeyo, vano, Ephome ya Yesu Kristu enoonikhapelela oowaili ahu. Munnona? Masi nto ka—kankuru uwo a khalayi onoomupacerya kankuru mukina, nto kankuru uwo onoomupacerya kankuru mukina, nto etthu yothene enookhala yoowereiwa, mothene, ekereja yothene. Vano munoophiyerya nipuro vanvolow'anyu mukereja, nto mooriirya sana, vanthuney'aya omuruma namukhora orwa opwexakasa exeelo, 'muthukumano ene ohinatthi okela. Vano, nyuwo moosuwela wira eyo ekeekhaii. Nto yooriirya! Mutthu onookilaathi vale, moosuwela, n'uhihimya hat'etthu nave. “Ahe, hiyo naanikhalaka atthu a erooho.” Ahe, exeeni ekhumelenle? Nyuwo mwaaneetta sana, exeeni mulattu ene? Moone, itampi sanyu sinnoovalanyani. Ni Muluku onimookhalihani oowaakhula yeeyo, axinna. Vano kinoolakiherya etthu ila.

²⁰⁴ Khiivo evonyeiye ni miyo, khiivo evonyeiye ni Leo; ti xetwani okenle eriyari ahu. Eyo ekeekhaii. Mulakiherye etthu iyo. Mmurowele. Vano owo aahiiwelele, wala miyo kaahiiwelele, khula epante, vano muhimye mukereja. Owo aahirwe waataanihiwa ni ekerej'elo muhina mwa mahiku miloko miraru, vano owo ookhuma vathi va okhapelela wa Yesu. Hiyo ninoomuvalula. Eyo ekeekhaii voolikane-ene. Nto nwehe etthu enikhumelela. Mmuhiye Muluku amuttharuxe nto. Kahi mwaha anyu. Nyuwo muhiira vooreera saawery'anyu. Vano mmuhiye Muluku akhale ni yoowo okathi vakhani; Owo onoomuvahererya wa xetwani. Owo onimoorwa nto. Aahirwe vale, ekumi awe enrowa okhala okathi vakhani paahi.

205 Munnuupuwela mBibiliani, vaavo aakhanle munna mmosa ahaathuna okhala sana ni Muluku? Akavi anuupuwela mwaha ene yoowo? Owo aarupa n'ame awe oomuphwanya, nto atthu khayaawerya omulakiherya. Paulo khwira, "Avahereriwe xetwani, wira apweteye." Muniphwanya, mwa aKorinto Aneili, owo aahiilakiherya.

206 Miyo kookhalana munna mmosa, mpatthani ooreera murima, okisivela ohimya nsina nawe va, muuna mmosa mulaleyi. Nto munn'ola mulaleyi, nsina nawe ti Munna Rasmussen. Anci-ene a nyuwo arumeyi mukilanthé va, ohiy'ula, nsina nawe nri mpapheloni mwanyu. T'ule eriyari ya miromolelo oChicago. Nto nkawehani. Owo aahikhalana mmiravo mmosa, murumeyi, nto khurowa omuthela mwali mmosa muKtolika, khupacerya siiso. Nto awo yaamurowa wira *ela, ele*, ni *ekina*, ni—ni sothene; khuphwanya mulattu. Vano atithi awe khimurwela, khwira, "Vano nkawehani, mwan'aka, munoorowa waataanihiwa?"

Khwira, "Paapa . . ."

Owo aariwmiihana ekerej'aya okhala nikhuru n'amasantu oophirikeya, y'atithi awe. Owo khwira, "Vano, nkawehani, munoorowa olakiherya etthu ile ni ekerej'ela?"

207 Owo khwira, "Vano, paapa, nyuwo mw'apaapa, ni myo nkinthuna okhalana mulattu ni nyuwo." Vaareera.

208 Owo khurowa khimukuxa mmosa wa matiyaakono khurowa mpakha owanny'awe. Khwira—khwira, "Wesley, kintthuna olavula ni nyuwo." Khwira, "Munoorowa olakiherya etthu ila ni ekereja?" Nto owo khulavula moolumo maili vathi-vathi ntoko waakhula siiso. Khwira, "Muupuwele, Wesley, miyo ka pastore a ekerej'ele. Miyo k'atith'inyu, masi kinrowa wira ele Muluku ohimmy'awe wira niireke. Kinoovahani mahiku miloko miraru wira mulakiherye eyo n'ikerej'ele, ahiiso hiyo nnoowoomolani Ohoolo wa Muluku. Nyuwo mwa mwan'aka yoomi; owo ti Moopoli aka." Khwira, "Miyo kinnoophentani. Ni moosuwela wira kinnoophentani, Wesley. Kaamuwerya wookhwelani naanaano va. Masi muhaana orwa wiikhaliha sana ni Masu a Muluku. Munnona?" Owo khwira, "Miyo ka pastore. Miyo ka makhampusi a nikoto nle. Nyuwo mukhanle-ene mwan'aka, wala mutthu ti mutthu, muhaana otthara Masu a Muluku. Mwaahiire yeeyo, weso nkimphwanela okhala makhampusi Awe."

209 Wulu, owo t'okhanle pastore. Owo t'okhanle mulopwana. Khamunuupuwela siiso? Owo t'okhanle mulopwana. Owo aahimuleela mwan'awe yeeyo. "Ni aahimusikuliha," owo aahihimya. Masi khwira, "Exeeni? T'ani onrow'anyu omunanariha, mutthu, wala omunanariha Moopoli anyu? Tivo," owo khwira, "vano hiyo khukelela ohoolo." Nto khwira, "Owo khaarowa wira. Nto hiyo . . . Miyo khuhimya mukereja."

²¹⁰ Owo khwira, “Mwan’aka yoomi, Wesley, onookhootta okiwelela, mwa mwah’ola. Owo onookhootta omwiiwelela tiyaakono. Ni nyuwo mwa namoona a yeela, Munna *Lexe ni Lexe?*”

“Ayo, ka namoona.”

“Vaareera. Ewoora ya neethanu neeraru, Ettiminku ekina, isumana xexe okhuma vano, owo aahilakiherye eyo n’ekereja, hiyo nnoomuvahererya Wesley, mwan’aka, wa xetwani, wira erutthu epwetexiwe. Ephome Awe, Ephome ya...ya Yesu Kristu, ni ekerej’ela, khenimukhapelela-tho.”

²¹¹ Nto ohiy’ule khuphiya. Khweemela vapulpitu, khwira, “Owo ohaana-tho minuutu miili.” Khuphiya okathi. Owo khwira, “Vano, ntoko mwan’aka, Wesley Rasmussen...khuhimeerya muthukuman’ola, ni Nyuwo, Muluku Oowerya sothene: Hiyo nihiira sothene sinwery’ahu wira, nittharihaka Masu Anyu ni miixuttiho s’Awinyu—Mwan’Inyu, Moopoli ahu, onihiyenry’awe. Hiyo vano, miyo kinninvahererya mmiravo aka, n’ekerej’ela mu ni miyo, wa opwe-...wa xetwani, wira erutthu awe epweteye, wira munep’awe woopowe.” Ti yeeyo tu yaahimmwe. Khiivo yaakhumelenle, mwa esumana emosa wala piili, khino mweeri mmosa wala miili.

²¹² Ohiyu umosa, Wesley mutokweene khuwereiwa. Nto vawereiwaly’awe, khunatepa owereiwaka. Owo khumwiihana tothoro. Tothoro khurwa khimuwehaweha. Owo aarina ehooma ya emiya ni thanu. Khaawerya ophwanya mwah’aya. Owo khunatepa owereiwaka paahi. Tothoro khwira, “Mmiravo, nkinsuwela exeeni ewinreni.” Owo khaasuwela etthu yo wira. Khwira, “Nnoomwiihana muratti a muteko.” Khwiihaniwa muratti a muteko, nto muratti khurwa iwe. Khikuxiwa khuroihiwa oxipiritaali, khimuwehaweha, itthu sothene sikina. Nto khwira, “Nkinwerya wooleelani paahi. Mmirav’owo paahi—onikhala ntoko ohookhwa paahi.” Amwaar’awe yeemenle vaavale, yinlaka, sothene siiso. Ni anamwane erukurenrye-ene lilil mapuro othene siisaale. Owo khwira, “Owo onoorowa. Ti yeeyo tu.” Khwira, “Nresa nawe n’umumula, sinoovukuwa okathi wothene.”

²¹³ Owo khwira, “Yiihaniwe apaapa.” Oh, ayo. Eyo t’inamuna yo wira. Ti yeeyo. “Yiihaniwe apaapa.” Nto apap’awe khutthimaka erowaka iwe oxipiritaali, yaakuvaka sana, wira yamoone. Owo khwira, “Paapa, nkinwerya ovilela vano, masi Muluku onniwa moolumo aka. Kinoorowa olakiherya sothene. Kinoorowa olakiherya. Ayo, kinoolakiherya.” Ayo, mulopwana, munna. Vaavale vene omumula wawe khupacerya otthikela okhala sana.

²¹⁴ Nto Ettiminku yootharelana, owo aari ohoolo w’atthu okereja. Owo khwira, “Miyo koomutthekela Muluku, ohoolo wa ekerej’ela. Kaahikhootta wiiwelela moolumo a pastore. Miyo—miyo kaahikhootta omwiiwelela tiyaakono va.” Ni khwira,

“Kinvekela ekerej’ela wira kileveleliwe mwaha wa yootakhala kiiraly’aka ntoko ele.” Khwira, “Muluku ohinanela ekumi aka.” Kinimooleelani, owo aahilakiherya. Ayo. Ti yeeyo entthuneya nyuwo wira, moone. Munnona? Nyuwo, vaakhanle wira muniira enamuna ya Muluku! Munnona?

²¹⁵ Vano, moone, enamuna eniir’ahu, nookhalana othukumana wa ekonselyo, nto niniira, “Ahe, vano, naahaana okhaliha. . .” Nkinihimya etapernakulu, masi kinihimya hiyo atthu aPrustante. Hiyo nookhalana othukumana wa ekonselyo, ni, “Nto munuupuwela exeeni mwaha wa Jones? Munuupuwela wira naahaana omwiiraha exeeni? Kinoona wira owo aamukhala mutthu Mmetotista ooreerela ovikana siry’awe wa hiyo.” Eyo eri vo. Eyo, eyo yoovonyeya. Mwaha wa yeeyo vahinthuney’aya hiyo otthara ilimalelo saya. Ni pixipu mmosa, orin’ahu omwiihana (mutthu-mmosa. . .exeeni, munimwiihana sayi? mutthu a otistritu mukereja mu ya Pentekosite? “humu a etistritu”)—omwiihana wira ophuke mweettelo wa mulopwan’ola.

²¹⁶ Bibilia onninihimeerya etthu yo wira. Tivo hiyo nihinthweelih’ahu miromolelo saya. Hiyo nnikhala ootaphuwa wa etthu iyo. Amen. Khamunanariwe ni miyo, moonanariwa? Muhiire siiso. Vaareera. Alakela kinookhalana sookhiwa sooreera meelo ohiyu. Masi, ahe, ti yooreera. Munnona? Muupuwele. Musuwele. . .

²¹⁷ Miyo kinihimya ela vano. Nyuwo atthu muri va munikhuma ikereja soohiyana-hiyana sa miromolelo, muromoleleo anyu, ni, munna, nkinihimya wira kahi mwa muKristu. Nkinihimya wira muromolelo anyu kahi w’aKristu oophenteya imiya sene mme. Kineererya ohimya mwaha wa xeeni ehikhalenly’ahu muromolelo. Okhala wira, miyo nkaakhanle ookhaliheryaka yeeyo. Nnari, mulopwana. Vekeekhai, nnari. Awo aneererya wooleelani etthu yo wira. Vakhala wira Muluku ookiihana wira kilaleye Ehapari yooreera, nto kinlaleya ntoko Muluku sinkileel’awe wira kiire. Eyo ekeekhai tu, ntoko elempwaly’aya mu mBibiliani mu. Yaahilikane ni Yeela, nto eyo ti. . . Muluku onookiphuka mwaha wa yeeyo. Masi miyo ka—miyo ka—miyo kamoona mwiici arwaaka, wala nwanani arwaaka, vano miyo khuvonya waaleela, nto Muluku onookivekela. Masi koolopolani vale, vano eyo ti yawinyu nto. Munnona?

²¹⁸ Muupuwele, “Iwe mahiku ookiserya, onimoorwa okathi w’oxanka, atthu anrowa wiiphentaka mmansaya, oowiittotopa, oowiisoona, ooveeha.” Moone, ooveeha, “Oh, awo nikhuru n’alolo. Mahiku a miiriirya aamala. Khekhanle etthu ene eyo.” Ole profeta oowuuluvala oowootha. “Vano, hiyo noosuwela wira athiyana ahu aakhalana ankhili ntoko alopwana ahu.” Miyo nkinivaanyiha eyo hata vakhani, masi Bibilia a Muluku ohimye wira mmukhalihe muthiyana ota w’epulpitu. Eyo ti—eyo ti yooreera voophiyerya wa miyo, moone. Ti yeeyo. Vaareera. Munnona?

Nto eniiriwa, “Ahe, vano, miromolelo sahu, hiyo nrina atthu anci-ene oolokaxa ntoko nyuwo sirin’anyu iwe otapernakulu.” Miyo nkinihimya eyo hata vakhani, masi Bibilia onnilamula miromolelo. Eyo ekeekhaii. Nto, vano, miyo nkinihimya wira khamurina atthu ooloka mukereja mw’anyu. Eyo ti yooreerexa. Awo atthu ooreera murima. Amosa w’atthu oolokaxa, miyo kinnaaphwanyaka mwa seiyo sothene, aKatolika ni othene aya akina. Othene aya, miyo kinnaaphwanya atthu ooloka.

219 Vano, moota ninrow’ahu oruuha ela vano, apatthani, Apwiya yatthuna vale, mwa isomelo iya piili sinttharelana, khino. . . Kinimoosuwelihani meelo voosiisu sinto nihaana otthimaka meelo oxekuwa wala nnari, moone, wira niruuhe yeela. Ethu hiyo enerery’ahu wira yeeyo, kintthuna kiruuhe mpakha nipuro nimosa vano. Vano, mwaatthunaka omuruuha mutthu ni nyuwo, vekeekhai munookhala orwa sana wira siiso. Masi muupuwele vano, muhi—muhikhume mphavelaka ophwanya nthowa paahi. Nyuwo munoorwa va. . . Miyo paahi kinlavula ni wawaka—muthukumano aka, moone. Miyo nkiniixuttiha ela ota wa muthukumano aka va, ’okhala wira owo muteko wa mutthu mukina. Okhala wira, owo ti makhampusi a nikoto nlo. Ni—ni miyo paahi ka. . . [Nipuro vahiitthu mufiitani—Mol.]

220 Nitthikelaka mwa Maphattuwelo, munoopurula voomalela, ni munimoona vatthu vary’aya. Vano ninrowa otthikela mwa Maphattuwelo, wira nisuwele mwaha wa xeeni mwaana ooraruwiwa ahaakel’awe mmuthukumanoni w’Apwiya mpakha maloko muloko ni maxexe. Moota enikux’aya. . . Saamukhala iyaakha imiya xexe wira etampi iyo ekhume. Moota onrow’ahu ophwanya moota ohi—ohixariya w’axitiithi onthotoliw’aya mw’ana ni aana, moota eyo epacenry’aya mwa Maphattuwelo, ni siiso.

221 Nto nyuwo. . . vano munimoona moota, mutthikele ottuli wu, moota Muluku, ohinatthi opattuxiwa olumwenku, ehinatthi hata ekalakathela emosa oruma, ottuli wu ohinatthi hata waarya-meteoro okhalakhala, Muluku aahisuwela khula yoopattuxiwa n’itthu sothene saarowa okhalakhala mulaponi. Ookhala mutthu va. . . Khimwaakhanle oowerya otaphulela etthu nuulumo, ni osoma sana, ni ohimya etthu nuulumo “yoohimala” nnihimiy’aya. Ntoko omutthukula kaamera anyu mpakha—mpakha voohimala. Vekeekhai, vekeekhai ti vaavale mpakha ohoolo, yeeyo tu. Munnona? Yoohimala! Ni hiyo khaninwerya, mwa muupuwelo onimalela, nnakhala osuwela sana etthu Muupuwelo woohimala waakhanly’aya ootthokelelaka. Moone, khaninwerya wira eyo. Nyuwo, khamunwerya wira eyo. Munnona? Masi mwaweha vale paahi, okhala mwa Eroho, munoowerya woona okhala ottaiwene. Ni—ni otthikela va mwa Yoolempwa nto munimoona vano, moone, khalayi sana ohinatthi mulipiheryo w’olumwenku okhalihwiwa.

222 Vano, Bibilia ohimye wira Yesu Kristu aari Mwaapwittipwitthi a Muluku. Vano nwiriyane oratteene, vano, vakhala wira atthu kamosa-kamosa wa nyuwo khamunkhala va meelo, wira mwiiwe emalelo aya. Bibilia ohimye wira Yesu Kristu aari Mwapwittipwitthi a Muluku, iiviwe okhuma opattuxiwakaru olumwenku. Eyo ekeekhahi? Owo iiviwe liini? Okhuma wopattuxiwani. Owo olumwenku, vakhala wira opakiwe nnikuphi n'ekalakathela yaakawanyeyiye, yaakumihiwe vansuwani iwe, ehinatthi okhala eyo. Nto, ehinatthi okhalakhala hata ekalakathela ehinatthi okawanyeya vansuwani, vakhala wira aari meteoro waakhumme vansuwani, seiyo saarowa okhala iyaakha ipilyawu emiya sa itrilyawu itrilyawu itrilyawu sene ottuli ohinatthi okhalakhala hata waarya meteoro mmosa, Kristu aahiwiwa. Okathi muupuwelo muulupale wa Muluku onlakel'awe etthu, etthu yoomalihiwa. Okathi iiraly'awe, "Ekhale," ti yoomala-ene. Vakhala wira enikuxa iyaakha ipilyawu emiya wira ekhale, ti yoomalihiwa-ene vammal'awe Owo ohimya. "Nto okathi Mwaapwittipwitthi iiviw'awe okhuma opattuxiwakaru olumwenku," Bibilia mmosaru, Eroho emosaru yoolepa khwira, "Masin'ahu aheliwe muLiivuruni mw'Ekumi ya Mwaapwittipwitthi ohinatthi opattuxiwa olumwenku."

223 Vano mutthu ule olempe esipo, "Nookhala Nsina Nsya Nilempwe Moovuwani," aahikhalana iyuupuwelo sooreera, masi aari mwa yoohilempwa. Munnona? Nsina nle nilempwe Moovuwani okathi olumwenku. . . okathi ohinatthi olumwenku hata opacerya. Okathi Mwaapwittipwitthi iiviw'awe, masin'ahu yaahiheliwa muLiivuruni mw'Ekumi ya Mwaapwittipwitthi.

224 Mukihiye—mukihiye koovaheni Yoolempwa emosa yaamukhaani paahi. Munoowehererya minuutu mmosa paahi? Enoorwa mmuruni mwaka naanaano. Kinoona wira kinoowerya okhunla vaavo. Nkikupanli. Nto vano kileveleliwe woopisihani siisa, masi kaahooleelani wira yaamurowa mpakha ohiyu eriyari; kahi yoonanarexa siiso. Masi miyo—miyo okisivela paahi o—okuxa ela, Yoolempwa emosa paahi ya yeeyo.

Mukhunle ni miyo vano muLiivuruni mwa aRooma, ni kintthuna musome yeela ni miyo. Vano, nrowe noone, aRooma, kawerya ophwanya, vaava va. Vano nrowe nikuxe aRooma 8, ni—ni nipacerye versiikulu 28 ya kapiitulu 8 y'aRooma. Ni kintthuna wira musome voottittimiha-vo ni miyo vano. Nwiriyane va paahi etthu Muluku ehimmy'awe vano.

Nto hiyo noosuwela wira itthu sothene sinvaheriwa vamosa wira areerihwe ale animphenta Muluku, yaawo owii. . . owiihann'awe voothuna wawe.

Maana ale aasuwenly'awe khalayi ene, . . .

225 Eyo ennoovahani... Munniwerya osoma ni miyo? “Maana owo...”

Maana ale aasuwenlyawe khalayi ene, ohaatthoma nave (vaareera) wira elikaneke ni Mwan'awe, wira akhale mwaana oopacerya eriyari y'axinna anci-ene.

Vano ale aatthommy'awe, awo oowiihana nave: ale owiihann'awe, awo ohaakhalaha anaxariya nave: n'ale aakhalinh'awe anaxariya, ohaavuwaha nave.

226 Okhuma opattuxiwakaru olumwenku! Okathi Muluku aawenh'awe vathi... Vano, Muluku khoneetiherya muteko Awe, iiraka, “Ahe, vano, kinrowa o... Oh, ninrowa wira exeeni vano?” Munnona? Khiivo hat'etthu...

227 Muupuwele, ohixariya, etampi, ti exariya ehononiwe. Xetwani khonwerya opattuxa. Atthu othene, othene, anniiwa sana yeeyo? Owo mwiixuttiho wa ekerej'ela. Xetwani khonwerya opattuxa. Owo onwerya ohonona ele Muluku epattunx'awe. Vano, ohonona exeeni? Va, nyuwo othene munikhala ntoko atokweene, anci-ene anyu. Nwiriyaane ela. Hiyo n'atthu nithenle. Ni nyuwo alopwana muthenle ni nyuwo athiyana mutheliwe munoowerya okhala vamosa ntoko iya ni mwaara, nto athiyana awo ti yaawo ene vekeekhai ntoko wira khanatoko okhala... Awo aharusi, vaakhalakaru wira munikhala n'aiy'anyu. Eyo ekeekhai. Vano, eyo ti ya nlamulo ni y'exariya, ni ti yoolikana. Orumme ti Muluku wira yiiriweke siiso. Muthiyana mukina onniwerya wira etthu ene yeeyo y'amwaar'inyu; mmosa a awo, nyuwo mwa naxariya vamaithoni va Muluku; nto mwiirelo mmosaru ni muthiyana mukina, nyuwo munoohukhummwa ohoolo wa Muluku, woophwanyiha okhwa. Exeeni iyo? Exariya ehononiwe, moone, exariya ehononiwe. Vano, xetwani khonwerya opattuxa, masi owo onhonona ele Muluku epattuxaly'awe.

228 Wootha exeenii? Ti ekeekhai ehononiwe. Aakhanle mutthu iirale, “Oh, nkawehani, waari Saapatu ohiyu, ewoora ya neethanu na xexe, ayo, Bill Branham aari oJeffersonville,” ekeekhai. “Opaare wa Antonio, ohapaliwe-ene,” wootha. Yaari exeeni iyo? Kaari oJeffersonville. Eyo ekeekhai. Yaari exariya ehononiwe khukhala wootha. Munnoonaa entthun'aka ohimya? Moone, wootha onnihonona ekeekhai. Eyo etthu ehimmye vatthu kaary'aka-vo. Vano, yaahimmyeru wira, “Okereja, kilaleyaka,” ekeekhai. Eyo exariya. Owo ohimmye ekeekhai. “Mutaverna, owuryaka,” wootha. Yoohononiwa; moone, ekeekhai ehononiwe. Munnoonaa entthun'aka ohimya? Ohixariya wothene ti exariya ehononiwe.

229 Okhwa, exeeni iyo? Ekumi, ehononiwe. Eretta? Ekumi, ehononiwe. Eri wira mukhale mutthu ooloka, a ikuru. Vaareera. Vakhala wira munoowereywa, exeeni iyo? Ekumi anyu yoohononiwa. Munnona? Eyo ti yothene ekhanle

ya yeeyo. Exeeni iyo? Nyuwo mwaari athiyana, asya ooreera; ni a ikuru, alopwana ooreera. Vano munikhuma mannyaari, munimuuluvala. Exeeni iyo? Ekumi, ehononiwe, moone, etthikaka-tho. Munnona? Ni eyo ehaana otthika. Noottotopeliwa nikhale Nsina n'Apwiya! Muluku oohimya ohokoloxa-tho. Ni vekeekhaixa ntoko eyo—ntoko ery'aya (hiyo noosuwela wira eri va), vano vekeekhaixa ntoko ery'aya, Muluku onoorowa ohokoloxa-tho. Owo oohimya ni oolapha wira aamwiira. Eyo t'ennivaha.

²³⁰ Vano, moota, muthinto xeeni w'atthu waatthuneya wira nikhaleke? Vano nwehe moota itthu iya siniiraney'aya. Vano, ale Owo aasuwenly'awe khalayi ene, Owo oowiihana; ale Owo owiihann'awe, Owo ohaakhalaha anaxariya yaawo. Liini? Ohinatthi opattuxiwa olumwenku, olumwenku ohinatthi hata opacerya. Vano, vaakhanle wira naamuwerya okuxa Yoolepwa ela ni ohimya sana, naamukuxa iwoora sene mwa yeela, masi hiyo—hiyo khanintthuna wira yeeyo. Masi ohixariy'ola wothene va, ti exariya ehononiwe khukhala ohixariya. Ti yeeyo xetwani eniir'awe.

Vano, mwaphiyerya wunnuwa w'othokorerya, ni munasuwela eri yootakhala ni yooreera, muhaana ohiya yootakhala anyu. Okhala wira, muyariwe mutampini, mupakiwe mwa sootakhala, murwiiye mulaponi mulavulaka itthu soowootha. Vano nyuwo muya—vekeekhai muyariwe mwaha w'otthuna w'ekhapa, nto vo muhaana oyariwa-tho vasya, wira mwaakhele Oyariwa vasya, wira nvolowe Wirimu. Okhala wira, enamuna ela y'eyareliwo murin'anyu nno . . .

²³¹ Munnoona vatthu Anamoona a Yehova ahireery'aya ovonya vo, wuupuwela wira Oyariwa vasya ohihimuwa w'erutthu? Moone, khivaaweryaneyya okhala. Munnona? Ehaana okhala etthu . . .

²³² Nyuwo, nyuwo muri moovirani w'okathi. Nto etthu emosa paahi Ehinimala ti etthu yahaarina epacerelo wala emalelo. Etthu p'itthu Ehinimala khenakhalaneke epacerelo, wala khenkhalakhala ekhalanaka emalelo. Munnona? Tivo mwaari epantte ya Muluku, Eroho eri mwa nyuwo khenakhalaneke epacerelo wala khenkhalakhala ekhalanaka emalelo, ni nyuwo mwa Oohimala ni Eroho eri mwa nyuwo. Munnona? Ntoko o—o—ophenta *Agapao*, vano owo onoomora khukhala ophenta *fileo*, vano nto khumora mpakha ophenta wa ethaama. Owo onoothikela orowaka omoraka omoraka, ohononeyaka mpakha wuukelana paahi ophiyerya okhala evitikavitika. Ahe, enamuna emosa paahi, Yesu aakhurunwe exikatta yeele, vathi va wira ottotte ni okuxe ohokoloxerye mukhalelo w'osulu sana, okhuma va mukhalelo wa vathixa; okhuma mookhwaani mpakha mw'Ekumini, okhuma mw'erettani mpakha mw'ekumini, okhuma vohixariya mpakha exariya. Munnona? Owo orookhala okhuma Osulu mpakha vathixa, wira Owo awerye omuruuha

ole a vathixa mpakha Osuluxa. Owo okhanle miyo wira miyo kiwerye, mwa mahala Awe, Okhala Owo, mulipa-oorithi a Ehice Moovuwani. Munnoona entthun'aka ohimya? Itthu iyo.

Vano nkawehani. Ottuli wu ohinatthi olumwenk'ula opacerya mukalakathelani mme ottaiwene wu, okathi Muluku oonaly'awe etthu yaarowa okhumelela, vaavale vene Owo aahiwoonani, Owo aahikoona miyo, Owo aahoona khula etothomwa, khula ephepele, khula naphulu, khula epwilimwithi. Itthu sothene saarowa okhala mulaponi, Owo aahoona vaavale. Vekeekhai, Owo aahoona.

²³³ Vano, Owo khonahimyeke wira, "Miyo kinoomuruma Mwan'Aka vathi kimuhiye Owo akhwe, nto khino onookhala mutthu onrowa omoonela othunku Yoowo. Nto onrowa okhala mwaha woowooniha othunku, khino ookhala onrowa woopowa."

²³⁴ Owo aahisuwela khalayi ene t'ani aarowa woopowa! Ayo, mulopwana. Owo iirale, "Esawu Miyo kinnimunyokha, nto Yakope Miyo kinnimpenta," ehinatthi hata mmosa a yaawo okhalana ereerelo yo wooniherya etthu yaary'aya, okhala wira Owo aahisuwela etthu awo yaary'aya. Owo aahisuwela. Owo onnisuwela itthu sothene. Owo aahisuwela etthu mwaarow'anyu wira, muhinatthi oyariwa, wala olumwenku opacerya.

²³⁵ Vano nkawehani. Ntoko sinsuwel'anyu, miyo—miyo—miyo ka namoopela. Miyo—miyo okisivela arifle. Nto muthiyana mmosa oTexas, kookupali wira waari oTexas, aahikithumela Swift mmosa, Swift a miloko miili. Miyo kweekwe kaanimutthuna mmosa. Kintthuna omuwehaweha. Owo kapwitthi oomalela ikuru mukhaani ooxaya-no. Ta epholovolo miloko miili ni piili, epholovolo ya ikarawu miloko mixexe ni thanu na tthaaru. Nto munoowerya onvarela muteko yoowo. Vano, ekaafirika enihimya wira, "Muhiire; ti yoowoopiha sana." Masi vanniweryaneya nyuwo weettiha epholovolo ele mpakha imeeturu ekonto emosa ni imiya thanu wa khula esekuntu, ni nlelo khukhaliha vooপুরoni vaya. Inawu ikonto thanu wa khula esekuntu, eyo p'iyo ekilomo emosa ni nuusu wa khula esekuntu. Mwa moolumo makina, evuku yeemenle, imeeturu emiya ni miloko mithanu na miraru. Munimoopela evuku ene, ni woona mapururu aya evavaka kapwitthi ene ohinatthi woovahani munyethe. Munnona? Yeeyo, masi nyuwo mwakuxaru, epante yoophottokowa ya nikoko n'opuntana, khuvvara oka aya, khuyeeherya-tho *yoowo* mpuwa mme, woophiyerya paahi mwaarow'anyu owerya okhaliha vanikokoni; ni munoowerya woopela ekuluwe ya vathi ekilante wookiseryani w'emp'ela va, eyo enookilaathi paahi ni woowehani. Mulattu aya exeeni? Epholovolo enoonyaanyeya, enoorowa voowaakuvexa, un- . . . Nto nyuwo munoowerya ohela mukhumi eriyari ya va ni vale, ni khamunrowa woona hata etathela emorelaka mukhumi. Eyo enoohokolowa paahi; kahi

e—kahi ettuurwa, ittuurwa sa maluku a mooro, masi enoorowa voorakamexa ovikana yeeyo. Eyo entthikela okhala aasitu oopacerya onikhaliha ekhoopiri ni exumpwi siri mpuwa mme. Eyo entthikela ntoko saary'aya iyaakha ipilyawu emiya khalayi. Vano, va eri epholovolo yaamukhaani, ikarawu miloko mixexe ni thanu na tthaaru ya epholovolo evarenly'aka mmatatani mw'aka, nto esekuntu enttharelana entthikela okhala etthu yaary'aya iyaakha ipilyawu emiya khalayi. Nto vaakhanle wira olumwenku khino waamukhala-tho iyaakha imilyawu emiya, yaamutthikela-tho okhala epholovolo, yaamuweryaneya ohokoloxiwa, maana yaamukhala-tho ekhoopiri.

²³⁶ Vano nkawehani etthu Muluku iiraly'awe, vano nto munoomphenta Owo. Vano munoorowa owaani, nto voosiisu munoorupa mpakha oxeleliwa vakhani. Ni—ni nyuwo—nyuwo munoomphenta Owo sihinatoko anyu omphenta. Vano, Muluku ti Namateka. Akavi ansuwela yeeyo? Owo ti Mulipa-ooteka. Vaareera. Nwiryane saana ene. Vano, Muluku ottuli wu, wala, eniriwa... Vano ninrowa okuxa muupuwelo wa w'alipa anaalikela okathi wa yeeyo. Muluku, iyaakha ipilyawu emiya sivinre, okathi Owo aarow'awe opaka olumwenku, ahe, Owo aaropacerya paahi. Vano, Owo aahikhalana... Owo aarina muupuwelo mmuruni mw'Awe.

²³⁷ Vano munrowa wira, “Vakhala wira Owo muulupale siiso, Munna Branham, moota xeeni Owo aahanly'awe omutthuniherya xetwani opaka etampi?” Ahe, Owo aahisuwela, xetwani hata ohinatthi opattuxiwa, wira owo aarowa okhala xetwani. Ovuwa! Vano kinnoona okhala natiini. Oh, wulu! Owo aahisuwela, xetwani ohinatthi hata opattuxiwa, wira aarowa okhala xetwani. Vano munookoha, “Ankhi yeeyo?” Nyuwo muniira, “Mwaha wa xeeni Owo omuhiya akhalaka xetwani?” Wira Owo ooniheriwe okhala Muluku. Mwaha wa yeeyo Owo iirenly'awe. “Mwaha wa xeeni ekhalenly'aya yootakhala? Mwaha wa xeeni?”

²³⁸ T'ani aari oopacerya, Moopoli wala natampi? T'ani aari oopacerya? Moopoli. T'ani aari oopacerya, Mpenuxa wala muretta? Mwaha wa xeeni otthuniheriwa okhala natampi? Okhala wira mikhalelo Sawe ti Moopoli. Ahaatonko okhalakhala natampi, Owo khaarowa osuweliwa ntoko Moopoli. Aleluya! Owo onniwerya wiirha itthu sothene ovilikeyela wa ovuwa Wawe. “Mulipa-oowuupa okhala oomwiirelaka mu... Wala, oloko wookhala oomwiirelaka mulipa-oowuupa wira, ‘Mukuupale siisa?’” T'ani oneetiherya? T'ani orina oloko ene? Ori matata xeeni yoowo? Paulo oohimya, “Oh, mulolo, Owo khohimye wira omuvenyin'he Farawo mwaha wa yeela?” Vekeekhai. Owo aahisuwela. Ohinatthi okhala olumwenku mmosa, Owo aanisuwela t'ani aarowa okhala exeeni. Nto Owo khutthuniherya wira ekhale etampi, wira Owo akhale Moopoli. Owo khutthuniherya okhala eretta, wira Owo akhale

Mpenuxa. Owo khutthuniherya okhala onyokha, wira Owo akhale ophenta. Vekeekhai, Owo ootthuniherya. Owo Mulukuu, ni iyo ti mikhalelo Sawe. Ni Owo ohaana okhalana etthu wira yooniherye mikhalelo Sawe.

²³⁹ Mwaarowa okhalakhala sayi musuwelaka wira wookhala ohiyu, mwaarowa okhalakhala sayi musuwelaka wira wookhala? Vaakhanleru wothene okokola, mwaarowa okhalakhala sayi musuwelaka wira wookhala ohiyu? Wookhala ohiyu, wira wooniherye wira wookhala okokola. Vekeekhai, wookhala. Amen. Munnoona etthu Owo iiraly'awe?

²⁴⁰ Masi okathi Owo aary'awe ottuli wu, ohinatthi opattuxiwa olumwenku, Owo ohinatthi okuxa nsuwa nla na khalayi khirukureriha ettheneeri ila ya khalayi hiyo munkhal'ahu vano, elapo ela, nto Owo khupaka sana va waattamela nsuwa, ni khukhaliha vakhiviru va nsuwa. Niireke, *va nri nsuwa*. Owo opanke epantte *ela*, khuhiya noothomeiwe-ene iyaakha ipilyawu emiya. Exeeni Owo aapak'awe? Ikaaxi kamosa-kamosa. Owo khurukunuwela epantte *ela*, khupaka etthu ekina. Exeeni Owo aapak'awe vo? Epotaasiyu. Owo khurukunuwela epantte *ela*, nto exeeni Owo aapak'awe va? Aapaka ekhinampo. Exeeni Owo iir'awe? Owo oopakani nyuwo ni miyo. Exeeni Owo iir'awe? Ntoko namateka otthokihaka ipatho sawe sothene s'ophima piili epantte emosa ni xexe ekina ni piili epantte emosa ni thanu na tthaaru ekina, sootheereliwa sawe, ithaapwa sawe, owo aahisuwela vekeekhai ipa kavi aarow'awe oteka. Ni hiyo nipakiwe ni itthu muloko ni thanu na mosa sa vathi, ni Owo aanipaka hiyo othene, ni anithataka vale olumwenku ohinatthi hata ophiyerya okhala. Nto Owo... Khino siiso waakhanle woophatakeihiwa okathi ene yoowo; nkisuwenle waari exeeni. Etthu Owo aapakel'awe eweero, ni ekhoopiri, ni eporonse, ni maasi, n'itthu sothene iyo? Owo Namateka. Owo ti pooti... Mulipa-ooteka, Owo aathata itthu sothene vo, aarina itthu sothene soothikiliwa sene ni soolikanyihiwa. Okathi Owo okhalann'awe sothene soopakiwa sene, yaari paahi ekhumelo yuulupale ya maluku a mooro. Owo khuhiya ikhumelo iye suulupale sa mooro okhumelela vale iyaakha ipilyawu emiya, wira epekeye ekhinampo. Exeeni iyo? Epantte ya nyuwo.

²⁴¹ Vano nto, nihinatthi okhala nlepa nimosa n'ekumi mulaponi mu, irutthu sahu saari muumu. Aleluya! Nihinatthi hata nttoi-nttoi nimosa na okame orwa mulaponi, hiyo naathatiwe muumu. Okathi Adamu eett'awe nno ni nno omatta w'oEdeni, miyo kaari muumu. Amen. Ayo, mulopwana. Oh, ovuwa! Okathi aKherupi, ittheneeri s'oxaka siip'aya vamosa, ni aana a Muluku yaakhuwel'aya etthapaka, miyo kaari muumu kilipelelaka paahi ephumu y'ekumi orwa. Miyo kaari muumu. Owo okipanke muumu, aahikhalana erutthu aka erupaathale-ene muumu. Ayo, mulopwana. Yahaari yeeyo, eyo ekhumme yayi? Hah? Eyo ephin'ye sayi va? Muluku aahikhalana yiimmaathale-ene

muumu. Muluku t'opanke. Hiyo nipakiwe ni itthu muloko ni thanu na mosā: patarooya, epotasiyu, ni waarya kosmiku, ni sikina. Moone, hiyo naamaathale muumu.

²⁴² Vano exeeni yiiraneeye? Vano Muluku khuhimeerya Eroho Yowarya, ninrowa okuxa ntoko ekanyeryo, “Vano Nyuwo murowe, mweepese olumwenku ule. Okhala wira, Miyo ka ophenta, nto Nyuwo mwa muhokorokho Aka, nto vano Nyuwo murowe mweepese olumwenku.” Nto Eroho Yowarya yuulupale, hiyo ninnuupuwela, enikhuma vale; ntoko elatarato paahi vano. Khayaari siiso. Vekeekhai, Eroho Yowarya ni Muluku mutthunelo mmosaru, mutthunelo mmosaru, Mutthu. Kileveleliwe. Ohimya paahi wira Eyo yaahookolela mapupha Aya mulaponi, khupacerya okhuneela. Okhuneela iwo exeenii? Ntoko mwalyakhu n'axaan'awe, arettehaka, oweepesaka, “ko, ko, ko.” Oh!

²⁴³ “O ekumi, ekhumelele!” Eyo khikhuwela. Eyo khuwehaweha. “Kintthuna oreera w'elapo ela. Okhumelele, waarya!” Eroho Yowarya yeettaka. Nto okathi Eyo yeettaly'aya, miyo kinniweha; erwaaka, ele entthyawa vale ekhuruwelaka mwaako, vale enoorwa ekhinampo emoraka yoowaatta, khutakanxeya ni epotasiyu. Eniitakanxa ni xeeni? “Ekumi, ekhumelele!” Nto nluwa naamukhaani na Paasikha khikhumiherya muru aya nikhumaka vathi va mwala. “Murwe va, Tithi, nkawehani ile.”

²⁴⁴ “Enikhala ntoko yooreera. Mutthikele mukhuneelaka paahi.” Eyo khikhuneela maluwa. Eyo khikumiherya miri sothene. Eyo khikumiherya ekumi y'axinama. Axipalame khuvava ekhumaka vathi. Okathi vakhani, khikhumela mulopwana ni muthiyana; khikhumela mutthu, nto mutthu aari soopili mulopwana ni muthiyana. Kahi olopwana n'uthiyana, vano. Paahi, aari mwa yoowo paahi, yaahikhala erooho y'othiyana.

²⁴⁵ Mwamukuxa mulopwana ori mulopwana-thiyana, owo pooti okhala sana, oolipa-lipa sana, masi yookhala etthu ehilonke. Ni mwamukuxa muthiyana, onthuna omettha ikharari sawe ni omuwara makakawu, n'ukhumela iwo, ni, “Attotopeliwe Muluku, kinimooleelani!” Yookhala etthu ehilonke. Muthiyana orina erooho y'othiyana, ni mulopwana t'olopwana. Hiyo ninnisuwela eyo. Ni nyuwo munnisuwela eyo. Ennooneya okhala etthu yooreera muthiyana, weererya okhala, wira ntoko mulopwana?

²⁴⁶ Vano, miyo kaarookilaathi emara emosa, miyo kaari namweettelela etakhwa nno, nto kaakilanthe mukarerani khurowa iwe ni kaamana muthiyān'ole vamwettoni, ni ntata naka, kilavulaka ni yoowo, nto nkaasuwela wira aari muthiyana. Owo aawanre ikapaseeti iya s'alipa-oototoxerya, ni iyookhola suulupale sa mwaakiho *siiso*, nto miyo kaakilanthe ottuli iwe, ni owo aathariha etthu mwaha w'etthu yaakhumelenle. Owo

khwira, “Moosuwela,” nto owo khwira, “nto nsana ohiyu,” okhalaka paahi ntoko oneneva ntoko saaweryaney'aya okhala, amulyaka sikaro. Owo khwira, “Nsana ohiyu, kinimooleelani, mulopwan'ole aahitherekuwa, vasulu v'etthu ile. Owo khwira, ‘Wulu!’ Owo aarwiiye otherekuwelaka vathi vale.” Khwira, “Nkinatheyeke vanci-ene kookhalaru.”

²⁴⁷ Nto miyo kaamutheya, moosuwela, *siisaale*. [Munna Branham ontakiherya oruma wa ntata—Mol.] Miyo khwira, “Mmiravo, eyo yaahitepa, kahi siiso?” Okilanthe-ene vale alavulaka siiso. Nto owo ahaarunle etthu ile khuttikinya muru awe, ni ahaarina ikharari soohixamuliwa vale, sooniherya wira aari muthiyana. Nkinatoko wiisoona oyeva kookhalaru. Miyo—miyo khwira, “Nyuwo mwa muthiyana?”

Owo khwira, “Vano, vekeekhai!”

²⁴⁸ Miyo khwira, “Mukilevelele.” Nkinatoko woona etthu iyo. Vano, eyo, eyo ekeekhai.

²⁴⁹ Nihiku nlo kaahoono nipawe, naahala okithamaliha. Naahikhalana elopolelo yuulupale, yaahimya wira, “Athiyana aalikana wira eware ikuwo.” Miyo kuupuwela, “Avuwihwiwe Muluku mwaha wa yeeyo.” Munnona? Masi, khuphiyera osuwela wira, waari muthinto mmosa wa ikuwo saamanle opakiwa, moosuwela. Miyo—miyo kuupuwela wira vekeekhai yaarowa owarasa ikuwo. Vekeekhai miyo kuupuwel'aka. Khwira, “Athiyana aalikana wira eware ikuwo.” Miyo khwira, “Avuwihwiwe Muluku mwaha wa awo. Eyo ti yooreera. Eyo, vekeekhai kinnaaxukhuru Apwiya mwaha wa yeeyo.” Masi, moone, waari muthinto mmosa wa ikuwo saamanle opakiwa, etthu emosa. Yaahaana okhala etthu yootheiha, khiyaarowa okhala, elapo yeela? Vaareera.

²⁵⁰ Nto okathi Adamu okhumelenly'awe. Vano nto Adamu aakhala ntoko aari meekhaawe, tivo Owo khikuxa niparari nimosa mpararni mw'awe khumpaka Hawa, muhokorokho w'okhuma wa yoowo. Owo khupaka... Owo khikuxa erooho y'othiyana mwa Adamu, khuhela mwa muthiyana, erooho ya mphento, othiyana, yooreera murima, yoosivela. Nto Owo khuhiya erooho y'olopwana mwa Adamu. Vano, yaakhanle-ene etthu yoovirikana, yookhala etthu ehononeiye nipuro nlo. Vano, vano nto awo aili yaari mmosaru.

²⁵¹ Vano siiso nrowe nikuxe eteyaaturu yaamukhaani nto nihinatthi omaliha. Va onoorwa... Va, ti Adamu onimuvana moonno Hawa ni weetta. Miyo okisivela wahal'ola. Nto awo animweetta, moosuwela. Nto Hawa khwira, “Oh, oophentiwa, muntthuna ohimya wira mookhalana?”

“Ayo, miyo koovaha nsina ele.”

“Masi muniihana exeeni yeele?”

“Ele eniihaniwa ekhavallo. Uh-huh.”

“Exeeni ile?”

“Ele enyompe y’othiyana. Uh-huh.”

“Nyuwo muvanhe nsina ele?”

“Ayo. Uh-huh.”

252 “Muniihana exeeni ile vale, iye piili sikilanthé vale ni miru saya vamosa?”

“Iye ikhweyii.”

253 “Oh, kinnoona. Kinnoona.” Enatthikela erowaka siiso. “Nto exeeni ila va?”

“Kinihana eyo, *elexe*, n’ila va.”

254 Nto, “Oh, kinnoona. Uh-huh. Eyo ti yooreera.” Nto kharamu khikhuluma. “Muniihana exeeni ile?”

“Ole kharamuu.”

“Exeeni *ila*?”

“Havara.”

255 Nto, oh, ntoko... “Oh, kinnimoona.” Ntoko apaakha axikhaani, moosuwela, yiipaka vaavale.

256 Vano, okathi vakhani, owo onoowehaweha. Owo khwira, “Oophentiwa, nkawehani vale, nsuwa nnootupweela. Ola okathi w’orowa okereja.”

Moosuwela, yookhala ethu ya nsuwa naatupweelaka, munootthuna okokhorela. Mwaahiroweru okereja ohiy’uwo, enimoosivelani ovolowa mpaani, omusoma Bibilia. Akavi enaasivela wira yeeyo, okhuma okhala mekhiinyu? Munnona? Eri mwa mutthu paahi wira yeeyo. Nyuwo mwaahaana wira yeeyo.

“Okathi w’orowa okereja.”

257 Vano, awo khanahimyeke wira, “Vano, nwehererye minuutu mmosa vano, vano, Jones oniira mpantha w’Asempeleya, ni hiyo nniira mpantha. . .” Nnari, khiyaari hat’etthu ntoko yeeyo nto, tivo awo yaaroorowasa iwe paahi. Awo khayaarinasa ekereja, ekhukulu yooreera y’okilaathi-vo siiso. Awo yaaroorowasa paahi vathi va ekatetrále yuulupale ya miri, khukokohorasa.

258 Nto Ekhilemp’ele yaaithomeiye nipuro nlo mutakhwani. Munnona? Kinniwerya wiiwa Nsu nilavulelaka vathi niiraka, “An’Aka aavirihasa okathi wooreera elapo ya vathi, olelo, Apwiya Muluku anyu yoovanh’ayani?”

259 “Ayo, Pwiya, hiyo nooviriha okathi wooreera olelo.” “Khanivirinhe, oophentiwa?”

260 “Ayo. Ayo, oophentiwa, nooviriha.” “Pwiya, hiyo vekeekhai ninnisiveliwa ni Nyuwo. Vano kinimummaathi kirupe.” Munnona? Nto owo onookola moonno awe muulupale, ni muthiyana onimmaathi, vamooni va mulopwana, ni owo

khimummaathiha havara ni kharamu, nto itthu sothene khummaathi wira sirupe; ni murettele sana.

²⁶¹ Nto Muluku onookhuruwa ni Owo oniruuha, oh, nikhuru na Malaikha, Kapiriyeli, yoopattuxiwa Awe wa Wirimu. Nto anookhuruwa khuvolowa okatthi yeettasaka ni wookiseryani wa nnawu vooaaleleya sana, moone, khuwehaweha. Kapiriyeli khwira, “Murwe nno, Tithi. Murwe nno. Nkawehani va. Ola ori va. Va, aniphwanyaneya an’Inyu yiimmaathale-ene va.”

²⁶² Akavi mu atonko orowa waamuru w’olili, amosa-amosa wa nyuwo aximai, nyuwo ni paapa vamosa, khimuweha mwanamwane mwammiravo, mwamuthiyana, nto khuupuxeryana, “Kholo—kholattanne ni nyuwo, *sa ni saale?*” Mwaahinto wira yeeyo? Vano, imaara sinci-ene miyo kinnirowa n’umwiirela Meda, ohimya mwaha wa Yosefe. Awo animwiira, “Bill, owo t’okhuma eyuuci ntoko nyuwo.”

²⁶³ “Ayo. Masi, Meda, owo orina maitho maalupale ntoko nyuwo.” Mwaha wa xeeni? Owo epantte ya muhoko-. . .Owo muhokorokho wa wawihu—w’ophitaana wahu.

²⁶⁴ Vano, nto Atithi khwira, kinoowerya ohimya ela mwaha w’ela. Khwira, “Moosuwela. . .” Nto Kapiriyeli khwira, “Moosuwela, owo onlattana ni Nyuwo.” Ti siiso Muluku onlattan’awe; mwiwehe mmansinyu. Ti siiso Muluku onlattan’awe. Owo onlattana ni nyuwo. Nyuwo mwa osuulu Awe. Akavi answela yeeyo? Munnona?

²⁶⁵ Vano nwehe. Mukhalelo xeeni wa ekumi woomalela okhala vathi hiyo nrin’ahu? Naphulu. Mukhalelo xeeni w’ekumi w’osuluxa? Mtthu. Vekeekhai. Nto mukhalelo xeeni muulupalexa? Eyo yaahitthikela erwaaka okhuma ya vathixa, mpakha osulu, okhuma naphulu mpakha *ela* ni mpakha *ele*, ni mpakha mwaapalame, mpakha, siiso erowaka, mwa mikhalelo suulupale s’ekumi, mpakha ophiyerya mukhalelo muulupalexa waaweryaneya ophiya, vano khupakiwa volattana ni Muluku. Eyo eri vo. Nto muthiyana khaapakiwe volattana ni Muluku, masi olattanihiwe ni mulopwana. Munnona?

Vano, vano, awo ari vo. Nto Muluku khwaawehasa, khwira, “Ayo, awo anooneya—anooneya okhala oophenteya.”

²⁶⁶ Yaari exeeni iyo, munna? Awo khiyaakhalakhala ekhwaasaka. Nle naari nikuphi noopacerya paahi na ekhinampo, epotasiyo yoopacerya, nto itthu sothene saapacerye siiso. Kahi etthu yoorera? Masi etampi khurwa khutapanyasa elatarato ene. Vano, ti Muluku. . . Exeeni Muluku aatthunihenry’awe eyo wira? Mwaha wa xeeni Owo aatthunihenry’awe okhala ntoko saalavul’ahu okathi vakhani ovinre? Owo aatthunihenrye eyo wira Owo ooniherye wira Owo aari Moopoli. Owo aahiira. Owo oroohiya eretta okhumelela, wira awerye wooniherya wira Owo aari Mpenuxa. Owo oroohiya okhwa okhumelela, wira ooniherye wira Owo t’ari Ekumi. Munnona? Owo oroohiya itthu iya sothene

soonanara okhumelela, wira ooniherye wira Owo aari ooreera murima, yeeyo Owo aakhanly'awe. Hiyo nno. . .

²⁶⁷ Nyuwo munihimya wiipa ehantisi ya nvuluxo! Vano, munna, okathi Yesu onirw'awe, ela—Ekerej'ela enookhala ottaiwene sana mukerekhere w'elapo ela ni wiipa ihantisi sa nvuluxo, okathi Malaikha anrow'aya wuurama miru saya, ehisuwelaka etthu enihimy'ahu. Ahe, awo khanarimeeleke. Awo khansuwelasa muvinry'ahu-mo. Hiyo ninnisuwela etthu enihimya orimeela khuphwanyiwa. Oh, ninniweya okhuwela ovuwa Wawe! Owo kahiyo Moopoli a awo. Awo khanatthuneke hata woopoliwa. Owo khaari Mpenuxa wa awo. Nnari. Ovuwa! [Munna Branham onopa ikuphi vaara vathanu—Mol.] Owo kahiyo—Owo kahiyo Ekumi wa awo. Vakeekhai nnari. Awo khanakhweeke mutampini ni sootakhala. Hiyo naahikhwa, vano khukhalihwi akumi. Hiyo nri vo. Ninrowa ohimya exeeni, nihirina maleh'ahu mmuruni, “Oh, nyuwo mwa Reverendu *Lexe ni lexe*”? Nnari, nnari, nnari, nnari, nnari. Ovuwa wothene wa Yoowo! Ti yeeyo. Eyo eri vo. Vano nnoorowa waalela ehantisi ya moota nixintaly'ahu. Nnoorowa osuwela sana naanaano.

²⁶⁸ Vano, mme mwa yeele, nto exeeni ekhumelenle? Muluku nto iirale, “Ahe, vanreerela Miyo ohonona paahi epotasiyu Aka yothene ni ekhinampa. Yothene yoononeya”? Nnari, nnari. Owo aanisuwela wira yaarowa okhala sisso.

Vano, vano, vakhala wira Eroho Yowarya yookikhaliha ele kikhaly'aka, ni kinnoolya yolya ni wiikhaliha mw'erutthuni mwaka, ni wiisiinnuwiha ophiyerya ele ekhanly'aka vano. Vano, nlelo, kipakiwe mwa mukhalelo mmosa. Khula elatarato Muluku oonaly'awe, ohinatthi opattuxiwa olumwenku, enniphiyerya ottokottha waya, ennikhala etthu. Munnona? Yaakhumme wa muthiyana, ntoko Owo saahimmy'awe wira yaamukhuma; emaara yootharelana, enikhuma wa Muluku. Ekwaha ele, yaakhumme wa muthiyana; ekwah'ela, enikhuma mwa Mulopwana. Munnona? Ekwah'ele yaaruule, mwaha w'otthuna w'ekhapa; ekwah'ela enoorwa ni Nsu noolavuliwa na Muluku. Munnona?

²⁶⁹ Vale, vano, yookhala enwerya okipweteiha? Nnari, mulopwana. Khiivo hat'etthu enwerya onipweteiha. Paulo oohimya, “Wira hata itthu sa vano, itthu s'ohoolo, eretta, okhwa; khiivo enwerya onimwalaniha ni ophenta wa Muluku ori mwa Kristu.” Khiivo hat'etthu enwerya onimwalaniha.

²⁷⁰ Ntoko sintharihak'aka ehantisi emosa yaamukhaani. Kirina maihi oophiyaka mathanu paahi wira kikhale nantari, oomalela. Ni kaamuxamula ala vakhani va okathi uwo ovinre, amwaar'aka khwira, “Billy, muhanle okhalana ntari.”

Miyo khwira, “Masi nkipwetenxe hata nimosa.”

Awo khwira, “Ari vayi?”

271 Miyo khwira, “Awo yaari vayi kihinatthi okhalana?” Munnona? “Hata wira yaari vayi kihinatthi okhalana.”

Vano, waahikhala okathi mmosa, iyaakha emiya emosa khalayi, maihi ala khiyaari muumu nnakhala, masi yaari ota nno vatthayani. Eyo ekeekhai? Vano iyaakha soophiyaka miloko mithanu sivinre, awo khupacerya orwa mmuruni mwaka. Awo akhumme vayi? Vatthayani. Nto vano awo antthikela vatthu vaary'aya. Eyo ekeekhai? Awo khayaakhanle, vano khukhala, nto vano khakhanle-tho. Exeeni iyo? Exeeni ekhalinhe ele ary'aya? Muluku! Owo ori vo. Owo opintanri elatarato, khwira, “Ti siiso kimmutthun'aka owo.”

272 “O Okhwa, siri vayi ikuru sanyu? Mahiye, ori vayi owerya wanyu?” Nyuwo pooti okivitha nihiku nlo okhuma nno. Miyo nkisuwenle. Masi, munna, nkinrowa okhwa. Kinimooleelani yeeyo. Nnari, mulopwana. Oh!

Hiyo nnoohihimuwa! Aleluya! Hiyo
noohihimuwa!
Voosiis'ule wo ohihimuwa, okathi ikhottiheryo
sa mookhwaani sinrow'aya opwexakasiwa,
Hiyo nnoohihimuwa! Aleluya! Hiyo
nnoohihimuwa!

Khiivo hat'etthu enwerya okikhottiha ohihimuwa. Khaavo axetwani oophiyerya omooroni wothene anwerya okikhottiha ohihimuwa. Khiivo hat'etthu enphiyerya hata nipuro wira ekikhottihe ohihimuwa. Miyo kookhalana natiri a Muluku. Kookhalana Eroho Yowarya. Kookhalana Zoe, Ekumi Ehinimala ya Muluku, emmumula mu. Nikarakasa nla na khalayi nikhumme iwe, nto Muluku khikuupa okhuma vatthayani. Nto vakhala wira Owo okuupale okhuma vatthayani. . .

273 Okathi okhanly'aka oowunnuwaxa, vano, khula okathi kiiw'aka esiinu y'okereja, yookhala Etthu emosa yalavula ni miyo, mwammiravo mwaamukhaani. Nlaikha naanilavula mutakhwani, niiraka, “Muhikhalakhale nwuryaka wala omulya sona. Miyo kookhalana muteko wira nvare. Muhihonone erutthu anyu, wala weettasa n'athiyana n'itthu siiso. Nyuwo, Miyo kookhalana etthu wira nvare mwannuwa vale.”

“Nyuwo mw'Ani? Nyuwo mw'Ani?”

274 “Munoosuwela sana yeeyo ohoolo.” Nuuvira okathi vakhani, va Owo khurwa. Owo oniithomeya vale w'opatiiso. Owo onimwiisooniherya Mmansawe. Owo onimwiihimya Mmansawe. Owo onimwaakhula. Miyo kinnimoona Owo eemenle, mapuro othene, mwa khula ntata.

275 Moota xeeni onrow'anyu o, vakhala wira Owo ookikhaliha ele ekhanly'aka, kihikhalanne hata ethanlelo hata vakhani. . . ? Miyo nkinaroweke iwe ni wira, “Vano, Charlie Branham, mmutehele Ella Harvey nto mukiyare okhuma vatthayani.” Nnari,

mulopwana. Miyo nkinakhalaneke ethanlelo ya yeeyo. Muluku t'irale yeeyo.

Ni vakhala wira Owo ookikhaliha ele ekhanly'aka, kihithanlale; khivatempe, okathi Eroho Yowarya ele enrow'aya okikhupaara, ni miyo wira, "Ayo, Pwiya, Nyuwo mwa Mpattux'aka. Kinnoophentani, ni kinnookupalini Nyuwo ntoko Moopoli aka!" Munrowa okivarelela sayi vatthayani? Khivanweryaneya wira eyo paahi, munna. Khivanweryaneya wira.

²⁷⁶ Muluku khonapakeke nipattuuxa n'ekhinampo ila, wala epotasiyu, wala etthu p'itthu ekina, etonko okhala—okhala yoononiwa. "Othene ale Atithi akivanh'aya, ohinatthi opattuxiwa olumwenku, animoorwa wa Miyo." Wau! Kinnitthuna okhuwela; ohimya exariya kinnitthuna. "Othene ale Atithi akivanh'aya animorwa wa Miyo, ni khaavo hata mmosa a yaawo onrowa orimeela, masi kinimwaahihimuxa—tho woohihimuwani." Miyo kaahimwiiwa Owo wiihana, okathi orwiiy'aka wa Yoowo. Vanweryaneya sayi miyo oheliwa vatthayani v'elapo? Khisaavo mulaponi miteko sa moovithani soophiyerya sinrowa okimana wiitho ni efoxolo, enrowa okikhaliha vatthayani v'elapo. Kinoohihimuwa nihiku nlo ni kikhale oolikana ni Yoowo, oorapihiwa Mphomeni mw'Awe, ooyariwa ni Eroho Awe! Aleluya! Mukhalane miromolelo sothene muntthun'anyu; miyo kimmukuxa Yesu. Amen!

²⁷⁷ Mulopwana mmosa a miteko sa sekuuru aahikirweela. Wilmer Snyder, mpatthani aka ooreera murima. Owo khwira, "Billy, kintthuna kootumiheryeni epaphelo ya sekuuru."

²⁷⁸ Miyo khwira, "Kookhalana eyo." (Amwaar'aka khuwehaweha, ntoko yaatthuna wira, "Munoothelani, mmiravo?")

Khwira, "Mookhalana esekuuru?"

Miyo khwira, "Ayo, mulopwana."

Khwira, "Mutthenkeso xeeni orina? T'evi?"

²⁷⁹ Miyo khwira, "Nroromelo wooreerihiwa, Yesu t'awaka, oh, opuha xeeni wa ovuwa wa Muluku! Murithi a woopowa, othummwe ni Muluku, ooyariwa ni Eroho Awe, oorapihiwa Mphomeni mw'Awe."

²⁸⁰ Owo khwira, "Eyo ti ooreera, Billy, masi khenrowa woohelani mmahiye."

²⁸¹ Miyo khwira, "Enoorowa okikumiha-wo." Aleluya! Miyo nkivelavenle n'uphiya iwe; ti okhuma-wo.

²⁸² Vano, kookhalana esekuuru enikileela wira, "Miyo kinimwaaruha. Othene ale Atithi akivanh'aya t'Awaka." Nkincala etthu atithi aka yiiraly'aya, etthu ame aka yiiraly'aya, etthu p'itthu yaakhanle. "Othene ale Atithi akivanh'aya animoorwa wa Miyo, khaavo onwerya orwa wa Miyo Atithi Aka

ehimuruunhe.” Aleluya! Owo aaruhenleni? “Miyo kahaasuwela awo khalayi ene ohinatthi opattuxiwa olumwenku. Okathi omwiivaly'aka Mwaapwittipwitthi, kimwiivale ni Yoowo.” Amen. “Miyo kirootthoma Ekereja.” T'ani arina otthommwa? Ekereja. Munkela sayi Mukereja? “Hiyo othene noopatisiwa mwa Eroho emosaru mwa Erutthu emosa.” Owo aahisuwela, ohinatthi opattuxiwa olumwenku, wira naarowa okhala iwe. “Ale Owo aasuweny'awe khalayi ene, Owo oowiihana. Ale Owo owiihann'awe, Owo ohaakhalahaanaxariya. Ale Owo aakhalinh'aweanaxariya, Owo ohaavuwihana.”

²⁸³ muLiivuruni mwa Muluku, Owo oohimya wira onookiphwanya weiwe wene. Khaavo axetwani othene oomooroni anwerya anwerya waakhoottihaka orowa nipuro pi nipuro kuhhiphiya sana weiwo, 'okhala wira Muluku oohimya siiso, nto ennimaliha mwaha. Vakhala wira iyaakha ipilyawu emiya olumwenku ohinatthi hata opakiwa, ittheneeri s'oxaka siip'aya vamosa ni aana a Muluku yaakhuwel'aya etthapaka, ohinatthi okhala opattuxiwa w'olumwenku, moone, ohinatthi okhala opattu-... , ni Malaikha ale n'itthu sothene saari sootthapa, sikhuwelaka mwaha wa yeeyo, ohinatthi okhala pattuxiwa w'olumwenku, xetwani onrowa okhalakhala sayi akivarelelaka vathhayani v'elapo? Khonwerya wira paahi. Mookhalana exariya.

²⁸⁴ Nrowe noone, vano. Ola okathi wa temokrasiya orin'aka, va. Sinihala minuutu miloko miili wira ephiye ewoora yanamuloko n'imoso. Sinihala minuutu miloko miili paahi wira ephiye ewoora yanamuloko. Ti siiso, Munna Wood? Ti yeeyo, minuutu miloko miili wira ephiye ewoora yanamuloko. Atthu othene t'otteeliwa murima?

Oh, koolikana wira keette mukwaha,
Koolikana wira keette mukwaha;
Etthoko Aka ya Wirimu ti yoowaarya ni
yooreera,
Nto koolikana wira keette mukwaha.

Oh, koolikana wira keette mukwaha,
Koolikana wira keette mukwaha;
Etthoko Aka ya Wirimu ti yoowaarya ni
yooreera,
Nto koolikana wira keette mukwaha.

²⁸⁵ Sinnoosivelani isipo iye sa khalayi ntoko yeeyo? Yaahikhala esipo emosa ya khalayi niipak'ahu wa yeeyo, etthu ya, “Mahala ni ikharari sookiphwanya. Iwe Ettheneeri y'Oxaka yaahaarya.” Exeeni ile, Munna Gertie? Nrowe noone. Moota . . . Exeeni iyo, Munna Neville? Moone, etthu emosa, “Mahala ni ikharari sookiphwanya. Iwe Ettheneeri Yoowaarya ni y'Oxaka enooniherya Yawawe . . . ? . . . wa miyo.” Uh-huh. Ayo. “Vamwiikimanyo.” Munivahe woompwa wa yeeyo, munna, ele, *Vakhiviru Va Mwiikimanyo*. Murwe nno, Munna Neville.

Oh, okisivela iya. Akavi sinaasivela isipo iya sa khalayi sa muupuxeryo? Nyuwo mukhalaneke isipo sanyu sothene sa boogie-woogie s'otupha-tupha muntthun'anyu. Mukivahe ela, "Va ti nipuro mahala ni ikharari sikiphwany'aya-vo." Ti yeeyo. Vaareera, voomaaleleya vano.

Yesu, mukipwehe vamwiikimanyo,
Vaavo ephattuwelo yoosarya,
Mahala, muro woovoniha,
Onivira okhuma omwaako w'oKalvario.

Vamwiikimanyo, vamwiikimanyo,
T'uvuwa waka mahiku othene;
Mpakha munep'aka ophwanya
Omumula okhopela wa muro.

²⁸⁶ [Munna Branham onipacerya wiipa vathi-vathi *Vakhiviru Va Mwiikimanyo*—Mol.] Oh, moota ereeraly'aya! Muupuwele yeeyo! Ankhi ahaakhanle hata Moopoli? Ankhi naahaarina Masu ala? Ankhi Owo ahaawihanneni? Ankhi Owo ahoosuwenleni khalayi ene, ni nyuwo mwaari ota nno n'atthu akina a molumwenkuni ohiy'ula? Nyuwo munnimphenta Owo? Oh, wulu! Muhiliyale miteko voosiisu, vano, ewoora ya neethanu na xexe ni minuutu miloko miraru.

Vamwiikimanyo, vamwiikimanyo,
T'uvuwa waka mahiku othene;
Mpakha munep'aka ophwanya
Omumula okhopela . . .

²⁸⁷ Vano munivahe woompwa wa *Nipuro V'ephattuweloni*. Esipo ela ya khalayi yooreera, "Nookhala nipuro v'Ephattuweloni." Akavi ansuwela yeeyo? "Nipuro, nipuro, ayo, nookhala nipuro, nipuro v'Ephattuweloni." Nto nyuwo mwiiipaka naanaano, voomaaleleya sana murukunuwe paahi, epantte anyu, nvahane mukhono ni munn'ole. Moosuwela, nookhala nipuro vano w'aMetotista othene. Nookhala nipuro wa aPatista. Nookhala nipuro wa aPentekosite. Nookhala nipuro wa hiyo othene vano, v'Ephattuweloni. Akavi ansuwela esipo eyo ya khalayi? Oh, vekeekhai munnisuwela. Aмоса-amosa a nyuwo a okathi wa khalayi, ela esipo yooreera, ya khalayi y'oKentucky vano.

Nipuro, nipuro, (nvahane matata), ayo,
nookhala nipuro,
Nookhala nipuro v'Ephattuweloni wa nyuwo;
Nipuro, nipuro, ayo, nookhala nipuro,
Nookhala nipuro v'Ephattuweloni wa nyuwo.

Oh, nipuro, nipuro, nookhala nipuro
noowaatta,
Nookhala nipuro v'Ephattuweloni wa nyuwo;
Oh, nipuro, nipuro, ayo, nookhala nipuro,
Nookhala nipuro v'Ephattuweloni wa nyuwo.

²⁸⁸ Vano, kookhalana mootutuxa mwaamukhaani wa nyuwo. Mitthaka sothene sikisenrye, ni iliivuru, n'itthu sothene, sinrowa otumihwaka epantte ekina y'ekereja, esumana enrwa, mmithukumanoni; ifiita n'itthu sothene, ni sothene, ya mukhalelo soolempwa. Anookhala meesa ottuli iwe epantte y'ottuli, esaala kamosa-kamosa. Ni soolempwa, mitthaka sookiserya, ni soolempwa kamosa-kamosa sooreera sikhumme voopacerya wene, mwa iliivuru isya, sithhitiwe naanaano, sothene sinrowa opwehiwa vameesa, ni wooki—wookiseryani w'empa, Namararu ila enrwa ohiyu.

Nto hiyo ninniwehererya o—okathi wooreera mw'Apwiya. Murwe, nvekelaka, vano. Vano, nwiwane arett'anyu n'ale ooxanka, mwaalepele epaphelo. Mwaaruhe va. Hiyo paahi nno... Muluku onimwiittikinya voowerya-vo. Ni hiyo noosuwela wira Owo onimwiira naanaano.

²⁸⁹ Nto vano miyo kinnirowaka w'atthu othene kaasuwel'aka, wira yaahikhalana etthu. Yaakhanle-ene etthu p'itthu ota w'ephiro vano, muupuwele, miyo kihooleelani khalayi, naarowa olakiherya itthu iyo. Ni koosuwela wira nyuwo moosuwela wira va yookhala erooho yoovirikana n'ile yaari-vo khalayi. Munnona? Munnona? Munnona? Eyo ekeekhai. Vano, muhihiye-tho ekhumaka. Miyo kinoolopolani ohoolo wa Yesu Kristu, muhihiye ekhumaka. Mukhale vaava ni yeeyo paahi, moone, mukhalane itthu sothene silakiheriwe-ene nto mweetteke mukelelaka ohoolo. Nyuwo mw'axinna. Khonakhaleke munn'inyu mulopwana wala muthiyana oniira etthu p'itthu yootakhala; erooho ele ya xetwani eniikelihana mmo. Moone, owo onoorukurerya. Vano mmoonele othunku munn'owo mulopwana wala muthiyana, ni musuwele wira ti Satana oniikelihana eriyari. Nto nyuwo mwakhalana eyoonelo mwaha wa yeeyo, mukumihe eyo mwa nyuwo voohipisa, moone, 'okhala wira eyo enimoohononani. Ayo, enimoohononani. Tivo, mukhale ottaiwene wa yeeyo. Muupuwele paahi.

Nookhala nipuro, nipuro, nipuro noowaatta,

Nookhala nipuro w'aMetotista, nipuro wa aPatista, nipuro wa maPrespiteriyaano. Nookhala nipuro n'atthu othene.

Nipuro, nipuro, ayo, nookhala nipuro,
Nookhala nipuro v'Ephattuweloni wa nyuwo.

²⁹⁰ Akavi anuupuwela esipo ahu ile y'olaxeryana ya khalayi, nto?

Mukuxe Nsina na Yesu ni nyuwo,
Anamwane a mixankiho ni ooriipiwa murima;
Nlo nnimoovahani opuha ni oteeliwa murima,
Mukuxe Nenlo mapuro othene munrow'anyu.

Kaanitthuna mukhanle-ene ni hiyo, Munna Jeffreys, nyuwo ni Munna Jeffreys muthiyana, n'amiravo awo vo, ni othene aya.

Vano nto Nsina na Yesu nuurameliwe,
Akokhoreliwaka munawoni mw'Awe; (Oh,
wulu!)

Mwene a mamwene ninoomuwaariha nleha,
Okathi ekwah'ahu eniphiy'aya okhomoni.

Mukuxe Nsina na Yesu ni nyuwo,
Mukuxe ntoko Nikula olelo;
Oh, okathi ottehattehiwa onookhuveel'ayani,
Muromole Nsina nenlo Noowaarya ni
mavekelo.

Oh, okisivela eyo. Ankhi nyuwo? Nsina nlo noothameleya na
Yesu! Vano, nrowe nivenye naanaano va, okathi oniip'ahu vano.
Vaareera.

Mukuxe Nsina na Yesu ni nyuwo,
Anamwane a mixankiho ni ooriipiwa murima;
Nlo nni. . .

[Munna Branham onlavula ni Munna Neville—
Mol.]

Oh moota ninsivel'aya!
Nroromelo wa vathi ni otthapa wa Wirimu;
Nsina nooreerexa (Oh Nsina nooreerexa), Oh
moota ninsivel'aya!

Nroromelo wa vathi ni otthapa wa Wirimu.

²⁹¹ Ela ti yoovirikana vakhani vano. Nrowe nuuramihe miru
sahu paahi vano, nto, voomaaleleya sana, nrowe nivenxe ntata
nimosa. Niire:

Nsina na Yesu nuurameliwe,
Akokhoreliwaka munawoni mw'Awe,
Mwene a mamwene ninoomuwaariha nleha,
Okathi ekwah'ahu eniphiy'aya okhomoni.

Nsina nooreerexa, Oh moota ninsivel'aya!
Nroromelo wa vathi ni otthapa wa Wirimu;
Ayo, Nsina nooreerexa, Oh moota ninsivel'aya!
Nroromelo wa vathi ni otthapa wa Wirimu.

²⁹² Ni miru sahu nlelo suuramme-ene, niire. . . [Munna Branham
onipacerya wiipa vathi-vathi *Mukuxe Nsina Na Yesu Ni Nyuwo—*
Mol.]



MWAHA WA XEENI EHIKHALENLY'AHU MUROMOLELO? EMK58-0927

(Why Are We Not A Denomination?)

Mutthak'ola wa Munna William Marrion Branham, opaceryawene olaleeriwe ni Enkelesi Esaapatu ohiyu, mahiku yettaka 27 mweri wa Setembro, 1958, oBranham Tabernacle oJeffersonville, Indiana, w'Amerika, okuxiwe wookaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on a website, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org